

Cana Coaunera Calaohi Jesoso Cooainanohichuru Afosotooru

Ichanohichuru

**Afosotooru rai, tururai niha Cana
Coauneraacha letoanaa jerei- Cana
Coaunera Suujuene**

1 ¹⁻²Nii nunuhe caje coauneein, niicha ichanohin ichaain, cachaauru relaalu Cana Coaunera Calaohi Jesoso dedeeu cauha cuhane que tiaaajoaaine quene, caa ichei beein, jauriaanejeein laenaunlu, jataain ii belaichaaunna jaaura Teofilo.

Chaen techu dedeeu cauha cuhane ajiniha, rai afosotooru- niicha cocoaiaene-nuuru cotijiaain raain suujua tenajaerate Cana Coaunera Suujue que acaauruhacha ichanenenu coitucuhin ichacuruhane coina. ³Ohane baiha jetaote, jenachoonca janoneein cachaneein ecocohin, acaauru rai Cana Coaunera Cojoanona que ereereje esinae rauhijiriin oo caje ichanaain enacoauneein ichahane esenetaauruhane coina.

⁴Jaiti Jerosaleeun niicha cocoaiaauri afosotooru aina nihane bana jetaote:

“Jiaonriha caa Jerosaleen caje chunijiun cuhichenera. Aitocoaunne rijijieein inara rai Ofaacha tenaa jerei cohacuche jauriaara,” naain chunijiun cuuru caohateein jetao,

⁵“Esinaete rauhijiriin acau que cacha baotisaain cojounacateraate Joaan.

Nete inara chaabana nejein Cana Coaunera Suujue que, baotisaain cojounacatenohineein niha curiquicheeincha,” naain jauriaanejeein acaauru rai beelu jetao Cana Coaunera Calaohi Jesocurisito nitohanihane coina.

**Dedeeu iniha Cana Coaunera
Calaohi Jesosone**

⁶Jesoso aina ita taojiaain neuru najaaun jetaote:

“Enenena coaiten jianacoo Israeli cocoaicha nichaachene mitareeita Curuaanaa, raotojoeein cana ichao que ichaohacachene coina,” naain bajaauruha niicha cocoaianenuurune jana jetaote:

⁷“Nainiheeiche inara nii coitucuhichenera. Chatohanai bana chaainti, nii ichaa cureein Ofata. Leinjiin acaachate nii coitucue niqicha. ⁸Nete inara ichoae fauha Ofa Cana Coaunera Suujuene, nii aina itolere ichana naineriquicheein inara netonaicha. Chaente chatohanai que casilanaala, laraajiin itolere Jerosaleen sacutaain, itolere Jodea batane, Samaria batane, naaonjoainuri sacutaainchuru amuhemujeein canu ere beebejiha curiquicheein, itolereenein chauratane

sacutaain canu coitucuuruhane coinara,” nae jetao acaauru rai Jesoso.

⁹Niritoha acaauru raine jaun jetaote, coarajeeurhane jana jetao, dede sacari jana nitajeeorin dedeeu cauha cue Jesoso.

¹⁰Nii jaun jetaote, coarihurenihane jaun, cuu caaijie chojaelaaurhane jana jetao, somaratothanai que cajionequini acaauru rene ecoocure coroatajai anjeraauru

¹¹Nitohanein ecocohin jetaote: “Chanuna dede chojaelaaichete Calileea cocoaichacuru. Nii coarajeei-chene jana dedeeu cauha cuhane rijijieeinte, coaiten turuha ureein Jesosora,” naure jetao acaauru rai.

Jodasi coreenraniha Matiasi raauruhane

¹²Nii jaun jetaote, nii Oliboneein curuajaain nenea ichatane ucuunno neeuru caje cauha cuure Jerosaleeun, Jesosohacha cocoaanaari afosotooru, ichuunnejein le oaraanca metoro fautaeriin nebetacanaa janonaa bana amuuruha cachaaaurune jerecuruha Jorioocurune itaanejein. ¹³Inae nii neseeu turuhin jetaote, ecuunetiin coroatajaain coaranai loreri asaae sinii aihuruhane jaun jetao, iniha cuure ita caaijie, Fedoro, Saantiaao, Joaan, Aanderesi, Ferifi, Tomasi, Bartolomee, Mateo, Arafeeo calaohi Saantiaao, chaen, Selote naaurunaja- Simoon, chaen, Saantiaao calaohi- Jodasi, naaonjoaainunri. ¹⁴Satiin nii afosotooru jetaote, inetono janonaa bana ita taojiaain, Cana Coaunera bajaee bajaecururejetelu, Jesoso nejeraauru, chaen neba Mariha, chaen leeochoauru enecuru, naaonjoaainunri aina.

¹⁵Nii chojaanona bananein jetaote, ita taojiaaure lefasha coroata chooncaain nenacaauru- Cana Coaunera Calaohi Jesoso esenetaeraauru. Nii jana

jetaote, acaauru cataaun nichaauraaun jetao, acaauru rai:

¹⁶“Jesocurisito coreniha canejeraauru, inae Quiricha Inoaensi cuhane laenaeratein Rabiri que beratihalu Cana Coaunera Suujuene rijijieein situhanetene. Nii jaunte Jesoso mucuha cunacaauru aina cue Jodasi, acaauru rai beranu que. ¹⁷Canacaanu aina nere beranu quete niqui ranojineein nelu. Nete nitohanein ichae. ¹⁸Nii Jodasi jetaote, coretecuruhane jaan coriqui coreniha atane coretihane jaun jetao, nii baiha nemarote. Nemarotihane jaun jetao, couturi que chujujuaain tacaane jaun jetao, nefohitoha rai surine jaun, jianacoon chatolene cache suri. ¹⁹Nii coitucuhinte, nii atane curuaateure Jerosaleen cocoaichacuru Areserameenein. Acaauru ere cuhane, ‘Areserama’ naanete, ‘Ichana core- coriqui coreniha ranojin atane.’ naane aite. ²⁰Cana Coaunera Quiricha Inoaensi- Salmo cuhanete:

‘Rai loreri quete jaole que. Nihei nasaee ichoi.’

naain laenanohineein ne. Chaen techu:

‘Niicha ichaneni neein nenea icharaaunu quete enoe coreenranu que leeocho cache.’

naain, Cana Coaunera Quiricha Inoaensi cuhane laenanohineein ne.

²¹⁻²²Nete, cau canacaanu aina neeure- Cana Curuanaa Jesoso baotisa Joanne caje coauneein- dedeeu cauha cuhanereein tiaaajoaain- canacaanu corihaniha amuhemuhenaacauru cachaaauru.

Aihana jaun, canacaanu lechoonca coroatajanu que, chunocoha acaauru caje enohanete caohachare, canacaanu aina, esinae rauhijiriin ichanaa Jesosone coaracurhane jaun, canacaanu aina beraanu que,” nae jetao Fedoro.

²³Nii jaun jetaote, “Barasaba Josto” naain acaauruhacha curuaatei Jose,

Matiasi, naaonjoainuri, jelai ita rohan tenajaain jetao, niicha jerei biha acaauru rai Cana Coaunerane caina jetao:

²⁴⁻²⁵“Cana Coaunera, iite saatiin cacha suujua coitucuera neein neeicha. Iite, canacaanu que nii coitucueratenaa naineeicha. Chariji, caa coroatajaihuri caje nainere, niicha jereeinein nosa coreniha cunaa jereña jaun cunaa coreenraniha, iicha teei amihanenaa ichana nainereta,” naain jetao, Cana Coaunera bajaare acaauru rai.

²⁶Niritiin Cana Coaunera bajaauruhane baiha jetaote, niha ajeri catu, cojunaca siriina jaun, “Cojunaca siricha mucerate aca nereechina,” naauru jana jetaote, rauhijiriin nii cojunaca aina nena mucue Matiasi. Nii rijieoritiin jetaote, lechoonca coroatajaare Jesocurisito letonocuru, lechoonca leinjiin neuruhane baiha.

Fauha uha Cana Coaunera Suujuene

2 ¹Jorioocuru beseta Feentecosetesi jananaa bana nihane jaun jetaote, satiin le laurijieein ita taojiaain neure, Cana Coaunera bajaauruhane caina Jesocurisito esenetaeraauru.

²Nii jana jetaote, cuu le lorerijieein satiin codohacooruhana jana, luhecotariin tonijiaain cujuana rijitiin fauha uhe Cana Coaunera Suujue dede caje.

³Nitohaneein tonijiaain fauhin jetaote, nii satiin- ecu nenacaauru suujueniha neeritiin, acaauru bichohe naainetiin, usi lanaro tocuhanein lanalanaoananae. ⁴Nii aina jetaote, nejelau nejelaauru, lauri laurichuru caje uhin cuu turunacaauru cachaauru rai, acaauru ere cuhane ereure satiin Jesocurisito esenetaeraauru, erelanaaca Cana Coaunera Suujuene rijijieein.

⁵Nii bana jetaote, cuu nii Jerosaleeun turuhin neure lauri lauri atane

sacutaainchuru caje unacaauru- Cana Coaunera aitoonjoa rijijieein ichaonacaauru Jorioocuru, ecu Feentecosetesi beseta bitoaauruhane caina. ⁶Nitohaneein inae acaauru ichoaae fauha Cana Coaunera Suujuene jana jetaote, tonijiaain ereeuruha Jesoso esenetaeraaurune jana jetaote, satiin codoone-toore nii lauri lauri caje unacaauru cachaauru, acaauru ereuru cuhane aitocuruhane aonaain. Nitohaneein jetaote, suujuanu inaaritelanaala ⁷cojoaelatonajaain:

“Calileea cocoaichacuru nihanatiin, ⁸inasiina cana ere cuhane aitocure aonacaachene caina. ⁹Caute nihacache itolere sacutaain caje uhinichaachene, Partia batane caje unacaauru, Media batane caje unacaauru, Elam batane caje unacaauru, Jodea batane caje unacaauru, Capadosia batane caje unacaauru, Poonto batane caje unacaauru, chaen Asia batane caje- unacaauru, ¹⁰Firijia batane caje unacaauru, Paanfilia batane caje unacaauru, chaen Egipto batane caje unacaauru, tajiha Sirene bujua nena Libia batane caje unacaauru. Chaen techu, cau neure cana aina Romanocuru netonai. ¹¹Acaauru tabaaurute Jorionecure. Jana leeochoaurute, Jorionecurenihane saijieein Jorioonein nerotocure. Chaen techu cau neure cana aina Cureta batane caje unacaauru, chaen Arabia batane caje unacaauru, naaonjoainunri. Nitohaneein araai laurii caje uhacachene saijieeinte, satiin lauri lauri caje uhin nichaachene ereuru cuhane Cana Coaunera coroaecuruhane jana aonajihancache,” naain jetao satiin cojoelatoore.

¹²Nitohaneein cojoelatiin jetaote: “Chatohanihana,” naain ita caje bajaare bajaecure satiin.

¹³Jana acaauru tabaauru jetaote: “Chaquena ereure caa ajenacaauru,” naain acaauru batocure.

Cachaauru raité ere Fedoro.

¹⁴Nii jaun jetaote, lechoonca leinjiin aina ecu nenacaauru afosotooru aina nichaauraa in jetao tonijiaain:

“Aonacuche satiiin Jorioocuru. Satiiin cau Jerosaleeun neiniquichene raina aitoreeunni coitucuhichene coina.

¹⁵Coatiha aitocuhichene jana, aansijii-nijin ajeeuruhi caa cachaauruta. Inasiina jaiti janoneniha natiin ajeeuru-reta. Ena nuna macojiu teejihá enoto natiin, cha caaunna ajeeurure. ¹⁶Nete catohanihane coina, inoaenlu inae aitiin besihalu Cana Coaunera Ere bera inoaensi Joherine rijijieein:

¹⁷ ‘Inara rai quiicha tei janonaa besautelalaje raina, satiiin chauratane que nenacaauru choae

canu suujue letoareeunnicha. Nii banate, quiicha chana jerei coaraain beebjeiha cuurureein canu coreniha,

inara nefoerateeurura. Enamanaacuru niha natiinte, acaauru que quiicha coaratei coaracurureeincha.

Binaacuru nihanatiinte, quiicha coaratei coaraa cuurureein acaauru sinihura.

¹⁸ Nitohaneein inae cutihane banane, saain canu cachaauru, enecuru, quichaauru, naaonjoainuri choae canu suujue letoareeunni canu ere beebjeeuruhane coinara.

¹⁹ Chaenna, naain dedeeu jataain cojoaelanaacojoai coaratiha cureeunnicha. Jerichanejeeinachu, chauratane que coaratiha cureeun-nicha.

Nii banate ecooca cureein

ichana, usi tabai, suruaa neeonjoaain, naaonjoainuri chauratane sacutaaincha.

²⁰ Nii banate conoenereein enotora. Jana atenete, ichana tocohanai jana niha cureeincha.

Nitohanihate cureein inae ichuun nejeeonriha turu rai niha inara Curuaanaane janara.

Nii cojoanonaa banate, coasinacaain elunareeincha. Nerinaain nii caje nichotei cachata.

²¹ Nete, cairichaaajoaain coaraa Cana Curuaanaane coina bajae bajajeein ichaonacaauru, satiiin nii caje nichotiha cuurureeincha.’

naain nere bera inoaensi Joheri que beratihalu Cana Coaunerane rijijieeinte, inae caa aihane jana coaraqichera.

²² Aihana jaun, caohachaain rautaa in aitocooaunne aonacuchena, caa que erete aonaquichera Israeli cocoaicha-curu. Satiiin coarajeeichene notaracaete, itolere ichaain inara notaarate Nasarete cocoaicha- Jesoso que Cana Coaunera rai letononeein nihane coitucuhichene coina niquicha. ²³Nete, inae inoaenlu nitohaneein teechene coina, niicha jerei rijijieein ichaa Cana Coaunerane jaun, inara rai tiha nii terane jana, amaain teeiche nechu aansai cachaauru raine jaun, coroso que teein sohin jaorelu.

²⁴ Nete onaa caje ichatelú Cana Coaunera, onaa caje colucohin, amuritonaa nainesiniha onaane jaun.

²⁵ Inoaenlu jaiti caa chauratane que turueniha Jesocurisitone janate, aitorichaa in Jesosone rijitojoeein: ‘Itolere janonaa banate, cacorataanereein Cana Curuaa-naara.

Aihana jaun,
nerinaain chatohanein canu terata.

²⁶ Nii jaaunte,
raotojoein rachoojoein ne canu
suujuara.

Chaen nechu,
chaque casilanaala raotojoein
ichaaon,

²⁷ curu cuhane nitajiha canu
jaberecone nainatejelanaala,
niheichu
setuha canu jaberecone nainatejene-
reeinine jaunra.

²⁸ Iite canu que,
onaa caje ichananaja coarateeicha.
Nii jaunna,
raotojoein rachoojoein
nereunni,'

narichaain Jesuso, Cana Coaunera raine
rijitoeinte belu curuaanaa inoansi
Rabiri que beratiha Cana Coaunera
jaun.

²⁹ Jesocurisito coreniha canejeraauru,
jerecuhene esinae rauhijiriin inara rai
aitete aonaquiche. Nii coitucuhichene
rijijieinte, ohalu cana foeratera
Rabirine jana, conautecuruhane jaun
cau ne rai natanebana. ³⁰ Nete, esinae
rauhijiriin rai nere bera inoansi niha
Rabirina jaun, rai nichoala- cana
curuaanaa- Rey neein tihane coina, rai
besihalu Cana Coaunera jaun, coara
rijijiein coitucuelu- curuaanaa inoansi
Rabiri:

'Ii ichoala ichoalacuru calaohite,
Jorioocuru curuaanaa Rey niha
cureeicha.' naain que coitucueratiha
Cana Coaunera jaun.

³¹ Nii jaunte, inoanlu jaiti turueniha
Cana Coaunera letono- Mesihazine jana,
nota que coara rijitoein:

'Naaonjoaante, turuha ureeinha.
Nihei nitajerinaain rai jaberecota.
Niheichu ecu seturinaainta. Oo cajete
ichanareein Mesihaseicha,' naain

caohacha nainejeein jitariin
coitucuhana jaun, Jesuso coara
rijitoein belu curuaanaa inoansi
Rabiri.

³² Nii jaunna esinae rauhijiriin
bihalune rijijiein, canaacaanu netonai,
canaacaanu nota que ichanaa Jesusone
coaracaanu, ichatiha Cana Coaunera
jaun. ³³ Nitohanein ichateinte,
enacoaunein dedeeu rae Cana
Coaunera, rai raotono nichajai que, aina
jiniiquiin nihane coina. Chaaen techu,
nitohanein dedeeu raain, nii rai niicha
tenaa jerei rai Suujue te. Niite, caa inara
notaracae canaacaanu nainetiin
chaluhane jaun, satiin coaraain
aonaquiche. Aihana jaun, inae laen
coitucuhiche raotojoein. ³⁴⁻³⁵ Coatiha
Cana Coaunera ere bera- curuaanaa
inoansi Rabiri, dedeeu iniha cuhulu.
Cana Coaunera Calaohi Jesusote iniha
cuelu. Nii jaunte,

' "Iite satiin Curuaanaa neeicha.

Cau caraotono nichajai que
carohan nelaurihaau,

ii que nejeratenacaauru amuritohine
coina
ichacaunne reentiaaincha,"
naa Cana Curuaanaa rai Cana
Coaunera,'

naain Jesuso belu Rabiri, beratiha que
Cana Coaunera jaun.

³⁶ Aihana jaun, satiin Jorioneeichene
raina caa beeun raotojoein coitucuhi-
chene coina. Nii coroso que tein
inaraacha focoi- inaraacha atinai
Jesusote, satiin Curuaanaa Mesih-
sinein te Cana Coaunera," naa
Fedorona jaun jetaote, ³⁷ que suujua
rerohecaain, jataaen inaderaain:

"Jesocurisito coreniha canejeraauru,
cha charihacaanuta," naain
bajaauruhane jana jetaote:

³⁸ "Cana Coaunera notaracae baaso
ichaaain, osa que nesaruin naosatein,

naonjoaain neeichene jiaanein, Cana Curuaanaa Jesocurisito coreniha nebaotisaerateeuche satiinte, inara osa caje inara mitaain, inara rai- rai Suujue teeine Cana Coaunerara. ³⁹Catohanein tihane coinata, inoanlu beratelu Cana Coaunera. Niite nenacaae inara caohachanu neein ne, satiin inara calaohichuru aina, satiin coriaae nenacaauru raine maajein. Satiin niicha cotihacuri raitte, rai Suujue tiha cureein Cana Curuaanaa- Cana Coaunerara,” ⁴⁰naain acaauru suujuatiha, nii cachaauru- baasoneein ichaonacaauru caje mituuruhane coina, Fedorone jaun jetaote, ⁴¹nii niicha beebejei esenetaain tonoraeraauru jetaote, baotisaain cojounacatenojoein, Jesoso esenetaeranein neeure, nii bananeein nichata oaraancai cachaauru.

⁴²Nii jaun jetaote, satiin rauhijiriin ichaaoe, relanajaauruha nii afosotoorune rijijieein, ita suujua rijitoejin jiniiquiin ita corootajanein, ita taojiaain ita aina Cana Coaunera bajaain, ita aina jiniiquiin lenoneein naonjoaauru.

Raotojoeinte ichaaoe Jesocurisito esenetaeraauru.

⁴³Nii jaun jetaote, satiin cojoaela-toore, itolere ichaain- cachaauru notaaratiha afosotooru que Cana Coaunerana jaun. ⁴⁴Satiin nii esenetaeraauru jetaote, ita suujua rijitoejin neein, ita rai chaelai sirichuruhane ita sihure ita acatiha tacaain. ⁴⁵Chaelai acaauruhacha sirii que necoreteeruhane nenainetiinete, ita aina nii corecoriqui teein ita rai leruhin raure, raotojoein latecuruhane rijinanaain. ⁴⁶Cojoanoonetoejin jetaote ita taojiaaure, ita taojiaauruhana jaan coloheri- Teenforo asae. Rai lorerichuru

asaae nihanatiin jetaote, ita taojiaain, ita rai lenone chaluhi lenonecure jiniiquiin, raotojoein rachoojoein ⁴⁷Cana Coaunera corojeein. Chaen jetao techu, caohachaaain neeuruhane coaracure satiin ecu nenacaauru cachaauru.

Cojoanoonetoejinte, niicha ichoteratecure tiha acaauru aina, Cana Coaunerane jaun nejeotejeein sacuure.

Nerautaa leinjiin bacosane

3 ¹Nuna macohi choae teejilha enotone jana jetaote, nii ita taojiaauruha Jorioocuruna jaan loreri Teenforo asae cuure Fedoro, Joaan, naonjoainuri cuu Cana Coaunera bajaauruhane coina. Jelai rijiu enoto tiaajianaain jetaote, ita taojiaaure satiin Cana Coaunera bajaauruhane coina. ²Nii jana jetaote, nii Teenforo acuujuaniha ne leinjiin bacosanein nejanoa caje coaunein nena cachaa. Cojoanoonetoejin jetaote, nii Teenforo acuujuu- Caohachajeinein- acaauruhacha curuhateihu amaain teeure, coriqui bajaa ecu enonacaauru cajene coina. ³⁻⁴Nii jana jetaote, enooru coina inijina cuuruha Fedoro aina Joanne jana jetaote, acaauru caje coriqui bajae nii bacosa. Nitohanein coriqui bajaa acaauru caje, nii bacosane jaun jetaote, coarajeein jetao:

⁵⁻⁶“Aonaunra,” naa nii bacosa rai Fedorone jana,

“Chaelai teeuruhane coina jecha aite,” naain acaauru coarajihane jana jetaote,

“Nihei nohane canacaanu rai coriqui. Nena quicha sirii tereuni icheicha.

Nasarete cocoaicha Jesocurisito coreniha, nimichuhin nichaauraain amuunte coaracaara,” ⁷naain nii bacosa biji- raotono nichajai que mucuhin michuha Fedorone jana jetaote, nii rijieoritiiin caohachanainejin

nerautae nii bacosa tija aina- rai tajichocuru. ⁸Nii jaun jetaote, nimichuhin nichaaurain, nii ita taojiaauruha Jorioocuruna jaan loreri Teenforo asae enoha cue jeluhate jeluhatiin Cana Coaunera coroaeejein. ⁹⁻¹⁰Nitohanein nimichuhin nichaaurain amuhin, Cana Coaunera coroaecane coaraain jetaote, satiin chojaelatiin coasichure situuruhane nainein Teenforo bacuuja- Caohachajeinein- acaauruhacha curuaateihu lauhequiin coriqui bajaera nihane coitucuhin.

**Teenforo chajenein nenea loreri
Salomoonnein- acaauruhacha
curuaateihu neein ereerejiha Fedorone**

¹¹Nitohanein jetaote, Fedoro aina Joaan caje coriaae nalunaa jerene nii bacosa nihane caje nerautaanaa cacha. Nii jana jetaote, Teenforo chajenein nenea loreri Salomoonnein curujaain nenea asaa neeuruhane jaun, soronein ruhanihajaaintiin cuhin chojaelatiin coarajeeure satiin nii cuu nenacauru cachaauru. ¹²Nii jaun jetaote, acaauru rai:

“Chanuna canacaanu chojaelatohichete Israeli cocoaichacuru. Coatiha canacaanuhacha nejein nihane nerautarihei caa cachata. Niheichu jataain leeochoauru amurijiriin, Cana Coaunera ere tonoraeranein nihacaanune jaun niheinta,” nae Fedoro.

¹³Niritiin jetaote:

“Nii cana inoaensihuru- Abaraan, Isaca, Jacobo, naaonjoainuri coaunera- Cana Coaunerate, jataain nelateein nihane coina, cocoinaain rai letono Jesoso letoaelu. Acate, nii cocoinana-caihuri rai teeichene jana, jiaanena jeriha coberanadoro Filatone saijiein, caohateein jianena jereneichelu.

¹⁴Nitohanein caohachanejesina ichara

nihanatiinte, jianena jeriha Filatone jana, caohateein neeichelu. Coinanaa, nechu aansai sonajaanein nenea jianeratequichelu. ¹⁵Nitohaneinte, nii ichaonaa tera sohin joerateeichene jana, ichatelu Cana Coaunera. Canacaanuna, nii ichatiha Cana Coaunerane coaranein nihacaanu. ¹⁶Nii Jesoso corenihate nerautae caa cacha-inaraacha coitucuicha. Jesosohacha corenihate, caochanainejein nerautae caa cacha inara notaracaera,” naain jetao:

¹⁷“Acanihane coitucuneeichene jaun, sohin joerateeichelu inara curuanaacuru aina jiniquine coitucuhanu raotojoeincha canejeraauru. ¹⁸Nitohanein situhin nihanetene. Inae nere bera inoaensihuru que, ‘Naaonjoaite cairichaaeriin inae nirijiein cuaajeein sohin jaoha cuurureincha,’ naain nere bera inoaensihuru que beratihalu inoaenlu Cana Coaunerane jaunte, Cana Coaunera ere nainaane coina, nitohanein nii inoaenlu- inara coroatajaneraaunu que- niicha letoanaa jereilu Mesihasi teeichelura. ¹⁹Aihane jaun, chatohanein baaso ichaain neeichene, sujuelanaala jitariin bein, jiaanein Cana Coaunera ere tonoraain neeuchete caseteco coaraquichene rai neeichene caje inara ichotemiin- Cana Coaunera. ²⁰Chaen techu nitohanein neeichene, nii inoaenlu- inara coroatajaneraaunu que- niicha letoanaa jereilu- Mesihasi- Jesoso letoarein nacoauneeincha. ²¹Nete jaiti itolere rucuheca Cana Coaunerane reentiaan, dedeeu niha cureein nere bera inoaensihuru que, inoaenlu beratihala Cana Coaunerane tocohaneincha. ²²Nii quete, cana inoaensihuru rai:

‘Caa nere beranein caletohane rijijieinte, inara caje nacoauneein rai nere bera letoarein Cana Coaunerara.

Itolere que tonaane, nere tonoraain neeuchera. ²³Nere tonorana jeriheichurute, caohachanainejeein nitajijha cuurureeincha.' naain belu cana inoansihuru rai Moisesa.

²⁴Caritiinte aitoroaeetoorelu Cana Coaunera ere bera inoansi- Samoeri caje coauneen satiin nere bera inoansihuru, catohaneen turuhane quera. ²⁵Nii jaun inarate, nii nere bera inoansihuru que beratihalu Cana Coaunerane rijijieein, nii naitoonjoa sirichaneen neeichera. Chaen techu, inoanlu cana foeratera inoansi- Abaraun rai:

'Satiin caa chauratane que nenacaaurune, caohachaain teratiha cureeunni ii nefoerateuru coreniha.' naelu Cana Coaunera, cana foeratera inoansi- Abaraun rai. ²⁶Niritohane jaunte, oo caje nii Calaoi ichateein, jauriaanejeein inara rene letoaelu Cana Coaunera, nii coaraain neeichene, baaso ichaaechajeein neeichene jianeen neeichene, inara coroatajaneen nihane coinara," nae jetao Fedoro, nii cuu nenacaauru cachaauru rai.

**Cocoinanacaihuri acatiha neeuuha
Fedoro aina Joanne**

4 ¹Niritiin jaiti cachaauru rai ereereeca Fedoro aina Joanne jana jetaote, tajiha turuha ure saseredotecuru, Teenforo beraihurera- folisihacuru- curuaanaa, sadoseeocuru, naaonjoainuri. ²Turuuruhane jana: "Coaraanachuinti oo caje ichana nainiha cachana jaun, oo caje ichanaalu Jesusone. Nii jaunne esinae rauhijiriin oo caje ichana nainiha cachane coitucuhacaanu," naain catcha relaauruha Fedoro aina Joanne aonajeeuruhana jaun jetaote, obaecure sadoseeocuru: "Nihei chunei onaa ichatera. Nihei Cana Coaunera niha

natiin onaa ichatena nainiheita," naain cachaauru relaauruhana jaun.

³Nitohaneen obajeein jetaote, Joaan aina curuataain Fedoro mucuhin amaain, inae sonaina nihana jaun, caresero cuhane tenajaain cuu janoaera-tenajaature.

⁴Nii inatiin jetaote, atiin esenetaaure nii cuu aonajeeurera- arajii cachaauru. Nii jaun jetaote, ita que jooraain quichaauru nejesina janijiin, saouki oharaancaelalajeein Jesocurisito esenetaeraneen neeure, enecuru, canaanaihuru, naaonjoainuri janijilanaala.

⁵Nii cojoanoo jetaote, nii que ita rai ereeuru coina, Jerosaleeun ita taojiaaure Jorioocuru curuaanaacuru, satiin acaauru bichauhenaauru, chaen Cana Coaunera Quiricha Inoansi que catcha relaaurera, naaonjoainuri. ⁶Chaen jetao techu, cuu neeure saseredotecuru curuaanaacuru Anasi, chaen Caifasi, Joaan, Alejaandoro, satiin nii saseredotecuru curuaanaacuru araachuru, naaonjoainuri. ⁷Acaauru jetaote, caresero caje rocoeratenajaain, Fedoro aina Joaan raerateein, acaauru cataaun tenajaain acaauru rai:

"Cha cocoinanacaineen inara tihane aina caa aacheta. Cha corenihata," naain Fedoro aina Joaan caje bajaauruhane jana jetaote, ⁸coroatajaniha Cana Coaunera Suujuene jaun, cha que casilanaala jetao:

"Aonacuche satiin caraachuru curuaanaacuru, satiin Israaeli cocoaichacuru bichauhenaauru. ⁹Nii cunaitenaa rai caohacha ichara coitucunaa jereen bajaachene jaaunna, inara rai berichaanuhincha, coitucuhin neeiche satiine coinara. 'Nitohaneinna nerautaa caa cachate.' naain coitucuhichene jerena caaunra. ¹⁰Satiin aonajeeichene urichoone berichaanuhin, satiin

Israeli cocoaicha neeichene coitucuhin neeichene coinara. Nii coroso que terateein- inaraacha sohin- inaraacha joerateilu Nasarete cocoaicha Jesocurisito- oo caje Cana Coauneracha ichatei corenihate, caohachanainejeein cunai caje nerautaaain, caa canaacaanu aina inara acatiha ne caa cunai caje nerautanaa cachara. Inae satiiin, inara nota que, caohachanainejeein nerautaane coaraquichera. ¹¹Caa cacha rautatera- Jesosote, letoae Cana Coaunera, satiiin cacha coroatajane- raaunu que niqiu. Nete, nere aonana jerelanaala, que jaolequiin neeichera. ¹²Acate letoae Cana Coaunera, nabana nitajeein nihacachene coataara. Nihei chunei, leeocha cacha tihei Cana Coaunera, caa chauratane queta. Leinjiiin acaachate, chabana nitajenaa charanejeein nihacache jaanu teraanu que- letononeein nena ne, itolere baaso caje- jianacoo cana mitaeraanu quera,” naa acaauru rai Fedorona jaun jetaote:

¹³“Caaurute, Jesoso aina amuhemu- jeein nerelanacaauru nera. Coatiha jataain cana tocohaneein, caohatiin- quiricha inaaurera niheita. Nete jataain coitucuera rijitoojeein, erenaa inaaure caa cachaauru,” naaure cojoaelatiin nii cocoainanacaihuru, cha que casilanaala ereeuruha Fedoro aina Joanne jaun. ¹⁴Chaen, cuu acaauru aina, chujuhecoha nii cunai caje nerautanaa cachana jaun jetaote, nii chaque tonaain erenaa nainecurene. ¹⁵Nii jaun jetaote, nii ita taojiaauruhana jaan caje, mitaeratenajaure. Nitohane- neein, mitaeratenajaain jetaote, cuu nejesinajeein, ita cotaicha rijitiin:

¹⁶“Cha charihahacache, caa cachaauru ainata. Itolere caa Jerosaleeun nenacaauru cachaaurute, cojoelanaaco- joai ichaain, caa leinjiin cacha rautaa- uruhane coitucuurera. Nii que, nainihei,

‘Casaje.’ naain, irihacacheneta.

¹⁷Coanete, taeneein cuajeein, Jesoso que- cacha relaauruhane coataa, nii caohatichaachete jianecurumiin, nabana chunei cacha rai, Jesoso que ereein neeuruhanee coataara,” naain jetaote, ¹⁸Fedoro aina Joaan cotijiaain:

“Jiaonriha Jesoso coacuhin que ereerejeein chunei cacha relaiin neeichenera. Nii jianeechacuchera,” naauruha acaauru raine jana jetaote:

¹⁹“Inara suujua coaracuche jauriaane- jeeincha. Inasiina Cana Coaunera ere tonoraacaanune jianeein inara ere tonorarihacaanu, Cana Coaunera ere tonoraacaanune colaihaje tacaainta.

²⁰Nainihaacaanu nii que ereerejihaca- nune jianichaanuneta. Inasiina, canacaanu uricho que- canacaanuhacha aonai, canacaanuhacha coarai, canaca- nuhacha coitucui, naojoaihunri que cachaauru relanaa jianerihacaanuta,” naain tonoranaacuruha Fedoroorune jaun jetaote, ²¹cacha relaauruhane caohateein:

“Nenacaen nitohanai ichaain, sacuhi- chenena, jelai choae jauhecotojoeriin inara casetecarichaanuhincha,” naaure jetao, acaauru rai cocoainanacaihuru.

Nitohaneein jetaote, casetecanajaela- naala, nirijieein jianenaacure. Jianenaana jerecuruhi jetao niqiu. Ne jetaote, nii cacha rautaauruha Fedoro- rune coaraain, Cana Coaunera coroaecu- ruha satiiin ecu nenacaauru cachaaurune jaun jetao acaauru jianecure.

²²Nii cojoelanaacojoaain nerautanaa cacha jetaote, jenachoonca jaanaca amurijiri.

**Cana Coaunera bajaauruha
Jesoso esenetaureraauru, acaauru
lararajihane coina.**

²³Nitohaneein jianenaacuruhanana jaun jetaote, nii neeuruha acaauru

leeochaaurune jaun, turuha cuure Fedoro aina Joaan. Cuu acaauru rene turuhin jetaote, “Naaonjoaainte, canacaanu teeure canacaanu casataain, cana araichuru bichauhenaauru, saseredotecuru curuaanaacuru ainara,” naain jitariin, nii acaauru leeochaauru rai beeuruhane jaun jetaote, ²⁴cuu jiniiquiin, aonajeuuruhane baiha:

“Cana Coanera, iite cana janana coauneranein neeicha. Iite cana rai dede, chauratane, cucuana, naaonjoaain coauneranein neeicha. Iite itolere cautenurijihuru coauneranein neeicha Cana Coanera. ²⁵Iite, ii Suujue que beratein, ii ere bera inoasi Rabiri que beratein:

‘Chanuna joareein
rai suujua auhacaain
nererojoecaure
laurilauri nenacaauru cachaauru.
Chanuna nitohanein
baasonein suujua coaracure
inacojoein cachaauru.

²⁶Chaen techu

Cana Coanera amurijiriin nena
coacuhin,
nii niicha letoai Mesihasi que
nejerateure
cana rai chauratane coaranein
que nenacaauru aina *reycuru*.’

naain aitiin berateelune jaun, niritiin bihalu ii ere bera inoasi Rabirine rijijieeinte, ²⁷Romanocuru curuaanaacha tei Jorioocuru curuaanaa Foonsio Filato, Jorioocuru *rey* Erodesi, chaen nejelau atane nenacaauru, chaen Isaraelitaauru, naaonjoainuri, caa neseu netaojiaain nejerateure, nii ii jerenohin icharaanu que- ii letono Jesoso- iicha janijii iicha rai Mesihasi ainara. ²⁸Nitohanihane coina, inae inoaelu coacuhin ichaailune rijijieeinte, aihurera. Nitohaneinte, aitohine nainaurera Cana Coanera.

²⁹Aihana jaun, enene caje coaunein, canacaanu casataauruhane coaraaine, jelai amuritoheriin canacaanu coroatajaneuna, cha que casilanaala, cachaauru rai, ii ere beebjihacaanura, Cana Coanera. ³⁰Chaen, laraajiin itolere ichana nainichaanune jaannu teeu, canacaanu rai, cunaitenacaauru rautaaain, cojeloanaacojoai ichaain naaonjoacaanune coina, esinaae rauhijiriin nii ii letono Jesoso letononein nihacaanune coaracuruha satiin cachaaurune coina, naain jetao jiniiquiin Cana Coanera bajaaure.

³¹Inae Cana Coanera bajaauruhane nainaauruhane rijieeoritiin jetaote, nerurujuaa nii netaojiaauruhana jaan jelaiine jana, acaauru suujua neeoritiin, acaauru suujua lararajiae Cana Coanera Suujue. Nii aina jetaote, chaque casilanaala, chaque tonajelanaala, satiin cachaauru notaracaee laraajiin, Cana Coanera Ere beebjeure.

**Satiin rucuhete,
satiin acaauru rainein ne.**

³²Satiin Jesoso esenetaeraauru jetaote, jataain arajiin ita aina neeuruhane saijieein, ita suujua rijitoejin coacuhin jetao, “Coatilha leeinjiin cana rainuhachanu que, nihei caa canaacha sirii rucuheta. Satiin cana raineinte nera.” naaure jetao, satiin, ita rai. Nitohanein jetaote, satiin rainein ne nii itolere acaauruhacha sirii.

³³Nitohanein jetaote, jelai choae jauhecotojoeriin, laraajiin, oo caje ichanaa Cana Curuaanaa Jesosone beebjeure jetao nii afosotooru, itolere ichaain, acaauru coroatajaniha Cana Coanera que cachaauru notajaain. Nitohanein jetaote, jelai choae jauhecotojoeriin, satiin, acaauru coroatajane Cana Coanera. ³⁴Nii jaun

jetaote, nii chunei leeinjiinejeein, chaque lanaain neeurene. Tabaauru atane sirichaauru, tabaauru loreri sirichaauru, naaonjoainuri jetao, que necoreteein, ³⁵nii afosotooru rai uhaain niicha raauri coriqui teeure, latecuruhane rijiinanaain acaauru rai lerruuhane coina. ³⁶Coaraaunachuinti jetao, nii acaauru jana nena Lebita-Joseneein curuajaain nena- Chifere cobena que nejanohanaa- Berenabee-neein afosotooruhacha curuuaatei. “Berenabeen” naanete, “suujua nunaera” nae. ³⁷Nii cache jetaote, atane sirihana jaun jetao, que necoreteein, coreniha coriqui raain jetao, jitaain nii coriqui tee, afosotooru rai.

Osa que nesaruhiin, nohaneeuruha Ananihasi, Safira, naaonjoaihunrine

5 ¹Nejetaote acaauru aina ne leecha cache- Ananihasineein curuajai, rai comasai Safira aina. Aca jetaote, nii comasai aina leeinjiin atane que necoreteein, ²ita suujua rijitjoeein leruhin rai core raain, esi rijijieein jitariin amaera rijitiin: “Nocoo coriqui,” naain afosotooru rai teeure. ³Nii jana jetaote,

“Ananihasi, chanuna ishujua cuhane enoha Moconajaerane rijitjoeein, Cana Coaunera Suujue rai nohanena jeree leruhin coriqui raain. ⁴Nihei chunei ichei, ‘Caa atane que necoreteeura,’ naain ereein neita. Nitohaneein, eletoaera que necoretenaa lanaalate, icheineein niha satiin coriquine maajein inatiin, leruhin raain nohaneeicha. Nii atane necoreteeina jaan, coatiaa nejelau rainein nihein. Nii jaunte niqui, satiin, coriquine maajein icheineein nera. Chanuna nitohanai ichana coacuhin ichaai. ‘Canacaanuacha jecha coritaai,’ naai jerihane niqui. Nete, Cana Coaunera

notaracaae canacaanu coritaai,” naa Ananihasi rai Fedorone jaun jetaote, ⁵cuu aonajeeorihane baiha, tocojoaain tacaain, inae cuu ohe Ananihasi. Nii coaraain jetaote, satiin nii coasichure banetojelanaala nii ecu neein coarajeerera cachaauru. ⁶Nii jana jetaote, tajiha nichuuntaain coaraain, rai jabereco conajaain amaain conautiha cuure cachaauru.

⁷Nii baiha jetaote, nichata oraii cuhane, tajiha turuhin enoha uhe nii onaa Ananihasi autana Safira: “Naaonjoaara,” naain coitucuelanaala, caohachanaenetjoeein. ⁸Nii jana jetaote:

“Esinaena rauhijiriin, nii beechene jeeoneei coreneein, inara rai atane que necoreteeiche,” naain bajaa Fedorone jana jetaote:

“Ejeen. Nii bihacaanune jeeonejeeine, necoretihacaanuchera,” naane jana jetaote:

⁹“Chanuna ita suujua rijitjoeein, Cana Coaunera notaracaae canacaanu coritaquiche. Nota tajiha ujuueeruhache ii sinijera amaain, conaute-
raauru cachaaauruchera. Inae itonaa amaaururichaaainchera,” naa Fedorone rijieeoritiin jetaote, ¹⁰Fedoro tija asaae tocojoaain tacaain, cuu ohe nii ene. Nii jana jetaote, rai lana conautecuruhane caje turuhin, enoha cuuruha nii cachaaurune jana, inae oha nii enene jaun, rai jabereco amaain, rai lana rohan tein conautecure. ¹¹Nii jaun jetaote, banetojelanaala coasichure nii satiin Jesoso esenetaeraauru, satiin nii nitohanihane coitucuererane maajein.

Afosotooru aina cuaain, itolere cojoaelanaacojoai ichaain cachaauru notaaratiha Cana Coaunera

¹²Nii afosotooru aina cuaain jetaote, itolere cunai caun cunaitenacaauru,

bacosacuru, maosacuru, naaonjoaihunri rauterateein, itolere icharateein cacha notaarate Cana Coaunera. Nii bana jetaote, nii Teenforo chajeneein nena Salomoonneein curuajai asaae ita taojianajaaocure afosotooru, satiin Jesocurisito esenetaeraaauru, naojoainunri. ¹³Nejetaote, nii chunei acaauru aina netaojiana jerecurene casi caun, jataain belainaacuruha natiin. ¹⁴Nejetaote, arajiin cachaauru enecuru netonaine maajeein Cana Curuaanaa esenetajeein nejeotejeeure. ¹⁵Nii jana jetaote, itolere cunai caun cunaitenacaauru mitaacoain, cacha situnajaun bero auhaniha teeure, nela choae, rai rori choae, naajoaain, tabaauru que neconaa Fedoro beraerane, nerautaauruhane caina. ¹⁶Chaen nii Jerosaleeun rohan nenacaauru- neseeuru nenacaauru cachaauru netonai nihanatiin jetaote, tajiha turuha uure itolere cunai caun cunaitenacaauru, itolere coitucuchuhi cairichanojineein ichaonacaauru, naaonjoainuri uhaain. Niichuru jetaote, rai cunai caje rautanaacuruhane, jataain raotojoein satiin nerautaaure.

Afosotooru que nejerateeeuruha cocoinanacaihunrine

¹⁷⁻¹⁸Nii jaun jetaote, itolere cacha, acaauru belaihana jaun, nechu jataain necoelai caun, nii afosotooru mucuhin amaain, caresero cuhane tenajaaure nii saseredotecuru curuaanaa aina, nii oo caje cacha ichtatena nainiha Cana Coaunerane esenetaichuru- sadoseocuru. ¹⁹Nii jana jetaote, janotiin caresero bacuujuua joracaain, acaauru mitae Cana Coaunera letono- anjera. ²⁰Nitohaneein mitanajaain jetaote:

“Naain Teenforo cuhane enohin, cacha cataaun nichaauraain, cachaaru rai beebejein, caa Ena- Cana

Coauneraacha Tei Ichaonaa beebejeeuchera,” naain jetao, letoanajae Cana Coaunera letono anjera. Nii jaun jetaote, mituhin cuhin, ²¹janohetiin nii Teenforo asaae enohin, beebejein cachaauru relaaure.

Nii nainiha jetaote, saseredotecuru curuaanaa, chaen acaauru aina nenacaauru, naaonjoaihunri, satiin-acaauru bichauhenaauru cotihacure, netaojiaauruhane caina. Nitohanein, ita taojiaain jetaote, nii afosotooru raerateeure, caresero caje. ²²Nii jana jetaote, turuhin nii caresero joracaain coaracuruha nii acaauru letonocurufolisihacurune jana, nii leeinjiinejein, cuu neeurene. Nii jaun jetaote, letoanajaaurera rai, biha cuure. ²³Turuhin jetaote:

“Caohatiin funojoineein, acuujuua naineeinchuru soondarooru que caohatiin beraichaaain nihanatiinte, joracaain coaracaanune jana, neeurene leeinjiinejeincha,” naain beeuruhane jaun jetaote:

²⁴“Nitohaneeuruhane, chachaainti ichaa cuurureein nirijieein taeneein cuaajeinta,” naaure, satiin saseredotecuru curuaanaa, saain Teenforo beraichacuru- folisihacuru curuaanaa, jataain nelatein nenacaauru saseredotecuru, naaonjoaihunrine jana jetaote, ²⁵tajiha turuhin:

“Nota Teenforo cuhanete, cachaauru relaa neeure caresero cuhane inaraacha enoanojoihurura,” naain, acaauru rai beenajae leeinjiin cacha.

²⁶Nii jaun jetaote, nii rijieoritiiin cuhin, rai folisihacuru amaain, ranajaa cue folisihacuru curuaanaa. Nitohanein cuhin jetaote, inae erunajaain, acaauru uhae, chatohanein cunaain dadanajaelanaala cunaain, chatohanein tenajaauruhane, ajeri que bodoosinajaauruha cachaaurune coataa. ²⁷Nitohanein,

turuanajaain jetaote, Jorioocuru curuaanaacuru, saseredotecuru curuaanaa, naaonjoaihunri acatiha tenajaain jetao:

²⁸“Inae inara rai, nii cacha que, cachaauru relaaichene coataa aitiin, caohatihacaanulura. Nii saijieeinte, enanetoejein, nii jianena jereneeichera. Cha ichaquiche, nii que cacha relaaainta. Inae itolereneein Jerosaleeun sacutaain, nii que cachaauru relaaichera. Chaentechu, canacaanu que, ohalu nii cachane ujuaitena jerequichera,” naa acaauru rai, saseredotecuru curuaanaane jana jetaote:

²⁹“Cacha ere tonoracaanune choae jauhecotojoeriin jataain Cana Coaunera ere tonoraacaanune jaunna aihacaanura. ³⁰Nii cana inoaasihuru Coaunera- Cana Coaunera, nii coroso que teein, inaraacha sohi inaraacha joailu- Jesoso ichatelura. ³¹Nitohaneein jaurihaaneein, oo caje ichateeinte, raotono nichajai que lauriaain, nii Jesoso cocoaainae, itolere curuaanaa nihane coina, Cana Coaunera. Chaen, itolere baaso caje- cacha mitaeraaunu quene maajeeinte, te Cana Coaunera, Israeli cocoaichacuru coroatajaneraaunu que, itolere baaso ichaechajeein neeuruhane jianein neeuruhane, acaauru que suujua acatena nainiha Cana Coaunera coinar. ³²Canacaanuna, nii coitucuhin, coaaranein, que ereerejihaaanu. Chaen, nii nere tonoraain naitoonjoan icharaauru rai, Cana Coauneraacha tei Cana Coaunera Suujue netonoaite, canacaanu que nii coaratera,” naain tonoranaacure, Fedoro aina, leeochoauru afosotooru.

³³Niritiin, tonoranaacuruhane jaun jetaote, obajeein, acaauru sohin, acaauru jaonaa jerecure. ³⁴Nii jana jetaote, nii cocoaainacaihunri aina cuu ne leeinjiin fariseeo Camalieli. Aca jetaote, Cana Coaunera Quiricha Inoaesi

coitucueraneein, acaentonai cocoaainacainein, jataain suujua acatecuruha itolere cachaaurune jaan ne. Nii jetaote, nimichuhin nichaaurain, basinjiin afosotooru mitaerate, aerene. ³⁵Nitohanein, inae mituuruhane jana jetaote:

“Aonacuche, satiin- Israeli cocoaichacuru. Caohachaaain necohalajiin aihuchera. Nijiaonriha, joaenreein coitucuera lanaala, chatohanein caa cachaauru teratein neeichene. ³⁶Aihalu Teodane coaucuhenaainti. Coaracuchenachuhinti, leesajei que niqui, ‘Aca jete, jataain itolere amurijiriin nelateineeina.’ naane jaun niqui, esenetaain sacuuruha jena fashai cachaaurune. Nii jana, sohin jaoruhane jaun, ita caje riaanein, jianecuruhalucuureraauruneta. ³⁷Coaraaunachuinti, itolere sacutaain nenacaauru cachaauru janiichatiha Romanocuru curuaanaane bana, coaiteen Romanocuru aina nejeratiha leeinjiin- Calileea cocoaicha- Jodasine jana, jerichanejeein, acaentonai sohin jaoruhane jaun, rai sacuurera netonoain, ita caje rihaanein, jianecuruhaluneta. ³⁸Nii rijijieeintechu, Cana Coaunera letononein aihurenihane caa cachaaurune, raajenihane jianiha cuurureeinte, rohecanacaaurureta. ³⁹Aihana jaun, Cana Coaunera letononein aihuruhane jana, acaauru aina nejerateein, acaauru rohecaachenete, Cana Coaunera aina netonai nejerateriquicheeincha. Aihana jaun, coaa Cana Coaunera aina nejeratanaa amunena coacachera,” naa Camalieline jaun jetaote, nere tonoraacure.

⁴⁰Nitohanein nere tonoraain jetaote, raujiaain nii afosotooru cotijiaain bisichatenajaain, “Nijiaonriha nenacae Jesoso que cacha relaaain neeichenera,” naain jetao, cacha relauruhane caohatein, jianenaacure. ⁴¹Nitohanein

jianenaacuruhane jaun jetaote, nii cocoainanacaihunru notaracaae raotojoein rachoojoein, jelai caje cauha cuure, bisijnajaain mainajeein, acaauru necoejehanuuruha, Jesoso coreniha, Cana Coaunera notaracaaene jaun. ⁴²Nii atiin jetaote, jianelanaala cojoanonetojoein, nii acaauruhacha cohajei Mesihasi niha Jesosone beebejeein, cacha relaaure, Teenforo asaas, loreri naineeine maajein.

**Caainsineein acaauru
coroatajaneraaunu teeuruhane**

6 ¹Nitohanein jetaote, nii bana nenacaen nejeeontejeein cuujueein, arajiiin nefaaure Jesocurisito esenetaeraauru cachaauru. Nii jaun jetaote, nererojoeaure nii Curieco ere cuhane erenacaauru- Jorioocuru, nii Ebereeo ere cuhane erenacaauru que. Nitohanein, nererojoeaain jetaote:

“Chanuna lenone chaluuruhane, inara aina nenacaauru autanaauru rai teeuruhane fautaerihanaain, canacaanu aina nenacaauru autanaauru rai quinacai teure chaluurerata,” naaure Ebereeo ere cuhane- erenacaauru rai.

²Nii jaun jetaote, jitariin, nii Jesocurisito esenetaeraauru taojiaaure nii lechoonca coroatajai Cana Coaunera letonocuru- afosotooru. Nitohanein, taojianajaain jetaote, acaauru rai:

“Coatia caohacharihei, Cana Coaunera ere beebejihacaanune jiaanein, cacha rai lenone teureera beraichanein nihacaanuneta. ³Aihana jaun, canejeraauru, caunsine cacha- itolere coitucuurera- Cana Coaunera Suujue que suujuequiiin nenacaauru, inara caje, chariji chaainti esinaae rauhijiriin nitohanai ichana nainaeraaurune, niichuru janijiin beeuchene, canacaanu, acaauru rai amihanenaa tihacaanu, jelai teein, nii coaranein neeuruhane

coinara. ⁴Canacaanuna laen, satiin rai, Cana Coaunera bajaebajajeein, Cana Coaunera ere beebejeein sacurichaanuhicha,” naauruhane jana jetaote, ⁵satiin, ita suujua rijitoejeein jerecure.

Nitohanein, jereein jetaote, Jesocurisito ere esentaain- Cana Coaunera Suujue que suujuequiiin nena Eseteba, chaen Ferifi, Poroocoro, Nicanori, Timoon, Paramenasi, chaen leeinjiin cacha- Antioquiha caje nena- Jorioonein nerotona- Nicolasi, naaonjoainuri janijiin raature. ⁶Nitohanein janijiin ranajaain jetaote, tajiha turuanajaa uure nii neeuruha afosotoorune jaun. Nii jana jetaote, acaauru couturi choae biji mercaain, Cana Coaunera bajaure, acaauru cocoainaa Cana Coaunerane coina.

⁷Nii aina, itolere sacutaain riaanein, Cana Coaunera ere beebejeeuruhana jaun jetaote, nenacaen jelai choae jauhecotojoeriin, Jerosaleeun, jataain nejeeonteure Jesocurisito esenetaeraauru cachaauru. Arajii saseredotecuru- Jorioonein nenacaauru niha natiinte, Jesocurisito esenetaaure.

Eseteba mucuuruhane

⁸Nii Eseteba jetaote, coroatajanihia Cana Coaunerane jaun, itolere que laraajiiin, itolere cunaitenacaauru rautaaain, itolere ichaain cachaauru notajae. ⁹Nii jaun jetaote, Cairichaerino- jioeein Neeuruhane Caje Mitano- joihuru neein curujajai sinacoca nenacaauru- Sirene caje, Alejaandiria caje, Silisia caje, Asia caje, naajoainuri caje unacaauru tabaauru jetao, Eseteba aina, ita cotaicha rijitocure. ¹⁰Ne jetaote amuritona nainesihurene, Eseteba suujuatiha Cana Coaunera Suujuene que laraajiiin irihana jaun. ¹¹Nii coreniha obajeein jetaote, tabaauru coretecure, nechu joareein caje rocohin, irijiaain:

“Baasoneein Moisesa que ereein, Cana Coaunera netonai quete erera,” naain acaauru aina coulurujueeuruha, nechu joanreeine caina. ¹²Nii jaun jetaote, niritii beeuruhana jaun, Eseteba que nejerateein, codoonetiin Eseteba mucuure- satiin cuu nenacaauru, satiin-nii Cana Coaunera Quiricha inoaesicoitucuurera, satiin- acaauru bichauhe-nauru, naonjoainuri. Nitohanein mucuhin jetaote, tararaan amaain, acaauru curuaanaacuru rai teeure, nii rucuhecuruhane caina. ¹³Nii choae tacaain jetaotechu, nohanein acaauru aina colurujueeraanu que- casaje cachaauru arihuruhana jaun:

“Canacaanu netonaina chuhisi, aonajenajaaocaanura. Inetono janona bana te, ‘Chaque jete nelatere cana rai Teenforo. Chaque jete nelatere cana rai- Moisesa aitoonjoa- Moisesa ere. ¹⁴Nii Nasarete cocoaicha Jesoso jete, cana rai Teenforo chamuhitiinjien jahaje cureeinjien. Nii ichoae tacaain jete, cana rai Moisesa aitoonjoa, cana ichao corereeinjien.’ nanajaaonca chuhisicha,” naauruha nii cocainanacaihuri rai, nii casajeeurune jaun, ¹⁵nii Eseteba coarajeeuruha- saain- nii cuu nenacaauru- cocoinanacaihuri, satiin-nii cuu nenacaauru- cachaaurune maajeine jana jetaote, Cana Coaunera letono anjera nomeri tocohaneein necore satiin rai nomeri.

Jabereco coreniha iriha Esetebane

7 ¹Nii jaun jetaote: “Esinaaena rauhijiriin, ii que erenaaniha,” naain Eseteba caje bajaa- saseredotecuru curuaanaane jana jetao:

²“Aonacuche canejeraauru, satiin ichauhenaauruna, nii que rauhijiriin aitate, aonaquichera.

Jaiti Araaun ichaoha cueniha cana foeratera inoaei Abaraaunne ajiniha

jetaote, Mesopotamia batane nihane jana, rene ecocohin: ³“Caa ii atane jiaaneein, satiin ii araichuru ratiriin, ichei quiicha coarateeni atane que ichaonihura.’ naa Cana Coaunera, Abaraaun raine jaun jetaote, ⁴Caldea atane caje mituhin, naain nejelau ataneu- Araaun neein curuajaihu ichaoha cuelu Abaraaun. Nii baiha jetaote, inae oha rai inacane jana, caa ena nihacachene jaan atane que Abaraaun letoae jetao- Cana Coaunera niqui. ⁵Ne jetaote, nihei aansijineeniiji, rai atane tenelu Cana Coaunera. Ne jetaote, nii caaniha jetao: ‘Ohine baihate, ii calaohichuru rai, chichoalacuru rai, naonjoainuri rai niha cureein atanera. Chaen coroatajajeein nefaaururihaain ii nefoerateeuruta.’ nae Cana Coaunera, Abaraaun rai. Nii bana, jaiti neniha leeinjinejeein Abaraaun raicanaanai inatiin jetaote, Abaraaun rai niriti Cana Coaunera.

⁶Niritiin jetaote, Abaraaun rai: ‘Jauriaanejeeinte, jena fasha jaanacaneein, eroraqui nejelau atane que ichaoha cuurureein, belainohine lanaala, nechu caseteco rijijjeein ii nefoerateeurura. ⁷Nena, nii acaauru cairichaerichaauru cachaauru casetecaain, jelai caje Isaraeliticuru rocoerateein, nii caitoonjoa- acaauru que banihateein- quiicha rucujuei atane que teratenajareeunni, acaauru que banijiaain atane que ichaohin, quere tonoraain ichaooruhane cainara.’ nae Cana Coaunera, caa nihacachene jaan atane que. ⁸Chaen techu esinaae rauhijiriin, Abaraaun rai aithane coujounacanu que: ‘Quichaneein nejanoha ichei canaanaine, jaberoco cari jiununuerateein saerateeura.’ naa Cana Coaunerana jaun, nejanooa rai calaohi Isacane jana jetao, fosa janoneein nejanoha baiha catiaain

jetao, coriha cari jiununuerateein saerate Abaraaun. Nii jaun jetaote, jerichanejeein rai calaohi Jacobo icharate Isaca. Jerichanejeein jetaotechu, nii lechoonca coroatajai rai calaohichuru Israelitaauru foerateranuuru icharate Jacobo.

⁹Nii Jacobo calaohichuru jetaote, cana inoaesihurune. Acaauru jetaote, nii acaauru ocoala Jose que nererojoeaacain, que necoreteure Egiptoo cunacaauru-cachaauru rai, Egiptoo amaa'in, que necoreteeuruha Egipto cocoaicha raine coina, nechu jataain nocoelai caun cotaiha. Nejetaote, atiin nii jana, Jose coroatajane Cana Coaunera, itolere necairichanaa caje mitaain. ¹⁰Nitohaneein jetaote, itolere necairichanaa caje mitaain, coroatajaniha Cana Coaunerana jaun, itolere coitucuha Josene coaraa Egipto curuaanaa Faraaonna jaun: 'Acate, caque jauriineein- itolere coaraneein- itolere curuaanaa neein- nerora rijijieein nihane caohachaera.' naain, coberenadoro neein nii Jose cocoainae jetao Faraaon. Nii jaun jetaote, itolere-Faraaoncha sirii erora rijijieein, itolere atane curuaanaa neein coberenadoro neein nelu jetao Jose.

¹¹Nii baiha jetaote, carajaa'joaain catiaain, necairichaaurelu satiin cana inoaesihuru, caohachanainejeein neniha quinacai, Canaaun, nii Egiptoo nihanaatiina jaun. Itolere caa cana atane sacutaain, niheilun chunijihun quinacai arihuruha cana inoaesihuru- cana fojiaraaurune jaanu. ¹²Nejetaote, nii bana Egipto curuaanaa rai niha tiricone coitucuriin, rai calaohichuru- cana inoaesihuru letoae Jacobo, Egiptoo tirico coretiha cuuruhane coina. Nii tirico coretiha cuuru que jetaote, jauriaanejeein, Egiptoo cunaa nunueteurelu- cana inoaesihuru. ¹³Nii

baiha, coroata saain cuuruhane cuhane jetao te: 'Inara caje- nena neeine neeunra.' naain nihanacuru que, necoitucuerate Jose. Niritohane jaun jetaote: 'Acaauru caje nena neeina nihate,' naain Jose coitucue Egipto curuaanaa- Faraaon. ¹⁴Nitohaneein jetaote, nii baiha neeoriin, acaauru inaca- Jacobo raerate, jitariin calaohichuru aina curuataain, satiin Egiptoo, cuuruhane coina, raeratenajae, rai nejeraauru que Jose. Itolere neein, caaunsichoonca saoquii- nenacaauru naraaichuru raerate jetao. ¹⁵Nitohaneein jetaote, Egiptoo ichaoha cuelu jetao Jacobo. Cuu neein jetaote, ohelu. Chaen jetaotechu, cuu oorelu nii calaohichuru, cana inoaesihuru netonai. ¹⁶Nii baiha carajaain neein jetaote, nii Egipto caje mituurelu cana inoaesihuru ichohalacuru- Israelitaauru. Nitohaneein mituhin jetaote, nii acaauru rinaja- Jacobo bucuuru rocohin amaa'in, Siqueeun, Amoro calaohichuru caje- Abaraauncha coretei- atane que rai bucuuru amaa'in rucuhecurelu.

¹⁷Nii baiha carajaa'joaain catiaain jetaote, inae Abaraaun rai jinateein, Israelitaauru rai- atane tenaa jeriha Cana Coaunerane cataiinaaecane jana, inae arajiin nefaecure- Israelitaauru Egiptoo. ¹⁸Nii bana jetaote enoelu, Jose coitucuelanaala nena- Rey, Egipto curuaanaa- nihane coina. ¹⁹Nii Rey jetaote, cana inoaesihuru- Israelitaauru coritaain cairichaa'in, acaauru bereecuru- ena nejanoanacaauru-quicha chojaajihuru joerate, nabana arajiin nefaauruhane, Egipto cocoaichacuru que nejerateuruhane coataa, necohalaai caun.

²⁰Nii bana jetaote, nejanoaelu Moisesa. Nii nejanoaha Moisesane jana jetaote, jataain belaa'in coaraelu Cana Coaunera. Nii jana jetaote, nichata

atejeeincha sirichurelu asinojoneein rai fojjaraauru. ²¹Nii baiha jetaote, acaauru bereecuru- quicha cojoaajihuru jaohacooauruhane coina, aitoha- nii Egiptoo curuaanaana jaun jetao, nemuri auhania, caohachajeein curuteein, nii Moisesa jiaanecure- rai fojjaraauru. Nitohaneein, curuteriin nemuri auhaniha teeuruhane jana jetaote, coaraain raain, rai beree rijijjeein- nii Moisesa fojjiae- nii curuaanaa- Faraaon cacunu. ²²Nitohanihana jaunte, Egipto cocoaichacuru rijijjeein, acaauruhacha coitucui coitucuhin, acaauru relanojoneein, leeinjiin cacha mijiaaainein, nere que, nichanaa, naaonjoainrunru que laraajiin nelu Moisesa.

²³Nitohaneein jetaote, inae jena choonca jaanacaanihane jana, naraaichuru Isaraelitaauru rene, turuha cue Moisesa. ²⁴Nii jana jetaote, cuu leeinjiin- Isaraelita sohajiha- Egipto cocoaichane coaraain niqui, nii naraai Isaraelita cocoaeratiha, nii Egipto cocoaicha sohin joae- Moisesa, ²⁵nii caje nainaaain: 'Caate, letoae Cana Coaunera, cana coroatajaneraanu quera, naaururi- chaain jecha, nii naraaichuru Isaraelitaauru.' naain. Nete caohacha naenetohecure.

²⁶Nii cojoanoo jetaote, ita sohajeeuruha coroatajai Isaraelitaaurune jana, runajaain: 'Chanute nejesinajeein ita sohicheta,' nae niqui Moisesa, nere tonoraa jerenajaain. ²⁷⁻²⁸Nejetaote: 'Chate, nii coaranu que chenoaain, canacaanu curuaanaanu que eletoaeta. Raca, Egipto cocoaicha ichaaine tocohaneein inoonte, casohin cajaanaa jereeta.' naain cotaain, Moisesa saruhite nii eleecha sohajera Isaraelita.

²⁹Niritiin saruhitohane jaun jetaote, jelai caje sorohin, Madaaun batane cuhin ichaoha cuelu Moisesa. Nitoha-

neein jetaote, ucuae sorohin, coroata- jaain quicha cojoaajineein canaanai siriin, nejelau ataneu nenacaauru aina, ecu ichoaelu Moisesa.

³⁰Nii baiha, jena choonca jaanacai baiha jetaote, cacha areroo- desiereto cataaun- ichtatane ucuuno- Sinaaainein curuajai rohan, chujuhechoha Moisesane jana jetao, iihane- ecu chujuhequi- enuha laajoiri cacaaerii. Nii jana jetaote, nii enuha laajoiri iihaneei cataaun ecooca leeinjiin aanjerana jaun jetao, ³¹cojoaelatiin coarajeein, caohachaaain rautaaain coaraane coina, rohan nichuuntaaoriin coaraa Moisesane jana jetaote:

³²Canuna, ii inoaesihuru Coaunera- Inara Coaunera neein neeunra. Canuna, ii inoaesihuru- Abaraaun, Isaca, Jacobo, naaonjoainuri- Coaunera neein neeunra.' naane jana jetao, coaaneentojoelanaala coasiha nesooneetiin rijijijianiha Moisesane jana jetaote:

³³'Nii ii safato rocoora. Canu turuna jaan nihana jaun, nainiheeii nii ii safato ruhacaain caelai shaaquineta. ³⁴Naain, Egiptoote, inaderaain necairichanaa caun chanaaure canu cachaaurura. Nii jaunna, coaracauna jaun, cau faaun, nii caje jianacoo tenajaanune coinara. Nii jaunna, eletoaareuni Egiptoo, jelai caje canu cachaauru rocoeraanuquera.' nae Cana Coaunera, Moisesa rai.

³⁵Jauriha nejeein Moisesa batohin: 'Chaate, canacaanu curuaanaa nuque, ii cocoaain, nii coaranuque eletoaeta.' naauruhalu natiin jetaote, esinae rauijiriin letono aanjera que Moisesa letoerate Cana Coaunera, nii enuha laajoiri- iihanei cataaun ecocohin cocoaain, nii cairichaeriinajaauruha Egipto cocoaichacurune caje Isaraelitaauru rocoeranu que.

³⁶Nii jaun jetaote, nii Moisesa, Egipto caje cana inoaesihuru rocoera nelu

jetao, nii atane que, itolere ichaain cachaauru notajaain. Nii Egipto rohan nena Cucuana Lanajaijihu jetaote, nii rai biji achune tochataain jetao, aiha berone rijijieein, nii cucuana tabai jacoraain, acaterate, jera jaoorua Isaraelitaaurune caina. Chaen cache areroo- desieretoo jenachoonca jaanacaneein, itolere acaune maajeein ecoteein, itolere ichaaechajeein, cachaauru notaarejetelu jetao Moisesa.

³⁷Nii Moisesa jetaote: 'Leeinjin inara cajete, ecooca cureein caa caletohane rijijieein Cana Coanera letononeein rai nere beraneein neenicha.' naain belu cana inoasesihuru Isaraelitaauru rai.

³⁸Nii Moisesatechu, cache areroo desieretoo nasaee nedaauruha cana inoasesihuru Isaraelitaaurune jana, jelai nii ichatane ucuuno- Sinaain ichoae ucuun iniin, Cana Coanera letono aanjera aina erelu. Nitohaneente, aanjera caje, nii cana rai Ichaonaa Tera Erenaa raain telu, cana inoasesihuru rai, cana rai beeuruhane caina.

³⁹Nitohaneein, nii raane caina, nii ichatane ucuuno que, siichoha Moisesane tonohana jetaote, renatoonoraee lanaala, Egiptoo cauha cunaa jerecurelu jetao cana inoasesihuru Isaraelitaauru. ⁴⁰Nitohaneein jetaote, acaauru rai saseredote inoasesi- Aaroon rai: 'Cha que chaainti nerurujuae, Egipto batane caje canacaanu rocohin, canacaanu uhaeralu- Moisesata. Nii jaunna, canacaanu rai, ecaantooru rijijieein chosichuru ichaaine jerichaanu, cana coroatajanecuruhane coinara.' naauruhana jaun jetaote, ⁴¹jeriha Aaroone jaun, baca calaohi rijijieein ecaanto ichacure. Nii rai nihane jetaote, lenone sohin teeuere, Cana Coanera rai ichacuruhane rijijieein. Nitohaneein jetaote, acaauru biji que ichanohin- ecaanto- chosi rai,

lenone nihane sohin teein, beseta bitoera tocohaneein ichaain, ecaantochosi coroaecure. ⁴²Nii coaraane jaun jetaote, acaauru aina obajeein, coroatajanenaacane jiaane Cana Coanera, acaauru chosichuru niha acaauruhachei- dedeu nenacaauru, enoto, atene, arasijie, naaonjoainunruhachei coroaecuruhane caina. Nitohanihane jaun jetaote, nere bera inoasesihuru que aitiin laenaerateein:

'Isaraelitaauru:
coatia carai, nii jenachoonca jaanacaneein, cache areroo- desieretoo neeichene bana, carai lenone sohin nihane terejetoheicheluta.

⁴³Nete, acaihanejeein biji que cachaauru ichanohin inara chosi niha- inaraacha bei- Moloco raiichate, lenone nihane sohesojoeein, terejetocoichelura.

Chaen, Refaan neein curuajai inara raajenihane inara chanaa- inara chosi neein inaraacha bei- arasijie, naaonjoai raiichate terejetocoichelura.

Nii jaunna, inara atane caje inara rocohin, naain Babiloniaun bujuuau inara sitareeunnicha.'

naain, nii ajiniha bihalu Cana Coanera jaun, nii rijitoejin laenacurelu nere bera inoasesihuru.

⁴⁴Nitohaneein nere tonoraelanaala, que jaolecooruhane saijieein jetaote, Moisesa que coarateein jetao, canii cari caje nena loreri Taberenacolo icharate Cana Coanera, nii cache arero- desieretoo amuhemuhecuruhane jaunru, acaauru jiniichaain, nii Taberenacolo amaauruhane caina. Nii taberenacolo jetaote, acaauru rai telu

Cana Coaunera, 'Naojoaainte cana aina ne- Cana Coaunerara.' naain itolere bana coacuruhane coina. Nii asaete, nii ajeri que teein- laenanohineein nenea Cana Coaunera Ere rucuhecure jetao. ⁴⁵Nii Taberenacolo jetaote, inae oha Moisesane baiha carajaan neein, uhaaurelu nii Moisesa coreenraniha nenea Josoe aina cunacaauru- cana inoaesihuru. Nitohanein jetaote, nii acaauru rai Cana Coauneraacha tenaa jerei- atane que nenacaauru aina, sonohanaque nichaauraain, acaauru amuritoorelu, acaauru caje nii atane raauruhane coina coroatajanenaaca Cana Coaunerana jaun. Nitohanihalu jetao, enoha curuaanaa inoaei Rabirinereein tiaajoaain.

⁴⁶Nii Rabiri coroatajaniha, itolere que Cana Coaunerane jaun jetaote, turuha cana foeratera Jacobo Curuaanaa- Cana Coaunerane jaannu que Teenforo ichana jerelu niqui. ⁴⁷Ne jetaote, icharatiha Rabirine caohatiha Cana Coaunerana jaun ichaenelu. Nii janate, inae oha Rabirine baiha jetao, nii Teenforo icharatelu nii calaohi Salomoon, Cana Coaunera turunajaannu que. ⁴⁸Coatiha niqui, cacha ichanohineein nenea loreri Teenforo asaae ichaohi niqui Cana Coaunera. Nitohanihane jaunte, rai nere bera inoaesihuru que beratihalu Cana Coaunerane jaun, nii aitoroatihane rijitjoeiein:

⁴⁹ 'Caa dedete, canu nelaurihana jaanne. Jana chauratanete, catiha rorine.

Chaen techu, chatohanai lorerina ichacurure, cuu nebetacaanune coina.

⁵⁰ Tana, canu, caa itolere coaunaain nihanulune coitucuruhaneta,' naa Cana Coaunerara."

naain beurelu rai nere bera inoaesihuru.

⁵¹ "Nete, leecha Cana Coaunera coitucuruhi rijijieein, nere tonorana jereneeichene jaun, urichosae rijijieein neeiche, aohana jereneeichene jaun. Aiha, inara inoaesihurune rijijieeinte, inara suujuatenea jeriha, Cana Coaunera Suujuene jana, aina nejeratein, aohana jereneeichera. ⁵²Satiin inara inoaesihurute, Cana Coaunera Ere bera inoaesihuru cairichaaeriin, sohin jaoorurejetelu. Jerichanejeein techu, nii turunaalucana coroatajaneraannu que Cana Coaunera letono turu beebejeurerane maajeein, sohin jaorelu nii inara inoaesihuru. Nii esinaae rauhijiriin, beeuruhane rijijieein turuhane janate, que nererojoeaain, nere aohana jerelanaala, colurujueein, sohin joeratein neinchelu- inara netonai. ⁵³Inara inoaesihurutejian niqui, laenanohineein Cana Coaunera Ere raurelu, laenaratein letono aanjera que, teratiha acaauru rai, Cana Coaunerane jaun. Nete tonorana jerecurenelu inara inoaesihuru. Nii inara netonai nihanatiin, tonorana jereneeichera," nae jetao acaauru rai Eseteba.

Eseteba sohin jaoruhane

⁵⁴Niritoha acaauru rai Esetebane jaun jetaote, obajeein, corajeein nujuae cari calaure. ⁵⁵Nejetaote, Cana Coaunera Suujue suujuatenojoeiein, najabaracaain dede coaraa Esetebane jana jetao, nejoraca dedene jaun jetao, Cana Coaunera coarae. Nitohanein coaraane jana jetaote, Cana Coaunera raotono nichajai que chujuheque Cana Coaunera Calaohi Jesoso. ⁵⁶Nii jaun jetaote:

"Coaracuhejian inara netonai. Nota, nejoraca dedene jana, Cana Coaunera raotono nichajai que chujuheque nii canaacha cohajeilu- Cacha Calaoheinein

nenea Jesosora,” naa acaauru rai Esetebane jana jetaote, ⁵⁷nuricho mucuutaain aohana jerelanaala, nujuaae soaisohaain, codoonetiin mucuure.

⁵⁸Nitohanein mucuhin jetaote, nii nese caje naain amaaain, acaauru cajione buuri rocohin jetao, leeinjiin cacha-Saoroneein curuajai que nii acaauru cajione buuri beraichateein jetao, ajeri que Eseteba bодоosiin sohin atinaaure-nii coulurujaeracuru. ⁵⁹Nitohanein, ajeri que bодоosijieeuruhane jana jetaote:

“Canu Curuaanaa Jesoso, cacorataaneun. Casuujue raaura,” naain Jesoso bajae Eseteba, rai suujue raane coina.

⁶⁰Niritohane baiha, semotorohaain auhaquiin:

“Canu Curuaanaa, jiaonriha catohanein caetein, naosateeuruhane ujuaiteei acaauru quenera,” naain inae ohe Eseteba.

8 ¹Nitohanein, Eseteba sohin jaoruhane jana jetaote, rautatelu nii Saoro.

Jesocurisito ranojihunru rohecaa Saorone

Nii bana caje coauneein nunuhetein jetaote, satiin, Jesocurisito Ere esenetaain tonoraeraauru aina nejeratein, cairichaaerihure Jerosaleeun. Nii jaun jetaote, ita caje riaanein, Jerosaleen caje soroore satiin Jesoso esenetaeraauru, Jodea batane sacutaain, satiin, Samaria batane sacutaainchuru cuhin soroore. Jana, nii afosotooruhacha jetaote, nii Jerosaleeun nedaaure.

²Nitohanein Eseteba atinaauruhane jana jetaote, mainajeein coisiin conaute-cure caohachaain rai suujua coaraain ichaonacaauru cachaauru tabaauru.

³Nii nainiha jetaote, Jesoso esenetaain- tonoraeraauru rohecaain,

lorerichuru naineein enohin, enecuru aina curuataain- quichaauru tararaain amaaain, caresero cuhane teratenajaain, cairichanajae Saoro.

Jesoso beebejeuruha Samariaune

⁴Nitohanein, rohecanajaauruhana jaun, nii Jerosaleen caje soronacaauru jetaote, turuuruna jaunru nainein, jianacoo osa caje- cana mitaeranein niha- Cana Coaunera Calaohi- Jesosone beebejeure. ⁵Nii jana, leinjiin acaauru caje nenea- Ferifi jetaote, nii Samaria batane que leeochoaauru nese amurijiriin nenea nese tabaihu cuhin jetao, inae cuu turuhin, cuu nenacaauru rai, Cana Coaunera Calaohi- Jesocurisito beebeje.

⁶Nitohanein cuu turuhin Jesocurisito beebejiha Ferifine jana jetaote, satiin netaajiaain, niicha beebejei rautatiin aonajeeure- cachaauru, chaen itolere cunaitenacaauru rautaane coaracuruhana jaun. ⁷Nitohanein jetaote, rai suujue cuhane coitucuchichuru sirichuruha tabaaurune, acaauru caje sitaane, auhaaahaquiin, acaauru caje amuure nii coitucuchuhichuru. Chaen jihurona-caauru nihanatiin jetaotechu, rautaain, bacosacuru nihanatiin- rautaa Ferifine jaun jetao, ⁸neebana nitohanai coaracuruha, nii neseuna jaun, cojoaelatiin coarajeein, rachoojoeure- satiin nii nere aonaa turunacaauru cachaauru.

⁹Nii jana jetaote, cuu ne- leeinjiin cacha- Simoon neein niicha curuaateeri- benane. Aca jetaote, batohi aina, Samaria cocoaichacuru coritae jetao, “Aca jete, itolere cacha amurijiriin, itolere que, jataain nelateeeinein ne,” naain esenetaauruha cachaaurune coina.

¹⁰Nitohanihane jaun jetaote, cocoaainacaihuri nihanatiin, coritaa, rai batohi ainana jaun, rautatiin esenetaain, aonacuruhane jaun: “Caa cachate, Cana Coaunera letono nera,” naure jetao, nii

Simoon que, satiin cachaauru, cocoaainacaihuri, naonjoaihunri.

¹¹Nitohaneein jetaote, enanecoriin que airijiin esenetaain tonoraure, rai batohi aina, acaauru coritaana jaun.

¹²Nete, nii saijieein Ferificha beebejei-Cana Coaunera Cojoanonaa, Cana Curuaanaa Jesocurisito, naonjoaain esenetaauruhana jaun, quichaauru, enecuru, naonjoaihunru- nebaotisaera-teeure. ¹³Nii jaun jetaote, nii- benane-Simoon netonai, esenetaain nebautisae-rateein, Ferifi corihaniha amuhemujue, itolere ichaain cojoelanaacojoai ichaa Ferifine coaraana jaun, cojoelatiin.

¹⁴Nitohaneein, inae Cana Coaunera beratenojoin esenetaain, tonoraauruha-Samaria cocoaichacurune coitucuhin jetaote, acaauru rene, Fedoro, Joaan, naonjoaihunri letoaaure- afosotooru-Jerosaleeun nenacaauru, nii Samaria nenacaauru coaraa cuuruhane coina.

¹⁵Nitohaneein, letoanajaauruhana jaun cuhin jetaote, acaauru rene turuhin, nii Jesocurisito esenetaain- tonoraeraauru rai, Cana Coaunera bajaauure, acaauru coroata-janeein, rai Suujue letoaa Cana Coaunerane coina, ¹⁶jaiti leeinjiinejeein-acaauru caje nena ichoae fauheniha-Cana Coaunera Suujuene jaun, raujiaaincha- Jesocurisito corenihacha-baotisaain cojounacatenohineeincha, neeuruhana jaun. ¹⁷Nii jaun jetaote, acaauru couturi ichoae, biji meracaain Cana Coaunera bajaauruha- Fedoro aina Joanne jana jetao, tajiha, acaauru ichoae fauha uhe, Cana Coaunera Suujue.

Nitohaneein jetaote, Cana Coaunera Suujue rauure- Samaria nenacaauru- Jesocurisito esenetaeraauru- cachaauru.

¹⁸Nitohaneein, acaauru ichoae, biji meracaain, Cana Coaunera bajaauruha afosotoorune jana, fauha uha, acaauru ichoae, Cana Coaunera Suujuene coarajihana jaun jetaote:

¹⁹“Carai netonai, nitohanai teeuchena, inara corete coriqui quete, chunicoacacha ichoae nihanatiin, cacoi meracaain, Cana Coaunera bajaanune, rai Suujue tiha Cana Coaunerane coinara,” naa acaauru rai Simoonne jana jetaote:

²⁰“Coaraain, nii ichoriqui aina jiniiquiin nitajeeura. Inacojoein chachu, ‘Coriqui que jecha, coretenacaine Cana Coauneraacha tenojoi,’ naai chachu inacojoeincha. ²¹Esinaae rauhijiriin, esenetaain nere tonoraeneeine jaunte, ichei nii tenaa nainene Cana Coaunerara. ²²Nii ishujua baaso jiaaneein, Cana Coaunera bajaauure, ichei suujua acatena nainihane, suujua acatemiin Cana Coaunerara. ²³Jataainte, banelanala necoelaain, osa tabai que nesaruhi rauhineerilanaalara,” naa Fedorona jaun jetao te:

²⁴“Atiin carai, Cana Coaunera bajaauure, nii aithine tocohaneein, chatohaneein caetein niha Cana Coaunerane coataara,” nae jetao, nii benane- Simoon, Fedoro rai.

²⁵Nitohaneein, nii Samaria neseeu, Cana Coaunera Ere beebejeeuruhane baiha jetaote, nii Samaria batane sacutaain nenacaauru- neseeu cuhe cujeein, Cana Coaunera Calaohi Jesocurisito que Erenaa Caohati beebejeeuruane baiha jetao, Jerosaleeun cauha cuure Fedoro, Joaan, Ferifi, naonjoaihunri.

**Ferifi aina, ita que tacaauruha
Etiopiha cocoaichane**

²⁶Nii baiha jetaote, rai letono aanjera que Ferifi letoerateein:

“Chajaain nimichuhin enoto mitu uuri- cana raotono nichajai jeloon cuhin, naain Jerosaleeun caje- Casau cunaa bero cuhane cunihura,” nae jetao, Cana Curuaanaa letono aanjera. Nii

bero naitoonjoate, cacha areroo jeloon situnaane. ²⁷Niritoha rai aanjerana jaun jetaote, nimihoritiin cuha Ferifine jana, bero cuhane leeinjiin cacha- Etiopiha cocoaicha aina, ita que tacaure. Nii Etiopiha cocoaicha jetaote, Etiopiha batane curuaanaa eneneein nenea rai-coriqiu beraichanein nenea ne. Aca jetaote, Jerosaleeun cuhin, Cana Coaunera coroaeejin bajaee bajaecane caje, ²⁸tajiha cabario que tararaerain nenea namunaja cuhane lauhequuin, Cana Coaunera ere bera inoaei Isaihasicha laenai quiricha ereretajeein cauha cue, jelaiha rai nataneu.

²⁹Nii jana jetaote, Ferifi rai: “Nii cacha rohan nichuutaain ereeura,” naa rai, Cana Coaunera Suujuena jaun jetao, ³⁰rohan nichuuntaa Ferifine jana jetao, Cana Coaunera Ere bera inoaei-Isaihasicha laenai quiricha ereretate- nii Etiopiha cocoaichane jana jetao:

“Nii iicha ereretai aonaaina, coitucuhi,” naain caje baja- Ferifine jana jetaote:

³¹“Aihaaunta. Cha cajena coitucuhin aohanreeunta. Niha chunei carai berane coalanaalata. Chajaaute iniin cau carohan nelauriaera,” naa Etiopiha cocoaichane jaun jetaote, ³²iniin nelauriaain, nii niicha ereretai jelai coaraa Ferifine jana jetao:

“Carenero chacuruhane rijijieeinte, amaa cuurureein, sooruhane caina. Nii rijijieein techu, nujuin saaujiha saaujichane jana inauhene aonajiha carenerone rijijieein, inauhene aonajenajaain, caohachanaaiejeein erenereein.

³³ Nitohaneente batohin joareein coulurujueein, cojoaisi aina ajaena rocohin jaonaa rijijieein, sohin jaoorureein.

Nitohaneein sohin jaooruhane jaun, nerihain rai neferate,” naain *profeta* Isaihasiacha laenailu ereretaain coaraane baiha jetaote, Ferifi caje:

³⁴“Atiin carai beeuna coitucuera. Cha quena aite, raaje ne quena aitoha caa Quiricha laenaera *profetate*, ainihane leeocho quena aitohate,” naain baja, nii Etiopiha cocoaichane jana jetaote:

³⁵“Jesoso sohin jaoorurichaaine quete aitera,” naain jetao, nii Cana Coaunera Quiricha Inoaei- Etiopiha cocoaichacha ereretai nunuhe caje coauneein nunuhetein jetao, Jesoso que Erenaa Caohati beebejiha Ferifine jana, ³⁶nihia acauna jaan rohan nichuuntaauruhana jaun jetaote, Ferifi rai:

“Caute ne acaura. Taacha nainereei, cau canu baotisaain, canu coujounacateineta,” naa nii curuaanaane jana jetaote:

³⁷“Ichoichana aina cutaain, esenetainete, naainera,” naa Ferifine jana jetao te:

“Cana Coaunera Calaoihi niha Jesocurisito ne esenetaanura,” naane jana jetao, ³⁸nii acauru amaera-cabario que taraeraneein nenea suraeratein, jiniiquiin fauhin, acauhana fauha cuure. Nitohaneein fauhin jetaote, baotisaa Ferifine jana jetao, ³⁹inae acau caje inihuruhane jana jetao, Ferifi amaa- Cana Coaunera Suujuene jaun jetao, inae coaraene- nii curuaanaa. Nejetaote, raotojoein, rachoojoein bero cuhane cuujue.

⁴⁰Nitohanein amaa Cana Coaunera Suujuene jaun, cuhin jetaote, Asotoo turuhe Ferifi. Nitohanein Asotoo turuhin jetao, caje coauneein, nunuhetein, nirijieein cuujue cuujeein, Sesareea turuhanereein tiaain, neseeuu neseeuu turunajaauru, Jesocurisito que Erenaa Caohati beebejeein, cuujue jetao Ferifi.

**Jesocurisito esenetaeraneein
nerotoha Saorone**

(Ich 22.6-16, 26.12-18)

9¹Nii tonohana jetaote, Cana Curuaanaa ere esenetaain, tonorae-raauru que, nejeratihajeein, atinanaana jereein sacuhane jaun jetao, saseredotecuru curuanaa coaraa cue Saoro, ²caje nitohanai ichana nainihane jaan-cocoiricha bajaane coina. Nii rai cocoiricha teuruhane, aina naain Damasoco cuhin, ucuaae nena ita taojiaain Cana Coaunera bajaauruhane jaan sinacoca asaee enohin, nii Ena Nena Ichaonaa esenetaain tonorae-raauru ariin, quichaauru aina curuataain, enecuru tararaain uhanajaa caseteconein Jerosaleeunne coina. ³Nejetaote, inae nitohanein ichaain cuujiha, Damasoco nese catainajeein, turuhelalajiha, Saorone jana jetao, luhecotariin conotiin, dede caje jilene Cana Coaunera Cono. ⁴Nii jaun jetaote, coasiha atane ichoae nalatoha Saorone jana jetao:

“Saoro, Saoro, chanuna jataain caque nejeratein, cacairichaerriin ichaohi,” naain toniha erenaane jana jetao:

⁵“Chaneei inate Curuaanaa,” naain bajaa Saorone jana jetaote:

“Canuna, nii nejerateine jaan neein iicha cairichaerii Jesoso neeunra. Canu esenetaeraauru cairichaa aaine nihanaatiinte ichaajenihane ijabereeo-cairichaa nii aacha,” naa jana jetaote, coasiha rijijijihanein: ⁶“Chatohanai ichacaunne jereite, Curuaanaa,” naain bajaa Saorone jana jetaote:

“Nimichuhin nichaauraaain, nii neseeu turunihunte, cuu ichei, iicha-ichanenenu beeuruhinera,” naain tonorae, nii erena.

⁷Niritohane jaun jetaote, nuricho que aonacuruha acaauru netonoaine jaun,

nesoonetoore, nii Saoro- corihaniha cunacauru cachaauru, nii erena aonacuruha natiin, nii chuni cacha coaracurenihana jaun. ⁸Nii jana, atane ichoae tochoa baiha nimichuhin, nenotaaain coaraa Saorone jana jetaote, caohachanainejeein conohene rai nota. Nii jaun jetaote, inae caohachanainejeein conoheniha rai notana jaun, rai biji que mucuhin, amaauruha Damasocone jana jetao, ⁹cuune nichata janohin, maosanein notaelanaala, nii lenonelanaala, nii acau nihanatiin coelanaala.

¹⁰Nitohanihane jana jetaote, nii Damasoco ichoae leeinjiin cacha-Ananihasineein curuajaain. Acate, Jesocurisito Ere esenetaain, tonoraera ne. Nii jetaote, notajae Cana Curuaanaa Jesocurisito, rai irihane coina. Nitohanein, notajaain jetaote:

“Ananihasi,” naain bajaane jana jetao: “Cauna neeura Curuaanaa,” naane jana jetaote:

¹¹“Chajaain nimichuhin, nii bero-Rauhijirinein curujai cuhane cuhin, Jodasi loreri asaee enohin, Taroso caje unaa leeinjiin cacha- Saoronein curujai bajaaura. Acate, Ofa- Cana Coaunera bajaebajaeane jana, notaacane jaun, ¹²coaraane jana, leeinjiin cacha- Ananihasineein curujai- turuhin, nichoae rai biji merecae, nacoaunein conoha rai notane coinara,” naa cana Curuaanaa Jesocurisito, Ananihasi raine jana jetaote:

¹³“Netejian, ‘Nechu aansai- ataibiaen rijijiein niha,’ beeurera. Nitohanihane jaun jete, Jerosaleeun, ii ere esenetaain-tonoraeraauru cairichaaerriin ne, naauruha, coitucueracuru natiinta.

¹⁴Coaraaunachuhinti, saseredote curuaanaa caje, niicha rocohi erena uhaa aina, satiin- ii ere tonoraeraauru mucuhin, caseteconein, amaain tiha,

saseredotecuru curuaanaa raine coinaneta, Curuaanaa,” naa Ananihasine jana jetaote:

¹⁵“Chajaancha cunihura. Nii cachana raain neeun, nejelau ataneu-nenacaauru rai nihanatiin, canu ere beebejeein nihane coinara, itolere, acaauru curuaanaacuru rai nihanatiin, canu ere beebejeein, chaen, Israaelitaauru raine maajeein beebejihane coinara. ¹⁶Acaentonaite, canu ere beebejihane coreniha, necairichanaa coaraa cureein, baneje lanaalara,” naain letoaa Cana Curuaanaane jaun jetaote, ¹⁷nii niha Saorone jaan- loreri asaae turuha cue Ananihasi. Cuu, loreri asaae turuhin jetao te, nichoae biji merecaain:

“Ichaso Saoro, nii uhina jaan bero cuhane, ichei ecoona Cana Curuaanaa Jesusote caletoe, ichoae cacohi merecaain bajaanune, enacoauneein conoha inotane, ii suujueniha enoha Cana Coanera Suujuene coinara,” naa Ananihasine ¹⁸rijieoritiin, jeranu nota caje naluha- ate reje rijiiinanaine jana jetaote, inae conoha rai notana jaun, nimichuhin nebaotisaerateein, inae cojounacatenohineein ne- Saoro. ¹⁹Nii baiha jetaote, inae lenoneein suujua nunaain, nii Damasoco nenacaauru- Jesocurisito ere esenetaain- tonoraeraauru aina ne, janojanoheriin.

**Damasoco Cana Curuaanaa
Jesoso Ere beebejiha Saorone**

²⁰Nii baiha jetaote, ita taojiaain- Cana Coanera bajaauruhane jaan- sinacoca asaae enohin, cachaauru rai, esinae rauhijiriin, Cana Coanera Calahineein niha Jesusone beebejiha Saorone jaun jetao, ²¹cojoelatiin coarajeein:

“Tajjian, caa cacha, Jerosaleeun, Jesoso aina cuaain Cana Coanera bajaebajaeracuru que nejerateein, cairichaaerinajaain nena nihaneta.

Tana, caa jeelai cacha coaiten cau turuhalu, Jesoso esenetaeraauru jitariin tararaain amanajaain, saseredotecuru curuaanaacuru rai tenajaane coina neta,” naaure jetao, cojoelatiin cuu nenacaauru cachaauru.

²²Ne jetaote, niritiin cojoelatooruhane jana, nii que rutaain nelararajiaain laraajiin, canaacha cohajei- Curisitoneein niha Jesusone beebejiha Saorone jaun jetao, rai suujua auhacaure Damasoco nenacaauru- Jorioocuru.

Jorioocuru caje, nichotiha Saorone

²³Nii nitohaneein araai janohin Damasoco niha Saorone jana jetaote, ita suujuau tacaain, Saoro sohin jaonaa jerecure Jorioocuru. ²⁴Ne jetaote, nii sohin jaonaa jerecuruhane coitucue Saoro. Nitoaneein, que necousuujaain jetaote, ajeri caje ichanohineein nena, nii nese tionoritiin nena rijia ucuuneti bacuujuaniha, janotiinetojoein beraain cohacure, mituha cuhane mucuhin amaain, sohin, jaooruhane coina niqui. ²⁵Ne jetaote, omari seeonjoa cuhane teein jetao, janotiin tijichaaain, loreri chaje nichajai que nii nese tionoritiin nena rijia bujuaniha faaure Jesocurisito ere esenetaain tonoraeraauru, nii nese caje mituhin nichotihane coina. Nitohaneein jetaote, onaa caje nichote Saoro.

Jerosaleeun turuha Saorone

²⁶Nii nitohaneein nichoteein jetaote, inae Jerosaleeun turuhin, cuu nenacaauru- Jesocurisito Ere esenetaain tonoraeraauru aina netaojiana jeriha Saorone jana jetao, coasiha netaojiana jerecurene, inae acaentonoain, Jesocurisito Ere esenetaain- tonoraeraaneein nihane coitucuhin esenetaaurenihana jaun.

²⁷Ne jetaote, afosotooru rene Saoro amaain: “Naaonjoaain jetaote, bero cuhane cuujihane jana jetao, notajaain, rai erelu Cana Curuaanaa Jesocurisitora. Nitohanihane baiha jetaote, chaque tonajelanaala, nii chaque casilanaala, nii Damasoco nenacaauru rai, Jesocurisito Ere beebejera,” naain acaauru rai, be Berenabeen.

²⁸Nitohanein acaauru rene turuaain, acaauru que coitucueratiha Berenabeenne jaun jetaote, inae raauruha raotojoein, nii Jerosaleeun nenacaauru afosotooruna jaun, cuu acaauru aina neein amuhemujeein, chaque tonajelanaala, cuu cachaauru rai, ²⁹Cana Curuaanaa Jesocurisito Ere que ereerejeein, Curieco ere inaauru Jorioocuru aina, ita cotaicha rijitiinchuru, ereereca Saorone jana jetao, sohin jaonaa jerecure, nii ita cotaicha rijitohane jaancuru- Jorioocuru.

³⁰Ne jetaote, nii sohin jaonaa jerecuruhane coitucuurin, Sesareeau, Saoro amaain jetao, caje coauneein Tarosoo letoaaure, Jesoso Ere esenetaeraauru.

³¹Nii inatiin jetaote, Jodea, Calileea, Samaria, naaonjoaihunri batanecuru nenacaauru que, Jesocurisito Ere esenetaain- tonoraeraauru, jeelai choae jauhecotojoeriin, raotojoein, nii baaso coacuelanaala, Cana Curuaanaa Jesoso Ere tonoraare, acaauru coroatajaniha, Cana Coaunera Suujuene aina nejeeotejeein.

Nerautaa Eneasine

³²Cajianein amuhemujeein, Jesocurisito Ere esenetaeraauru rene bedaenihane ucuatoha jetaote, Lidau nenacaauru- Jesocurisito Ere esenetaeraauru rene netonoai, turuha cue Fedoro. ³³Nii jana jetaote, cuu ne,

leeinjiin cacha- Eneasinein curuajai. Aca jetaote, fosa ajaanacaain, niirijeein amuelanaala, nenajauhacha tocoecochoa, mucuha jiuronane jaun jetao:

³⁴“Eneasi, Jesocurisitote ii rautareeincha. Chajaain nimichuhin, chela seriin amuunra,” naa Fedorone jana jetao, nii rijieeoritiin, nimichuhin nela seriin amue- Eneasi. ³⁵Nii aichejehenihane baiha nimichuhin, amuha Eneasine coaracuruha- satiin- Lidau nenacaauru, Saroon nenacaauru, naaonjoaihunrine janate, Cana Curuaanaa Jesocurisito ranojoihunru neein nerotojoacoaaure.

Oo caje ichanaa Dorocane

³⁶Nii bana jetaote, nii Jofe neseeu nelu, leeinjiin Jesocurisito Ere esenetaain- tonoraera- Tabita neein curuajai. “Tabita” naane jetaote, Curieco ere cuhane, Doroca ne. Nii ene jetaote, caohachanejeein- caohacha ene neein ichoae. Nii jetaote, chaaelai latecuruha cairichaurine, coroatajanein, naaonjoae. ³⁷Nirijeein, ne lacuritiin jetaote, cunaiteein. Inae caun ohane jaun jetao, rai jabereco culejeein, naain ucuun nena lorero coroata coarana ichoae- ucuha cuhane, rai jabereco rucujeein teeure. ³⁸Nii jana, Jofeu caje, coriaae neniha, nii niha Fedorone jaan- Lidane jaun jetaote, cuu niha Fedorone coitucuuruha Jesocurisito Ere esenetaeraaurune jaun jetao, coroatajai cacha letoaaure:

“Chajaau jera, Jofeu luhecotariincha,” naauruha rene turuhine jaun jetaote, ³⁹acaauru aina cue Fedoro. Inae nii niha ene jaberecone jaan turuhin niha Fedorone jana jetaote, curuaacaain codohaquiin chanaain, Fedoro que, jaiti ichaohane bana- acaauru cajione niicha tococoi- acaauru rai niicha tei obirichurune maajeein coarateure-

autanaauru. ⁴⁰Nii jana jetaote, jelai caje jitariin mitanajaain, nii ene jabereco rohan, neseonraain jetao, Cana Coaunera bajaain, nii ene jabereco coarajeein jetao:

“Chajaain, nimichuura, Tabita,” naa Fedorone jana jetaote, nota toretaain Fedoro coaraain, nelauhitohane jetao, ⁴¹rai biji que mucuhin, michuhitoha Fedorone jana, nichaauraane jana jetao, satiin Cana Curuaanaa Jesocurisito Ere esenetaerauru, satiin, nii autanaauru aina curuataain, cotihanajaain jetao, jabereconein chujuriaain acaauru que coarate- Fedoro. ⁴²Nii nitohanihane coitucuhin jetaote, Cana Curuaanaa Jesocurisito Ere esenetaain tonoraare-nii Jofe neseu nenacaauru- arajiin cachaauru. ⁴³Nitohaneeinte, araaï janohin, nii neseu ne Fedoro, canii cari rucuhera- Simoonneein curuajai cacha loreri asaae.

Corenerio aina, Fedorone

10 ¹Nii jana jetaote ne, leeinjiin cacha, soondarooru curuaanaa-Corenerioneein curuajaain, Sesareea neseu. Nii jetaote, saota fashanei Romanocuru soondarooru, Italia cocoaicha neein acaauruhacha curuaatei, lefashai- curuaanaa cafitaan neein ne. ²Aca jetaote, niqui Romanoneein ne. Nejetaote, atiin rai sinijiera, rai bereecuru naaonjoaihunri aina jiniiquiin, jataain Cana Coaunera ere tonoraeraauru ne. Aca jetaote, cairichainein nenacaauru- Jorioocuru rai nihane, coriqi nihane tee tejeein, coroatajanenajae. Chaen jetaotechu, inetono janonaa bana, Cana Coaunera bajaebajajeein ne. ³Nii jaun jetaote, letono anjera que, coarate Cana Coaunera, sona nichae.

Nii jana jetaote, coarajihane jana, nii nihane jaun turuhin enohin:

“Corenerio,” naa nacatiha turuhine jana jetao, ⁴cuu anjera coaraain, nesoone-tiin:

“Cha ichei ichareeunte, Curuaanaa,” naain tonoraa Corenerione jana jetaote:

“Bajaebajajeein neeine aonaa Cana Coaunerara. Chaen techu, cairichaihuru coroatajaneine coaraain, satiin caohacha ichaaine rautate- Cana Coaunerara. ⁵Aihana jaun, Jofeu cacha letoaute, leeinjiin cacha- Simoonneein curuajaain nena- Fedoro cotihaca cuhinera. ⁶Nii cuu nena cucuana auhaniha loreriquiin nena- jacari nojoenlaain rucuhera rijitocojoai curuajai- leeocha Simoon loreri asaete nera,” nae jetao, rai Cana Coaunera letono anjera.

⁷Niritohane baiha, inae amuha nii aina erena- Cana Coaunera letono anjerane jana jetaote, coroatajai nere tonoraeraauru, chaen leeinjiin soondaro- Cana Coaunera ere tonoraain-jataain Cana Coaunera coitucuera rai suujua rijitoejein nena niichuru cotijiaain jetao, ⁸rai aitoha Cana Coaunera letono- anjerane bee jetao, Corenerio. Nitohanein, acaauru rai bihane baiha jetaote, letoanajae Jofeu.

⁹Nii cojoano jetaote, enoto chujutae-lalajeein, turuelalajeein cuujueeruha, Jofeune jana jetao, loreri janori macararo ichoae, ucuun iniha cue jetao, Fedoro, cuu Cana Coaunera bajaane coina.

¹⁰Nii jana jetaote, rai banetojoe niha mijiiitenane jaun jetao, lenonene rijitocojoaain jetao, Cana Coaunera bajae, lenone enohalaauruha icharaaurune cohaca. Nii jana jetaote, notaaca Cana Coaunerane coina, ¹¹nejoracaa dede bacuujuane jana jetao, caje mituha uhe, shojoera tocohanein- jaraantiin. Nitohanein ecocohin jetaote, tajiha fauha uhe, jena turiin rulunojohinee.

¹²Nii jana, coaraane jana jetaote, nii shojoera tocohanai nainecojoaain jetao, uhe itolere cautenu rijihuru, atane ichoae terei lenone, itolere tajaecuru, itolere ataibinaae acanocuru, itolere Jorionecuruhane lenone niheichuru, naaonjoaihunri jetao, uhe nainecojoaain. ¹³Nii jana jetaote, coarajihane jana jetao dedeu toniin:

“Nimichuhin nichaauraaain, niichuru soote que lenoneicha Fedoro,” naain toniha dedeune jana jetaote:

¹⁴“Chabana, Jorionichaanune lenone-nihei quinaa nainihaaunta, lanichana nainihaaunta. Nihei ataibinaae quinaa nainihaaunta, Curuaanaa,” naain tonoraa Fedorone jana jetaote:

¹⁵“Coa Cana Coauneraacha, couluu-nojoi que, ‘Calanichareta. Ataibinaae quinaa nainihaaunta.’ naain irihara. Jauriaate chuhisi niqui, nainenelu que lenonequichenera, nete inae enene, que lenonena nainequichene coina couluu-nojoinera. Aihana jaun, Cana Coauneraacha coulucohi que, nainihein niritiin ereeineta,” naain jetao, dedeu toni. ¹⁶Nitohaneein nichata saain ecoocane baiha jetaote, inae jelaiha dedeu iniha cue, nii shojoera tocohanai.

¹⁷Nii jaun jetaote, nii que suujua rohecaain, cuu suujuaau ereerejeein, “Chatohanai ichacaunne coinacha, catohaneein canotajae Cana Curuaanaata.” naain suujuaau ereereeca Fedorone jana jetaote, turuure acujuaniha nichatajai cachaauru Corenerio letonocuru, Simoon loreri bajaebajajeein. ¹⁸Turuhin jetaote, acujuaniha netiin jetao, tonijiaain:

“Cauna niha caa loreri asaae, leeinjiin cacha- Simoon- Fedoroneein acaauruhacha curuaatei,” naain jetao bajaare.

¹⁹Nii jana jetaote, cuu jaiti, nii rene ecoona que suujuaau ereereeca Fedorone jana jetao:

“Aonaaun, nichatajai cachaaurute ii ariirijiera. ²⁰Chajaain nimichuhin, acaauru aina cunihu necoatelanaalara. Canuna acaauru letoaaun ii renera,” nae jetao, nuricho rai Cana Coaunera Suujue.

²¹Nii jaun jetaote, fauhin nii Corenerio letonocuru- cachaauru coaraain jetao:

“Canuna- nii inaraacha ariirijiei neeunra. Chate raacheta,” naa Fedorone jana jetaote:

²²“Canacaanu letoaa, canacaanu curuaanaa cafitaan Corenerione jaunne, uhacaanura. Acate, caohacha cachanein, jataain Cana Coaunera ere tonoraeranera. Nii jaunte, jataain que suujua acatein, belaihure satin Jorioocurura. Acate, ii cotiharate, rai beein, que ii cotiharatiha Cana Coaunera letono- anjerana jaunra. Nii jaunne, ii cotihaca uhacaanu, nenajaun cuhin, iicha coitucui que rai ereeine, aonaane coinara,” naure jetao, Fedoro rai.

²³Niritocuruhane jaun jetaote, nii notaaca Cana Coaunerane que nainain jetao, nii nihanejaan loreri asaae ranajae Fedoro, Jorionecureniha nii cachaaurune saijjeein. Nii jaun jetaote, cuu aina sinihuruhane cojoanoon, cauha cuuruhane jana jetao, acaauru aina cue Fedoro, corianiha cunacaauru- Jofeu neseeu nenacaauru tabaauru- Jesocurisis esenetaeraauru aina.

²⁴Nitohaneein cuhin jetaote, cojoanoo Sesaree turuha cuure.

Nii jana jetaote, le laurii naraichuru, jataain belaichaauru, naaonjoaihunri cotijiaain, acaauru cojoae- Corenerio.

²⁵Inae turuha Fedorone jana jetaote, mituhin raain jetao, nacatiha neseonraain coroaeca Corenerione jana jetaote:

²⁶“Nichaauraura. Canu netonaina, ichejijieein cachanein neeunra,” naain

michuha Fedorone jaun jetaote,
²⁷ereerejeein, enoha cuuruhane jana,
 cuu najiniha netaojiaain cohacure arajii
 cachaauru. ²⁸Nii jaun jetaote, acaauru
 rai:

“Inarate raotojoeein coitucuhiche,
 canacaanu Jorionichaanune, nejelau
 cachaauru Jorioniheichuru aina,
 netaojiaain nena nainenihacaanunera.
 Niheichu. Nejelau cacha loreri asaae
 enonaa nainihaacaanuta, nitohane niha
 canacaanu ichaona jaunta. Nete, nii
 que, canu notajaain carelae Cana
 Coaunera, nabana chunein cacha que
 jaolequiin, ‘Nechu aansai ataibinaae,’
 naain irihanu chunein nejelau
 cachaauru quene coataara. ²⁹Nii jaunna,
 cacotijiaaichene rijijieein inauheneecha,
 cha que erelanaala uunra. Nii jaunna,
 ‘Chanunacha cacotijiaaureta.’ naain,
 coitucunaa jerichaaunne jaun, carai
 beeichene jereeurra,” naain jetao,
 acaauru caje baja Fedoro.

³⁰Nii jaun jetaote:

“Inae, jena janoha, enarijuu, cau canu
 loreri asaae, cosinacaa casuri couu,
 canu ichaoneein Cana Coaunera
 bajaebajaecaaun sonainane jana, jataain
 somajai que, cajionequiin, cau, caatiha
 neeorite- leeinjiin cachara. ³¹Nii
 cachate, carai: ‘Corenerio, bajaebajae-
 quine aonaa- Cana Coaunerara. Chaen
 techu, cairichaihuri coroatajaneeine
 coarajeein, nii coacuhin coroaje Cana
 Coaunerara. ³²Nitohanihane jaun,
 cachaauru letoaaute, Jofeu, Simoon-
 neein curuajaain nena Fedoro cotihaca
 cuuruhinera. Nii cucuana auhaniha,
 loreriquiin, cuu nena jacari nojoelaain
 rucuhera rijitocojoai curuajai- leocha
 Simoon loreri asaete nera.’ naa carai
 nii cachara. ³³Nii jaunne, nii rijieeoritiin
 ii cotiharateeurra. Caohachate jataain
 ichaai uhincha. Aihana jaun, caute
 jiniiquiin, Cana Coaunera notaracae

nihacachera. Nii jaunna, canacaanu rai
 Cana Coauneraacha beratei que, ereeine
 aohana jerichaanura,” naain jetao,
 Fedoro tonorae Corenerio.

**Nereretaa, Corenerio
 loreri asaae, Fedorone**

³⁴Nii jaun jetaote, acaauru rai:

“Inae laen coitucuhane, coatia
 nejelauneein, chunein cachaauru
 coaraain nihein, Cana Coaunerata.
³⁵Jerichanejeeinte, satiin coaraain,
 naain coriajai ataneeu nenacaauru
 nihanatiin, nere tonoraane, rae Cana
 Coaunerara, caohacha ichaain
 neeuruhanera. ³⁶Nitohanihane coina,
 Israeli inamacooru rai, baaso ichaain,
 Cana Coaunera que nejeratena neein,
 niha cachane niha natiin, niha leeinjiin,
 nii rucuhera, raotojoeein neeuruha Cana
 Coaunera aina cachaaurune que
 beratelu Cana Coaunerara. Acate,
 Jesocurisitoneein- satiin Curuaanaa-
 neein nena nera. ³⁷⁻³⁸Inarate,
 cachaauru rai, baaso ichaain
 neeuruhane jianein, nebaotisaerateeu-
 ruhane, raotojoeein acaauru raa Cana
 Coaunerane coina, biha Joanne
 coitucuhiche raotojoeincha. Nii
 baihate, Nasarete cocoaicha- Jesoso
 baotisaa Joanne jana, nii Jesoso
 ichoae, rai Suujue letoaa Cana
 Coaunera, itolere ichaain nena
 nainihane coinane coitucuhiche. Nitoha-
 neein baotisaa Joanne caje
 coaaneeeinte, Jodea batane sacutaain,
 amuhemujuelu Jesoso, Calileea nunuhe-
 teeinte, itolere caohacha ichaain,
 moconajaera ichanohineein cunaiteein
 necairichanacaaurune maajejin
 rautaelura.

³⁹Nii jana, canacaanune, itolere
 ichaain niha Jesusone coaraneein
 nihacaanu, aina amuhemuecaanulu,
 itolere Jodea batane sacutaain,

Jerosaleeun nese sacutaain, naaonjoaina jaunra. Nitohanihane baihate, inae coroso que teein atinaaurelura. ⁴⁰Nete, atinaaauruhane jana, nichata jano cuhane, ichatelu Cana Coaunerara. Nitohaneein ichateeinte, canacaanu rai, ecoocane coina, letoae Cana Coaunerara. ⁴¹Coatia, satiiin cacha rai, ecoohai. Leeinjiin canacaanu- Cana Coauneraacha janijii nii beraanu que-niicha ranojoi nichaanune raiichate ecocoera. Nitohaneein oo caje ichanaa Jesusone baihana, aina lenoneein, aina acau cohacaanura. Inae inoaelu, nitohanihane coina, Cana Coauneraacha ranojohineein nihacaanulune jaunte, ⁴²canacaanu letoae, itolere ichaonacaauru, onacaauru, naaonjoaihunri coaraanu que- nii Jesoso teein nihalu Cana Coaunerane beebejihacaanu, cachaauru raine coinara. ⁴³Chaen techu, inoaelu najiincha caje coauneein, nii Jesoso beebejeretocure, nere bera inoaesihuru: ‘Nere tonoraain esenetaeraaurute, baaso ichacuruhalune niha natiin, coreniha caseteco caje nichotiha cureeincha.’ naain beratihalu, nere bere inoaesihuru *profetacuru* que, aitiin Cana Coaunerane jaunra,” naain jetaote, acaauru rai beebeje- Fedoro.

**Cana Coaunera Suujue raauruha
Jorioniheichuru netonaine**

⁴⁴Nii jana jaiti niritiin beebejiha Fedorone jana jetaote, nii satiiin nere aonajeerera choae, fauha uhe Cana Coaunera Suujue. ⁴⁵Nii jaun jetaote, coarajeiin cojoaelatoore, nii Fedoro aina unacaauru- Jesocurisito esenetaeraauru- Jorioocuru, Jorioniheinchuru rai netonai, tenojoi niha Cana Coaunera Suujuene jaun, ⁴⁶chaen, Cana Coaunera coroaecuruha, nejelau ere cuhane cuaain- nejelau ere que erenacaaurune jaun. Nii jaun jetaote:

⁴⁷“Nainihaacache cana, caa cachaauru baotisaain coujunacatechachene, Joriooneeurenihane jaunneti.’ naain erenaa nainihaacache cana, inae cana rijijijeein, Cana Coaunera Suujue que, coujunacatenohineein neeuruhane jaunta,” naa Fedoro nii corihaniha cunacaauru Jorioocuru raine baiha jetaote:

⁴⁸“Jesocurisito coreniha, baotisaain coujunacatenohineein neeuruhinera,” nae jetao, acaauru rai Fedoro. Nii jaun jetaote, nii baiha, Fedoro chunaature, acaauru aina, inata janojoein neeorihane coina.

**“Chanuna Jorioniheichuru aina
lenoneei,” naain Jerosaleeun nenacaauru
Jesocurisito ranojoinunru Jorioocuru
tabaaurune**

11 ¹Jodea bataneu netiin jetaote, inae Cana Coaunera ere esenetaain tonoraauruha Jorioniheichuru netonaine coitucure Jesocurisito letonocuru afosotooru aina- cana nejeraauru Jesocurisito ranojoihunru. ²Nitohaneein coitucuuruhane jaun jetaote, inae Jerosaleeun turuha Fedorone jana jetao, necoejechanuure- Jorioneein Jesocurisito ranojoihunru tabaauru. Niritiin necoejechanuhin jetaote:

³“Chanute cocoaeraa- cana Jorionichaachene ichao rai, Jorioniheichuru rene turuhin, acaauru aina, naaonjoaacachene natiin- acaauru aina lenoneeita,” naain bajaure jetao, Fedoro caje.

⁴Nii jaun jetaote, satiiin niicha coaraai bee jitariin nunue caje coaunein:

⁵“Naain nii Jofe neseu nihanune jaaunna niqui, Cana Coaunera bajaunra. Nii jana, canu notaaca Cana Coaunerane jana coaracaanne janate, shojoera tocohaneei jaraantiin, jenaain

rulunojohineein dede caje faauha uhe caatiha, nii nihanune jaunra. ⁶Nii jana, rautaan cuhanai coaracaanne janate, cuu ne, itolere atabinaaecuru, atane ichoae terei lenone, tajaecuru, acanocuru naaonjoaaurincha. ⁷Nii janate, carai dedeeu tonii: ‘Chajaa-joaain nimioritiin, soote que lenoneeicha.’ naane janana: ⁸‘Jiaohinera, Curuaanaa. Chabana cujuaae cuhane aansai calaani enohaaunta.’ naanune janate, ⁹dedeeu toniin: ‘Coaa, “Aansai calaani,” naain iriha, ii coauneraacha coulucohi quera.’ naain ¹⁰toniha nichata saain dedeeune janate, jelaaiha dedeeu iniha cue- nii shojoera tocohanaicha. ¹¹Nii rijieoritiinte turuure, Sesareea caje uhin, nichatajai canu ariha unacaauru cachaauru, nii nihacaanunejaan loreri asaera. ¹²Nii janate, caletoae Cana Coaunera Suujue, necoatoelanaala acaauru aina cuhanune coinara. Nii janate, canu aina cuure caa saotaneein Jesocurisito coreniha- cana nejeraauru. Nitohaneein cuhina, Sesareea turuhin, nii canu coitihaca unacaauru letoaera- cacha loreri asaae enohacaanu saaincha. ¹³Nii janate, canacaanu rai: ‘Naaajoaainte, cau ecocoe Cana Coaunera letono aanjerara. Caute chujuhequuin, “Cachaauru letoaa Jofe neseeute, Simoonneein curuajai- Fedoroneein acaauruhacha curuaatei cotihaca cuuruhinera. ¹⁴Acate, ‘Naaonjoaain neeute, satii, isinejiera, charaai- churu, ichoerejeeuru, naaonjoaihunri aina, raotojoein jianaacoo neeincha.’ naain ichei bereeincha,” ’ naa canaacaanu raine naainaa- nii loreri erorane jana, ¹⁵acaauru rai irihanune nunuetihanune janate, acaauru chochae fauha uhe Cana Coaunera Suujue, cana chohae fauha uhalune rijijieeincha. ¹⁶Nii janate casuujuanaha neeorite,

‘Acau quete niqui cacha camujuuain, cacha coujounacate Joaanra. Nete inara laaen Cana Coaunera Suujue que, coujunacatenohi niha curiquicheeincha.’ naain aitohalu Cana Curuaanaa Jesocurisito nera. ¹⁷Aihana jaun, Jesocurisito esenetaacachene jana, cana rai rai Suujue tihane rijijieein, leeochoaauru rai netonai, rai Suujue tiha Cana Coaunerane, nainihaaun nii caohatera rijitiin, irihanu canu neta. Chaneaina nereun canu, Cana Coaunera colaihaje cuaain, nii caohatera rijitiin irihanuneta,” naa Fedorone janate, ¹⁸inauhene cuuraato- raain, cuu aonajeeure nii Jerosaleeun nenacaauru- Jesocurisito coreniha cana nejeraauru.

Nitohaneein aonajeeuruhane baihate, Cana Coaunera coroaecure, “Caohacha quete, Jorioniheichuru netonai coroata- jane Cana Coaunera, acaauru netonai suujua coreein ichaonaa- chabana nitajenaa charanejeein nena raauruhane coinara.” naain.

Antioquiha neseeu Jesocurisito ranojoneein nenacaauru

¹⁹Eseteba sohin jaoruhane baiha neeorinte, leeochoaauru Jesocurisito esenetaeraauru netonai ariin, rohecaare. Nii jaun jetaote tabaauru Jodea batane caje sorohin, Fenisiau, chaen Chifereu, Antioquihau, naaonjoaihun- cuhinchuru sorohacoaare. Nii cuhin sororuhane jauncuru turuhin jetaote, leeinjiin Jorioocuru raiicha Jesocurisito beebejeein, que relanajaare. Coatia jetao laen, leeocho cachaauru- Jorioniheichuru relaauruhi. ²⁰Ne jetaote, nii baiha, Chifereu, Sireneu naaonjoaihun nenacaauru- Jesocurisito esenetaeraauru tabaauru, nii Antioquiha neseeu turuure. Cuu turuhin jetaote, nii

cuu nenacaauru Jorioniheinichuru rai, Cana Curuaanaa Jesoso que Erenaa Caohati beebejeein, que acaauru relaare. ²¹Nii aina, acaauru coroatajaniha Cana Coaunera Suujuene jaun jetaote, jauriaa acaauruhacha esenetai jianeein, Jesocurisito esenetaare arajii cachaauru.

²²Nii coitucuuriin jetaote, “Chatohaneeruhachata,” naain Antioquihau Berenabeen letoaare, Jerosaleeun nenacaauru- Jesocurisito ranojoihunru. ²³Inae Antioquihau turuhin, acaauru coaracuruhane jana jetaote, caohatiin acaauru coroatajaniha Cana Coaunerane coaraana jaun jetao, jataain coroaaje Berenabeen. Nitohaneein coroaeeinte, esinae rauhijiriin Jesocurisito esenetaain, baaso coacuelanaala esinae rauhijiriin nere tonoraauruhane coina, sujuatenajae Berenabeen. ²⁴Caohacha cachaneein, Cana Coaunera Suujue que suujuequiin, jataain Jesocurisito esenetaera nihana jaunte, nitohane Berenabeen. Nitohaneein jetaote suujua corein Jesocurisito ranojoinunru aina neure arajii cachaauru.

²⁵Nii baiha jetaote, Tarosoo cue Berenabeen, Saoro arihane coina. ²⁶Nitohaneein cuhin jetaote, cuu eruhin, amae Antioquihau. Cuu jetaote neurelu, itolereenein lejaanacaain, cuu nenacaauru Jesocurisito ranojoihunru aina cuu nenacaauru cachaauru relaa. Nii Antioquihau jetaote, jauriaanejeein, “Curisitianoneein” Jesocurisito ranojoihunru curuaateeruhane nunuheteurelu.

²⁷Nii bana jetaote, Jerosaleeun caje cuhin, Antioquihau turuha cuure-*profetacuru* tabaauru. ²⁸Niichuru taba-Acaboneein curajai jetaote, ita taojiaauruha Jesocurisito esenetaeraaurune jana, acaauru cataaun nichaauraaain:

“Aonacuchena, inara rai caa bete, coitucuhichera. Nerinaain jetao

carajaaajoaain quinacai, Jodea batane sacutaainta,” naain be nii Acabo, que beratiha Cana Coaunera Suujuene jaun.

Nii mijitena jetaote nelu, Romanocuru curuaanaacuru- curuaanaa niha enferadoro- Culaodione bana. ²⁹Nii niritoha Acabone jaun jetaote, naain Jodea nenacaauru Jesocurisito coreniha cana nejeraauru- coroatajana jerecure, nii Antioquihau nenacaauru Jesocurisito esenetaeraauru. Nitohaneinte, ita jeeonijianaain coriqui teein, taojiaaure, le cachaauru cachaauru caje, tenaa nainecuruhane rijiinanaain.

³⁰Nitohaneein taojiaain jetaote, nii Jodea nenacaauru Jesocurisito esenetaeraauru- bichauhenaauru rai letoaare, Berenabeen, Saoro, naaonjoihunru aina.

**Saantiaao sohin jaohinte, caresero
cuhane Fedoro enohaare.**

12 ¹Nii bana jetaote, Jesocurisito ranojoinunru aina nejeratihane nunuhetein, tabaauru mucuerate jetao, Israelitaauru curuaanaa *rey* Erodesi. ²Nitohaneein jetaote, sabere que, Joaan nejera Saantiaao sohin joerate. ³Nii rautatiin, coaracuruha Jorioocurune jaun jetaote, Fedoro netonai mucuerate Erodesi. Jorerera colane ichanohin- faan quihurhane jaan- beseta cojoanonaa-curu bana jetaote, nitohaneein Fedoro mucuure. ⁴Nii mucuheratein raeratihane baiha jetaote, Fedoro enoaerate caresero cuhane- Erodesi. Nitohaneein caresero cuhane enoaeratein jetaote, caohatiin beraichate. Jena lauriin, janaanain, nenacaauru soondarooru que, ita roherererojoein caohatiin beraihuruha le laurichuru cajene coina, letoanajae, nii Fasocoo beseta bitohariin, satiin coarajeurera notaracae, caresero caje rochin, coaraain chatohaneein teuruhane

coina. ⁵Nitohanein caresero cuhane caohatiin beraichaain niha Fedorone tonohanau jetaote, ita taojiaain, rai Cana Coaunera bajaure mainajein Jesocurisito ranojoihunru.

**Caresero Cajé Fedoro mitaa
Cana Coaunerane**

⁶Nii jaun jetaote, eresinejeeonriin lanajeeca, satii coarajiha cachane notaracae, chatothanein Fedoro tihanerai niha- Erosesine jana jetao, coroatajai soondarooru cataaun, jeranu *cadena* que cosiin sinitoha Fedorone jana, acujua nihacuru neein- beraihu-ruha soondaroorune jana jetaote, ⁷⁻⁸rai letono- anjera letoae jetao, Cana Coaunera. Nii jaun jetaote, luhecotariin, Fedoro rohan neeoritoha Cana Coaunera letono anjerane jana jetao, jiiichoo rijijieein conoe, caresero cuhane. Nii jana jetaote, sinitoha Fedorone jana, jaleri dada dadariin nocoain jetao:

“Chajaain nimiichuura,” naa Cana Coaunera letono anjera, Fedoro raine rijieeoritiin jetao, rai biji caje nejasaja-sariha- nii biji ichora *cadenane* jana jetao: “Chajaaajoaain nimioritiin ichajione jiaain, ii safato jiaain, canu jiniichotaaura,” naa, nii Cana Coaunera letono- anjerane jana jetaote, nii aithane rijijieein jiniichotae jetao, Fedoro.

⁹Nitohanein jetaote, mituha cue, Cana Coaunera letono- anjera caajie cuhin, coetacainein cuhin, mituha cuhane esenetaelanaala, “Nechu jataaen sini anuu jecha aite.” naain. ¹⁰Nitohanein cuhin jetaote, jaurihaanejeein acujua beraicha caje situure. Nii leeocho caje situhin jetaote, nii coata que bacuujuana jaun, turuuruhane jana jetao, raajenihane neyoracae, nii coata que bacuujuanaa, naain aerene nenea enonaanaja rijia bacuujuua. Nitohanein

mituhin, le cocoaantaain bero cuhane cuujueeru baiha jetaote, jelai Fedoro ratiriin amuhe- Cana Coaunera letono anjera.

¹¹Nii jaun jetaote, nainacori Fedoro. Nainacoriin jetaote: “Esinaaete, rauhijiriin letono anjera letoae- Cana Coaunera. Jataain caque necosuujuaain, canasineene rijitoha Erosesi aina Jorioocurune janate, nabana chatohanein caetecuruhane coataa, letono anjera letoae Cana Coaunera, canu ichoteratihane coinara,” nae jetao Fedoro.

¹²Nitohanein, inae nainaan jetaote, Joan Maroconein curuajai- neba-Mariha rene turuha cue. Nii jana jetaote, cuu najiniha, nii Mariha loreri asaae, ita taojiaain, Cana Coaunera baja neure arajii cachaauru. ¹³Nii jana jetaote turuhin, nii aerene nenea enonaanaja rijia acujua faofaorihane jana jetao: “Cha cha aite,” naain, coaraa cue leeiinjiin ranuna Rodee. ¹⁴Nii jetaote, Fedoro ere nihane aonaain jetao, coroaena caun jetao, nii acujua joracae lanaala soroneein biha cue: “Fedorote aitera,” naain. ¹⁵Nii jana jetaote: “Esinaaenna aithohite,” naauruhane jana jetao:

“Esinae rauhijiriin acate aicha,” naane jana jetao:

“Rai suujuete jerihane ai caihara,” naaure.

¹⁶Nii tonohanau jetaote, nii acujua- niha neein, nii acujua faofaonijianaee, acaauru bajaebajajeein Fedoro. Nii jaun jetaote, nii acujua joracaaain coacuruhane jana, esinaae aca nihana jaun, cuu nesoonetiin coarajeeure. ¹⁷Nii jana jetaote, acaauru rai, biji sarasarari, nabana tonaain ereeuruhane coataa. Nitohanein jetaote:

“Naaonjoainte, caresero caje, canu mitaeratein, canu ichoterate, Cana

Coaunerara. Caritiin, Saantiaao rai benichuchera. Satiin, cana nejeraauru- Jesocurisito coitucuurera rai netonai beeuchete, coitucuuruhinera,” naain beratihane baiha jetaote, jelai caje mituhin jetao, amuhe Fedoro.

¹⁸Nii jana jetaote, jano jana, cuu neniha Fedorona jaun, nesoonetiin: “Cha quena nerurujuae, caa aansai,” naain jetao, acaauru suujua auhacaain nererojoeaure- nii beraihurera- soondarooru. ¹⁹Nitohanein, nenihaana jaun jetaote, arihuruhaneein coina, acaauru letoaa- nii curuaanaa Erodeseine jana, nitohanein Fedoro arihuruhaneein jana, ruurenihana jaun, nii beraihurera choae nalutiaain jetao, acaauru sohin joerate jetao Erodese. Nii baiha jetaote, nii Jodea batane caje mituhin Sesareeau ichaoha cue jetao Erodese.

Oha Erodeseine

²⁰Tiro, Sidoon, naaonjoaain cocoaichacuru aina jetaote, niqii obaje Isaraelitaauru curuaanaa rey Erodese. Nii jana jetaote, ita suujuau tacaain:

“Coanete, atiin rene turuhin raotojoein erenaa neeiner,” naain jetao, jaurihaanejeein, nii que jauri- nere tonoraera Balasito rene turuhin jetao, ereuree nii curuaanaa Erodese rai, nii Erodeseiicha beraai atane cajecha quinacai raajeein ichaauruha, nii Tiro, Sidoon naaonjoaain cocoaichacurune jaun. Nii jaun jetaote, nii curuaanaa Erodese rai:

“Coanete, nii cachaauru coroaatjana nena neeiner,” naa nii Erodese que jaurii- Balasito najaun jetao, ²¹“Bana- jian uunite coana neeiner,” nae jetao, nii curuaanaa Erodese. Nii jaun jetaote, nii aitohane bana, rene netaojiaauruhane jana jetaote, curuaanaa nihane cajione jiaain jetao, nii curuaanaa nihane nelauriana jaan- rori choae

nelauriaain jetao, ereereje Erodese. ²²Nii jana jetaote:

“Coatia caritiin erenaa nainihei, cana rijijieein cachata. Caate cana chosinera,” naaure jetao, eehequuin satiin nii cuu nere aonajeeurera cachaauru, nechu jataain acaauru belaiha Erodeseine coina. ²³Nii jana, coroaeca Erodeseine jaun jetaote, nii rijieeoritiin, letono anjera letoae- Cana Coaunera, nichoae cunai nalutiaane coina. Nii jaun jetaote, cunaiteein corianohin rihano jitanojooinein ohe, Cana Coaunera nujuaneein coroaeca ne jaun.

²⁴Nii jana jetaote, inae jelai amuritheriin, Cana Coaunera ere coitucuhajeein cuujueeure cachaauru, itolere sacutaain, amuhemujueein beebjeeuruhana jaun.

²⁵Nii jana jetaote, inae Jerosaleeun, niicha ichanenu nainaauruha najaun jetao, Antioquiha cauha cuure, Berenabeen aina- Saorocuru, acaauru jiniichaain “Maroco” naain acaauruhacha curuaatei- Joaan amaain.

Letononeein amuhemujueein, Jesocurisito beebjeeuruhane nunueteeruha- Berenabeen aina Saorone

13 ¹Nihalu jetao, Antioquiha Jesocurisito ranojoinunru coaraauru jelai teein, Cana Coaunera caje- erenaa raain acaauru rai beeure- raauru *profetacuru*, chaen Cana Coaunera aitoonjoa que catcha relaurerauru, naaonjoainuri. Niichuru aina jetaote neurelu, Berenabeen, chaen Simoon- jichojoaieein acaauruhacha curuaatei, chaen Losio- Sirene cocoaicha, chaen nii Calilea coberena- doroneein nenaalu- Erodese aina fohena- Manaen, chaaen Saoro, naaonjoainuri. ²Niichuru jetaote, coroaatanenaaca Cana Coaunerane coina, cosinacaa suri

couu ita taojiaain, Cana Coaunera bajaee bajaecuruhane jana jetaote:

“Carai nii Berenabeen aina Saoro letoaauchete, jelai teein acaauru rai quiicha teei amihanenaa ichaa cuuruhinera. Nii ichacuruhane coinane cotihanajaain ranajaain neeunlura,” nae jetao, acaauru rai Cana Coaunera Suujue.

³Nii jaun jetaote, coaiten cosinacaa suri couu neein, Cana Coaunera bajaee bajaecuruhane nainaan jetao, acaauru choaae biji merecaain, Cana Coaunera bajaare. Nitohaneein acaauru rai, Cana Coaunera bajaauruhane baiha jetaote, acaauru rai necoeure.

Chifereu turuuruha, nii Cana Coaunera Suujue letoaeratenojoihunru-afosotoorune

⁴Berenabeen aina Saoro jetaote, Cana Coaunera Suujue letononeein Seleosiau cuure. Jelai caje coauneein jetaote, Chifere cunaa bote cuhane fauhin, cucuana cuhane coriaae cuuhin turuure, nii Chifere coobenau nena nese-Salaminau. ⁵Nii nese Salaminau turuhin jetaote, nii cuu nena ita taojiaauruhana jaan loreri- sinacoca asaae netaojiaauruha Jorioocurune jana jetao, cuu enohin, acaauru rai, Cana Coaunera ere beebejeure. Joaan Maroco netonai jetaote, acaauru aina cue, acaauru coroatajanera rijijieein.

⁶Salaminau neeuruhane baiha jetaote, caje cuhin, jitariin nii obena tinonohin cuhin jetao, nii cu nena leeocho nese-Pafosoo turuure. Nii Pafosoo turuuruhane jana jetaote, cuu nee-leeinjiin benane- Jorioneein casajene-tiin- Cana Coaunera letononiha nocoetiin- cachauru coritaera-Barajesoso. ⁷Nii benane jetaote, cuu jataain nainaan nena- Coberenadoro Serijio Faoro aina nei nejesina ne. Nii

coberenadoro jetaote, nii Pafosoo turuhin neeuruha- Berenabeen aina-Saorone coitucuhane jaun jetao, cotiharatenajae, nenajaun cuhin, rai Cana Coaunera que ereereecuruhane aohana jerihane jaun. ⁸Ne jetaote, Berenabeen aina Saoro que nejerate nii benane- Barajesoso- “Elima” neein Curiecocuruhacha curuaatei, nabana acaauru esenetaa nii coberenadorone coataa. ⁹⁻¹⁰Ne jetaote, Cana Coaunera Suujue que suujuequin jetao, nunajeein coarajeein:

“Nechu aansai. Casaje. Moconajaera nebanein nena. Ii te itolere caohacha aina nejeratenaanein neeinha. Chanute Cana Coaunera tenojohin ichaonaa caohacha auhacaaita,” nae jetao Saoro- “Faboro” neein curuaaneni. ¹¹Niritiin cotaicha rijitiin jetaote: “Nitohaneein neeine corenihate, ichasetecareein Cana Coaunerara. Maosaneetin nedariquiiin carajao-joaaincha. Nihei jiihoo coaaririheei-nita,” naa Faborone rijieeoritiin jetaote, maosaneein nedae nii benane.

Nitohaneein nocohenanein nedaa rai notana jaun jetaote, rai biji que mucuhin- amaeranu ari, amaa ne coina-nii Elima, inae conoeniha notana jaun. ¹²Nii jaun jetaote, cojoaelatiin, jataain caohatoha nii Cana Curuaanaa-Jesocurisito que aitiin, acaauruhacha beebejei- Cana Coaunera ere esenetae-nii coberenadoro.

Pisidia batane que nena- nese leeocho- Antioquihau turuha Faboro aina Berenabeenne

¹³Nii Pafosoo neeuruhane baiha jetaote, leeinjiin bote cuhane fauhin, Paanfiliu cue nii corihaneraauru aina-Faboro. Jelai caje coauneein jetaote, atane ichoaae cuhin, turuha cuure, nii cuu nena nese- Perejeu. Nii jana, Joaan

Maroco jetaote, cuu ratirinajaain, Jerosaleeun cauha cue. ¹⁴Nii Perejeu caje cuhin jetaote, nii Pisidia batane roohan nenea- nese Antioquihau turuure nii Berenabeen aina Faboro. Cuu jetaote, nebetacanaa janonaa bana- ita taojiaauruna jaan- sinacoca asaae, ita taojiaauruha Jorioocurune jana, cuu enohin nelauriaain, aonajenajaau- re. ¹⁵Nii jana jetaote, cuu aonajenajaau- ruhane jana, Cana Coaunera Quiricha Inoaesi ereretaaure. Inae nii nainaa- ruhane baiha jetaote, acaauru rai:

“Chasocuru, niha chaaelai que ereeichene jaanne, ereeuche te, aonaain suujua lararajiaauruhine- caa cachaauru,” nae nii netaojiaauruna jaan- sinacoca curuaanaacuru.

¹⁶Nii jaun jetaote, nimichuhin nichaaauriin, acaauru rai, biji sarasarari Faboro, inauheneeicha curuaequiin aonajeeruhane coina. Nitohanein acaauru rai, biji sarasara- riin jetaote:

“Aonacuche satiin- Isaraelitaauru, satiin Jorioniheichuru netonai- Cana Coaunera ere esenetaain tonorana jerenacaauru. ¹⁷Egiptoo cuhin ichaooruhane ajiniha jetaote, cana foerateeurera Israeli cocoaichacuru janijiin ranajaelu Cana Coaunera. Nii baiha, rai natane nihei que cuhin, nejelau ataneu- Egiptoo ichaooruha cana inoaesihuru Isaraelitacurune jana jetaote, arajiin fanajaelu Cana Coaunera. Nitohanein nii nejelau ataneu netiin, inae arajiin nefaaauruhane jana jetaote, jelai caje, niicha ichana nainei coarateein roconajaelu Cana Coaunera. ¹⁸Nii Egipto caje roconajaane baiha jetaote, nere tonoraaurenihane saijieein, atiin acaauru abaantaelu, jenachoonca janacanein desieretoo Cana Coaunera. ¹⁹Nitohanein nere tonoraaurenihane saijieein jetaote,

acaauru rai neein niha nii atanene coina, Canaanun batane que, caaunsineein nenea nese que ichaona- caauru cachaauru itaje jetao Cana Coaunera. ²⁰Itolereenein, Egiptoo cuuruhane que jojohin jetaote, jena fasha saoqui choonca ajaanacanein jetao, acaauru que banihateein inoaelu- niicha tenaa jerei- atane que tenajae jetao Cana Coaunera.

Nii baiha jetaote, acaauru curuaanaa- curu tihacoe, Cana Coaunera, enoha nere bera inoaesi- Samoerineriin tihaojoaain. ²¹Nii jana jetaote, itolere curuaanaanein- itolere sirichaaunu que jetao leeinjiin *rey* bajaure jetao. Nii jaun jetaote, Beenjamiin lauri caje neferatenaanein nenea Sisi calaohi- Saoro tee jetao, Cana Coaunera, jena choonca ajaanacanein, acaauru rai- *rey*nein nihane coina.

²²Nii jana jetaote, renaatonorae lanaala, jeriha Cana Coaunerane rijijieein, ichana jereniha Saorone jaun jetao, Rabiri que core jetao Cana Coaunera, satiin Isaraelitaauru curuaa- naanein- itolere sirichanein- *rey*nein nihane coina. Nitohanein tein jetaote: ‘Inae laen, casuujua rijitojoein nenea- cacha ruhanura. Acate, Isaihasi calaohi- Rabiri inera. Acate laen, jatoroaain ne, itolere quiicha jerenohi ichaane coinara.’ naain jetao Saoro mitaain, Rabiri tee jetao, coreeraniha, Cana Coaunera. ²³Nii Rabiri caje neferatena- caauru inamacooru caje nenaanein jetaote, nenaanelu Jesuso. Aca jetaote, letoaelu Cana Coaunera, nere bera inoaesihuru que beratihalune tocoha- neein Israeli cocoaichacuru ichotera- tihane coina. ²⁴Inae turu catainajihua Jesusone jana jetaote, Joaan letoae jetao Cana Coaunera, satiin itolere Israeli cocoaichacuru sacutaain, beebejiha Joanne coina. Nii jaun

jetaote: 'Caohachaain inara suujua rucujueein, coaiten Cana Coaunera aitoonjoa esenetaain tonoraain neeuchte, baotisaain cojounacatenohineeichera.' naain, Israeli cocoaichacuru rai aite jetao, Joaan. ²⁵Inae ohane catainaane jana jetaote: 'Coatia nii inaraacha cohajei- cacaaijie- nii turuha uhenenu nihaaun. Canute, letoae Cana Coaunera, nii beraaunu que. Acate laen, caichoaae jauhecotojoeriin, jataaen cocoaainain letoanojoneein ne. Nii jaun, rai safato ichora rucuheraane que nihanatiin, nelatihahaun.' naain jetaote, rauhijiriin be jetao, acaauru rai- Joaan.

²⁶Chasocuru, Abaraan caje neferate-naaneein nenacaauru, satiin- Jorioniheichuru netonai- Cana Coaunera ere tonorana jerenacaauru, satiin, caa inara rai quiicha beebejeite- jianacoo cacha culucihin mitaerante, satiin- inara rai beratenojoneein ne. ²⁷Satiin- nii Jerosaleeun nenacaaurulu, acaauru curuaanaacuru, naaonjoaihunrite, cajiha turuha Jesusone jana, coitucurenelu. Nere bera inoaesihuru quite niqui, laenaerateein beratelu Cana Coaunera. Nii jaunte niqui, nii Cana Coaunera ere bera inoaesihuruhacha- laenanohilu ereretai nejesinanecure, nebetacanaa janonaa bana naineein. Nitohaneein, ita taojiaauruhana jaan- sinacoca asaee ereretai nejesinanecuruhane sajaineeinte, cajiha turuha Jesusone jana, 'Aca caara.' naain coitucurenelu. Nii jaunte, sohin joerateuruhana jaun, aitiin: 'Naaonjoaante, cuureeincha.' naain nere bera inoaesihuru que laenaeratihalu beein- Cana Coaunerane nainauruhane coina, ²⁸Filato rai colurujueein, sohin joerateeurelu, Filato que, lera colane. ²⁹Nitohaneein teinte, inae satiin aitoa Cana Coaunera Quiricha Inoaesine nainane jana, nii coroso caje fauhin, rai jabereco

rucuhecure- ajeri jachu cuhane. ³⁰Nete, nii jana, oo caje ichate Cana Coaunera. ³¹Nii jaunte, nii Calillea caje coaauneein, Jerosaleeun taetiajeein namu corihaniha amuhemuhenaacauru rai ecocohin, cuu araai janohi acaauru aina nerejetelu. Acaaurute, enene itolere sacutaain amuhemuhejueein, nii Jesoso que ereereecure, itolere cachaauru rai.

³²⁻³³Inara caohachanu quena, inara rai, caa caohati erenaa bihacaanu, coitucuhichene coina. Caa quite, cana inoaesihuru rai aitelu Cana Coaunera, catohanihane coina. Nii jaunte, acaauru inamaconeein nihacachena jaun, cana rai, cana inoaesihuru rai naitoonjoa nainane coina, catohaneein ichae Cana Coaunera. Acate, oo caje Jesoso ichate, rai Quiricha Inoaesi- Salmo- coroatajai cuhane aitothane tocohaneein. Raite, 'Tite, canu calaohineein neeicha. Canuna, chacaneein neeunra.' naain laenaeratelu Cana Coaunera, rai Quiricha Inoaesi cuhane. ³⁴Nitohanihane coinante, nii ajiniha: 'Oo caje jene, ichatereuni, nabana setuha rai jaberecone coataara.' naain nii ajiniharai Quiricha Inoaesi cuhane belu- Cana Coaunera. Chaentechu: 'Satiin Rabiri rai caitoonjoane, ichaa cureunnicha.' naain belu Cana Coaunera. ³⁵Nitohanihana jaunte, coaiten leecha cuhane, 'Coatia laen, setuha nii ii letono jaberecone naihatejeriheeinita.' naain laenaelu Rabiri. ³⁶Aihana jaun, esinaaente niqui, Rabiri letoaa Cana Coaunerane rijijieein, nii nihane bana nenacaauru cachaauru coroatajanelu. Nete, nii baiha ohin, rai foerateeurera ainane jana, rai jabereco inae setuelu. ³⁷Nete, nii Cana Coauneraacha ichatei- Jesoso jabereco laen cuu neein setuenelu. ³⁸⁻³⁹Aihana jaun, chasocuru, caa inara rai canacaanuhacha beebejei- Jesosohacha

corenihate, atiin, osaaocane nihanatiin, rauhijiriin esenetaane, nosa caje nichotena nainereein- saain cachaauru, Jorioniheichuru nihanatiin. Aihana jaun, nii nosa coreniha caseteco coaracuruhane rai niha- Moisesaacha benojoinurute, Jesoso coreniha laen nainecurureein nii caseteco caje nichoteeuruhane. Aihana jaun, satiin- nii Jesoso esenetaeraaurute, atiin coreniha- osa caje rocohin- culuhoca cureein Cana Coaunera. ⁴⁰Caohachaaain coaracuche, batohin esenetana jereneei- chenete, inara choaae nalureein inoaelu laenaratihalu Cana Coaunerane jaun, laenacuruhalu *profetacurune* rijijieein:

⁴¹ ‘Aonacuche.

Satiin caohacha ichaonaa-
caitoonjoa que jaolequiin
nenacaauru
cojoaelatooche.

Nitajihate curiquicheein, inae ecu
tihane bana.

Nii cojoanonaa banane,
itolere ichaain inara notaaca
cureeunnicha.

Chunicoaha inara rai, nii que ereein
bihane, esenetariheecheta.’

naain laenacuruhalu *profetacurune* rijijieein,” naain jetao, nii Antioquihau nena sinacoca asaae- netaojianacaauru rai ererejeein jetao beebeje Faboro.

⁴²Inae, nii que irihane nainaaain jetaote, nii ita taojiaauruha Joriocurune jaan- sinacoca caje corihaneraauru aina mituha cue Faboro. Nii jana jetaote, jiniichaain cuhin mituha cunacaauru- Jorioneein nerotonacaauru jetaote:

“Coaiten leeocho- nebetacanaa janonaa bana uhin, coaiten nii que ererejiha uuni, canaacaanu rai,” naain jetao, Faboro cotihacure. ⁴³Inae sinacoca asaae netaojiaauruhane nainaaain jetaote, Faboro aina Berena- been caaijie cuure- arajii Joriocururu

aina- Jorioneein nerotonacaauru- Cana Coaunera ere tonorana jerenacaauru, naonjoaihunri. Nii jaun jetaote, acaauru rai: “Nijiaonriha, inara belaiha nere aina cuaain, inara cotihaca Cana Coaunerane jaan jianequichenera. Nirijieeincha, jianelanaala, nii jelai sacuuchete, inara coroatajaneein, inara belaine Cana Coaunerara,” naain jetao, acaauru suujuateein, acaauru ratirihure.

⁴⁴Nii baiha jetaote, leeocho nebetacanaa janonaa bana coaiten, netaojiaaure- nii nese sacutaain caje uhin- coroatajaje lanaanla cachaauru, acaauruhacha beebejei- Cana Curuaanaa Jesocurisito beratenojoi aonacuruhane coina. ⁴⁵Nii jaun jetaote, nitohaneein coroatajaje lanaala, tururuha cachaauru, Faboro aina Berenabeen aonaana jaun, nechu jataaen, acaauru que necoelai caun, nabana esenetaauruhane coataa, “Nechu aansai casaje cachaauru,” naain, Faboro necoeje chanuure Jorioocuru. ⁴⁶Nii jana jetaote, nii que nelararajiaain, chaque casilanaala:

“Inara Jorioneeichene raite niqui, jaurihaanejeein nere beebejihacaanune coina canaacaanu letoaaain ne Cana Coaunera niquicha. Nete, naitoonjoa batocoichene jaun, rautaaain aohana jerelanaala que jaolecohichera. Nitohaneein, inara rai, ichaonaa sanaacharanejeein nena bihacaanune coinata niqui, canacaanu letoaaain ne- Cana Coaunerara. Nena aohanna jereneeiche coarajihacaanune jaun, Jorioniheichuru rene curichaanuhin. ⁴⁷Nitohaneein canaacaanu letoaaante:

‘Canuna, inara letoareeuni,
satiin- caa chauratane que
nenacaauru- Jorioniheichuru rai
nihanatiin,
amuhemujueein beein, canu neein
nihanune coitucuerateein,
acaauru ichoterateein neeichene
coinara.’

naain Isaihasi que beratihalune rijijieinte, ena canaacaanu letoae Cana Curuaanaa- Cana Coaunerara,” naauruha Faboro aina Berenabeen, Jorioocuru raina jaun jetaote, ⁴⁸coroaacure- nii Jorioniheichuru.

Nitohaneein corojeein jetaote, esenetaain, “Caohatoha jataaen cana rai, Cana Coauneraacha beratenojoincha,” naain esenetaaure, satiin- nii ichaonaa sanaa charanejeein nenea raaureraanu que nenacaauru- Jorioniheichuru. ⁴⁹Nitohaneein jetaote, nii jelai batane sacutaain nenacaauru- jelai cocoaichacuru rai, Cana Curuaanaa- Jesocurisito beebjeeure. ⁵⁰Nii jaun jetaote, nii rautaaen coaracurenihana jaun, nii caohachaain suujua coaraain Cana Coaunera bajaaurera- enecuru suujua tacaure- Jorioocuru. Nii cuu nenacaauru- acaauru rai jataaen nelatena- caauru cachaauru- suujuaune maajeein tacaure, satiin ita suujua rijitocoriin, acaauru que nejeratein, jelai caje Berenabeen aina curuataain, Faboro sitaauruhane coina. ⁵¹Nitohaneein, jelai caje sitanajauruhana jaun jetaote, mituuuru neein, nii acaauru safato que nenea- utuune faofaohin, riariaain, ratiriin amuure. Nii jetaote ichacure: “Aihana jaun, inae canacaanu, nii ujuaihoneein nihaacaanu. Coaraain aihane nitajeeuche.” naauruhane coina. Nitohaneein rai safato que nenea- utuune faofaohin riariaain ratiriin jetaote, jelai caje amuhin, Iconio cuure Berenabeen aina Faboro. ⁵²Ne jetaote, rachoojoenaa cataaun nedaaure, nii Antioquiha nenacaauru Jesocurisito ranojoihunru, acaauru suujueniha, niha Cana Coaunera Suujua jaun.

Iconio turuuruha Faboro aina Berenabeen

14 ¹Antioquihau neeuru baiha, jelai caje amuhin jetaote, Iconioo turuure jetao- Faboro aina Berenabeen. Nii Iconioo turuuruhane

jana jetaote, nii cuu nenea ita taojiaa- runa jaan- sinacoca asaae netaojiaaure Jorioocuru. Nii jana jetaote, cuu turuhin, enohin, Jesocurisito beratenojoi beebjeeuruha rauhijiriin, rauhi cuhane cuaaine jaun jetao, esenetaacoaaure arajii- Jorioocuru, Jorioniheichuru naaonjoainuri netonaine maajeein, esenetaacoaaure arajiiin. ²Nii jana, esenetaaichuru Jorioocuru jetaote, nii Jorioniheichuru suujuateure jetao, esenetaauruhane coataa, baasoneein Faboro aina Berenabeen que ereein, nechu jataain acaauru cotaiha. ³Nejetaote, cuu carajaain acaauru aina neeurejetocurelu jetao, nii Jesocurisito letonocuru afosotooru. Nitohaneein jetaote, acaauru corotajane- richaain Cana Curuaanaane coitucuu- ruhane jaun jetao, cuu neein Cana Curuaanaa ere beebjerejetocurelu jetao, nii afosotooru. Nii jaun jetaote, acaauru corotajaniha- Cana Curuaanaa jaun jetao, jataain catcha belaiha Cana Coaunerane beebjeein jetao, cunaitenacaauru rautaaen catcha notaacure, esenetaauruhane coina, Faboro aina- Berenabeen. ⁴Ne jetaote, nelerujuacoaaure, nii jelai nese cocoaichacuru cachaauru. Tabaauru jetaote, Jorioocuru cocoaeratiha jetao, jelai teein nelerucure nejesihajeein. Nii jana, afosotooru cocoaerateeurera netonai jetao, jelai teein nelerucure. ⁵Nitohanihana jaun jetaote, cocoinana- caainuru aina ita suujua tacaure jetao Jorioocuru Jorioniheichuru aina, Faboro aina- Berenabeen que nejeratein, ajeri que bodoosinajaain sonajauruhanene coina niqui. ⁶Nii jana jetaote, nii coitucuuuriin jetao, Iconio caje, Licaoniha batane cuhin, Listrau, Derebeeu, naajoainunri rohan nenacaauru neseuru cuhin jetao sorohin, ⁷amuemujuuein, Jesocurisito

beratenojoi- erenaa caohati beebejeeure jetao.

**Listrau, Faboro bодоосihuruha
ajeri quene**

⁸Nitohaneein, nii Listrau turuuruhane jana jetaote, ecu ne- leeinjiin bacosaneein nejanohanaa cache. Nii jetaote, chabana nichaauraain amuhene, nejanoha caje coauneein.

⁹Aca jetaote, Cana Coaunera ere beebejiha Faborone jana, rautatiin, cuu lauhequiin aonaje. Nii jana, rautaain coaraa Faborone jana jetaote, esinaae rauhijiiriin, nerautaane esenetana nainihane coarajiha, suujua cuhanena jaun jetaote, ¹⁰rai tonijiaain:

“Nimichuhin nichaaurate coaracaara,” naa rai Faborone rijieeoriitiin jetaote, chujuleneein, jeluhatiin inae ruharujuae nii cache. ¹¹Nii coaraain jetaote, ita rijitiin jachaleneein jetao, nere cuhane cuaain jetao:

“Chosichurute cache neein cana rai faaurera,” naaure jetao, Licaoniha ere cuhane cuaain.

¹²Niritiin jetaote, nii acaauru ichanohineein nenea, acaauru chosineein acaauruhacha tei Seoso jecha naaure jetao, Berenabeen que. Jana Faboro que jetaote, leeocho chosi Eremesi jecha, naaure jetao, aca irihane jaun. ¹³Nii jana jetaote, turuha uhe jetao, nii nese coenorau nenea- acaauru chosi Seoso rai Teenforo rai saseredote. Nii saseredote jetaote, Seoso rai, lenone nihane sohin, mocohin tenajaacane tocohanein tajiha itolere torocuru, chaen, caohatiin curuteein rucuheneehineein nenea- enuha juane, naaonjoaain uhaain turuha uhe jetao, que Faboro aina Berenabeen belaaain coroaecuruhane coina. ¹⁴Nii jana jetaote, nii coaraain, acaauru chosiniha benajaauruhane que, inae nainacori-

chure jetao, Faboro aina- Berenabeen. Nitohaneein, nainacoriin jetaote, nobiri soaisoain jetao, acaauru jana cuhin, acaauru rai nujuaaen soaisoain:

¹⁵“Chanuna nitohanain ichana jeriquiche, inara rijijieein, cache neein nihacaanu natiin. Nitohaneein neeichene jianequichene coinana turuha uhacaanu, inara rai bihacaanune, nii jiaaneein neeichene coinara. Nii jianecuchera. Coatia chaelai que nelatejeehai niita. Inae nii jiaaneein, Cana Coaunera eesine- itolere dede, cana rai chauratane, cucuana, nii cuhane coneracuru, naaonjoaain coaunera- Cana Coaunera coroajeein, nere tonoraain neeuchera. ¹⁶Inoaelute niqui, niicha jerei ichaa cachane nihanatiin, inauheneecha coarajerejetele Cana Coaunerara. ¹⁷Coatia, chaelai janonaa bana, caohacha ichaain nihane jianihei- Cana Coaunerata. Nete, ‘Naaonjoaaine neeunra,’ naain chabana necoharaerataene cache notajaaincha. Acate, inara corootajane, temulejaain naaonjoaaineeneehenera. Inara temule setejaeraanuque, elo letoaain naaonjoaera. Setejaane, caoachaain marohin, caohatiin tihane, jeeojoiriin nihane, raotojoeein quihajeein- aina raotojoeein neeichene jaan- teraneein nenaanera,” ¹⁸naain acaauru rai beeuruha Faboro aina Berenabeenne sainejeein jetaote, erenaa tonorae lanaala jetao, acaauru chosi rai ichara tocohanein jetao, nii irihuru sohin, mocohin, acaauru coroaeejin, acaauru belaaain, acaauru ranaa jerecure.

¹⁹Nii jana jetaote, Antioquiha caje, Iconio caje, naaonjoaain caje uhin, tajiha turuha uure- Jorioocuru. Nitohaneein, turuhacoaain jetaote, nii ecu nenacaauru suujua elonaaauruhana jaun jetaote, ajeri que Faboro bодоосiin

jetao soore. Nitohaneein sohin jetaote, “Inae jecha atinaauruha,” naain jetao, tararaain amaaain, nii nese caje, naain jaoha cuure. ²⁰Nii jana jetaote, sacuhin, curuhacaain netaojiaain coarajeeuruha Jesocurisito ranojoihunruna jana jetao, nimichujuaaite Faboro. Nitohaneein nimichuhin jetaote, coaiteen nii neseeu cue. Nii cojoanoo jetaote, Berenabeen aina, naain Derebeeu cuure.

²¹Nii Derebeeu turuhin, cuu raotojoeein, Cana Coaunera Ere Caohati beebejeeuruhane jaun jetaote, Jesocurisito esenetaeraneein nedaaree arajii cachaauru. Nitohanihana jaun jetaote, cuu neeure arajiin Jesocurisito ranojoinunru. Nii Derebeeu, cacha relaauruhane baiha jetaote, Listrau, Iconioo, Antioquihau, naonjoaainunri coaiteen cuure. ²²Cuuru turuhin jetaote, Jesocurisito esenetaeraaauru suujuateeu jetao, caohatiin, nirijieein jianelanaala, esenetaain tonoraauruha, caoachaaain rauhijiriine caina. Nitohaneein jetaote: “Cana Coaunera Cojoanonaa que ichaonaa jerichaane, itolere necairichanaa coaraain, necairichanaa abaantaacanete nera,” naain jetao, suujuatenajaaunre. ²³Niritiin, suujuatenajaaain jetaote, le laurichuru Jesocurisito ranojoinunru nainetiin, acaauru coaraanuurune que, acaauru bichauhenaauru tihacoaure. Nitohaneein, tihacoaain jetaote, acaauru coroatajaniha Cana Coaunerane caina, suri couu neein cosinacaain, Cana Coaunera bajaain, nii acaauruhacha esenetai- Cana Curuaanaa bijju tenajaain ratirinajaaure.

**Siria batane que nena Antioquihau
jelaiha cuuruha Faboro aina
Berenabeenne**

²⁴Pisidia batane choaae situhin cuhin jetaote, Paanfiliau turuure. ²⁵Inae

Paanfiliau batane turuhin jetaote, nii neseeu- Perejeu, Jesocurisito beratenojoi beebejeeure, nii cuu nenacaauru rai. Nii baiha jetaote, Ataliau cuure jetao, Faboro aina Berenabeen. ²⁶Caje coauneein jetaote, bote cuhane fauhin cuhin, Antioquihau turuure. Nii neeuruhalune jana, acaauru teeuruhalu acaauru leeoachaauru, Cana Coaunera icharatenojoi ichacuruhane coinana jaun jetao, turuure, inae nii niicha icharatenojoi jitaauruhana jaun. ²⁷Nitohaneein cuhin jetaote, inae Antioquihau turuhin jetao, jitariin cuu nenacaauru- Jesocurisito ranojoihunru taojiaain jetao, acaauru rai, acaauru coroatajaniha Cana Curuaanaa- Cana Coaunerana jaun, Jorioniheichuru netonoai- rai suujua coreein, inae esenetaauruhane beebejeeure Faboro aina, Berenabeen. ²⁸Nitohaneein jetaote, cuu acaauru aina, carajaain neeurejeteurelu Faboro aina Berenabeen.

Netaojiaauruha Jerosaleeunne

15 ¹Nii Antioquihau neeuruha Faboro aina Berenabeenne bana jetaote, Antioquihau cuure nii Jodea nenacaauru tabaauru. Nii Antioquihau turuhin jetaote, nii cuu nenacaauru- Jesocurisito coreniha cana nejeraauru relaure jetao, aitoha Moisesane jaan que. Inoaclu aitoha Moisesane rijitiojoeein:

“Inara jabereco cari jiuunuhin saerateneichene, inara osa caje inara culucuhin, inara ranaa nainerihe Cana Coaunerata,” naaure jetao. ²Nii jaun jetaote, coreniha acaauru aina, ita cotaicha rijitocure jetao Faboro aina Berenabeen. Nii jaun jetaote, inae Faboro aina Berenabeen que tacaajeein jetao, acaauru aina, nii cuu nenacaauru tabaauru naonjoaainunri letoaaure jetao- nii cuu nenacaauru- Jesocurisito

ranojoihunru- bichahenaauru, nii que iriha cuuruha nii Jerosaleen nenacaauru- Jesocurisito ranojoinunru bichahenaauru, afosotooru, naonjoainuri ainane coina.

³Nitohanein jetaote, letoanjaauruhane jaun, nii Antioquihau- nese caje, Jerosaleeun cuure- Faboro aina Berenaben, cuu nenacaauru- tabaauru aina. Nitohanein cuhin jetaote, Fenisia batane, Samaria batane, naonjoainuri choaae situurunein jetao, nii cuu nenacaauru- Jesocurisito ranojoihunru rai beure:

“Naojoaainte, Jorioniheichuru netonai coroatajane Cana Coaunera, jauriaa acaauruhacha sacui jianein, nere tonoraauruhane coinara,” naain beeuruhana jaun jetaote, coroaecure jetao- nii cana nejeraauru- Jesocurisito ranojoinunru, acaauru rai nii beeuruhana jaun coitucuhin.

⁴Inae nii Jerosaleeun turuuruha- Faboro aina Berenaben jana jetaote, raotojoein acaauru raure satingi- nii Jesocurisito ranojoinunru, saain nii acaauru bichahenaauru, saain nii afosotooru, naonjoainunru. Nii jana jetaote, satingi itolere ichaain, acaauru coroatajaniha Cana Coaunera beebjeeure, acaauru rai. ⁵Nii jaun jetaote, nimichuhin, nichaauraain jetao:

“Nii Jorioniheichuru Jesocurisito esenetaeraauru raite caohachae aitocaaehene, aitalu Moisesane rijijiein rai jabereco cari saerateeruhane coinara. Nii choaae taacaante caohachae, satingi Moisesa aitoonjoalu rijijiein ichaohin, esenetaain tonoraauruha nii Jorioniheichuruna,” naaure, tabaauru fariseoocuru- Jesocurisito ranojoinunru.

⁶Nii niritocuruhana jaun jetaote, satingi netaojiaaure- afosotooru, nii cuu nenacaauru ichahenaauru,

naonjoainuri, nii que ita rai ereein, coitucuruha jiniiquine coina. ⁷Cuu nii que ereerecuruhane jana jetaote, Fedoro netonoai nimichuhin:

“Curisito coreniha- chasocuru, inarate raotojoein, inae carajaa catohanein canu cotijiaain canu raa Cana Coaunera coitucuhiche, jianacoo nosa caje mitunaa nainecuruha Jorioniheichuru netonaine coina, Jorioniheichuru rai nere beebjihanune, eseneta nainecuruhane coinara. ⁸Leeinjii- Cana Coauneraachate, satingi- cacha suujua coitucuujuera. Nii Cana Coaunera, cana que coaratein, Jorioniheichuru rai, rai Suujue tera. Nii jaunte raotojoein acaauru raane coitucuhacache, cana rai, rai Suujue tihalune rijijiein, acaauru rai netonai, rai Suujue tihane jaunra. ⁹Coatia nejelanein, Jorioniheichuru coaraain nihei- Cana Coaunera. Satingi cana coaraane rijijieinte, joareein cacha coaraain ne Cana Coaunera. Nii jaunte, esenetaauruha acaauru netonaine jaun, acaauru suujue coulucoe Cana Coaunera, cana rai ichaane rijijiein. Satingi, itanein ne cacha. ¹⁰Aihana jaun, chanute inara raajenhane, Cana Coaunera leratena jerequiche, caa nere esenetaeraauru rai caaintati ichaonaa- anajii tenaa jereinta. Nihei, canacaanu nihanatiin, nitohanai- ichaonaa abaantana nainera lanaalata. Niheichu cana inoaesihuru nihanatiin, nitohanai ichaonaa sacunaa nainesihuruhane coalanaalata. ¹¹Nete, rai Calaohi Jesoso coreniha atiin nechu nirijiein core colane, cana suujue ichoteratein, couluuoca Cana Coaunera coitucuhacachera, jericanejein acaauru suujue couluucane rijijieincha,” naa acaauru rai Fedorone jana jetaote, ereeuruhane jianein jetao, ¹²curuatoroain, satingi- curuaequiin aonajeeure. Nitohanein:

“Naaonjoainte, canacaanu aina cuaain cojoelanaacojoa ichaain, canacaanu coroatajane Cana Coaunera, Jorioniheichuru aina nihacaanune janara,” naain acaauru rai jetao beebejeeure, Faboro aina Berenabeen. ¹³Inae ereeuruhane nainaauruhane jana jetaote, acaauru rerohariha jetao ere Saantiaao:

“Aonacuche satiin Jesocurisito coreniha canejeraneen nenacaauruna, caa que erete aonaquichera. ¹⁴Naaonjoainte, jauriaa Jorioniheichuru raenihane baiha, inae enene janijiin niicha ranojoinunru- Jorioniheichuru coroatajane Cana Coaunera, acaauru netonoai nichao que ichaooruha jerihane rijijieeine coinara.’ naainte canacaanu rai be Simoon- Fedoro. ¹⁵Niritiin inoaelu beein, nere bera inoaesihuru que laaenaeratihalu- Cana Coaunerane tocohanein:

¹⁶ ‘Rabiri inamacooru caje neferatenaanein nenacaauruna, coroatajaniha cuureeunni. Leeinjiin canuhacha jerenohicha ichana jerenacaauruna, coroatajaniha cureeunnicha,

¹⁷ itolere chaauruatane sacutaain canu ere beebejeeuruhane, cacoitucuhin carohan nichuuntanaa nainecuruha Jorioniheichuru netonaine coinara.

¹⁸ Caritiinte, inoaelu caje coauneen berateen Nere laenaeratelu Cana Coaunera, coitucuhacahene coinara.’

naain Quiricha cuhane laenacuruhalu Cana Coaunera ere bera- *profetacurune* rijijieeinte, nii nainaauruhane coina aihurera.

¹⁹Aihana jaun, coa Jorioniheichuru rai, caaintati ichaonaa tenaa coacache, inae jauriaa acaauruhacha esenetai jianein, Cana Coaunera ere tonoraau-

ruha natiinta. ²⁰Raujiaainchate naine, quiricha cuhane laenaain: ‘Jiaonriha, cache ichanohineen nenea chosi rai niicha teuri lenone quichenera. Jiaonriha, sinijieraaquichene nihanatiin, nejelau ene aina naosateechenera. Niheichu, sinijieraquelanaala neeichene nihanatiin, jiaonriha jelai tein raelanaala, ene aina ichaohichenera. Jiaoharihachu, enecuru nihanatiin, sinijieraacane nihanatiin, nejelau quicha aina ichaohanera. Niheichu, jiaonriha lanaquelanaala nihane nihanatiin, jelai tein raelanaala quicha aina ichaohanera. Niheichu, jiaonriha raro ruluhin sonojoin lenone quiin naonjoaichenera. Niheichu chaen, ichana niha natiin, jiaonriha quiichenera. ²¹Nii coataate neeure, inoaelu caje coauneen, neseeuru nainetiin, nebetacanaa janonaa bana nainetiin, nii netaojiaauruna jaan- sinacoca asaae netaojiaauruhane, nii Moisesa aitoojoan ereretaain que cana relaeranuurura.’ naain laenaain letoaacachenete caohachare,” naain jetao acaauru rai ereereje Saantiaao.

Jorioniheichuru rai Jerosaleen caje letoanjoineen nenea- quiricha

²²Nii jaun jetaote, saain Jesocurisito ranojoinunru, acaauru bichauhenaauru, afosotooru, naonjoaain jetao Jesocurisito ranojoinunru nejesinanejeein netiin, coacuhin jetao, acaauru tabaauru janiichure, Antioquihau, Faboro, Berenabeen, naonjoainunru aina, letoanajaauruhane coina. Nitohanein tabaauru janijiin jetaote, Jodasi-Barasabaneen acaauruhacha curuaatei, chaen Silasi, naonjoainunru letoaaure. Acaauru jetaote, nii Jesocurisito ranojoinunru- cana nejeraauru rai, jataain nelatineen neeure. ²³Nitohanein letoanajaain jetaote, acaauru aina

quiricha laenaain jetao letoaaure, naain Antioquihau nenacaauru- Jesocurisito ranojoinunru rai, nii Jerosaleen nenacaauru- afosotooru, acaauru bichauhenaauru, naonjoainuri.

Nii quiricha- acaauruhacha laenai cuhane jetaote:

“Saainna- afosotonichaanu nena, inara coaucaanura. Saain, Jesocurisito ranojineein nenacaauru- cana nejeraauru bichauhenaauru ainane, inara coacuhin, caa laenaain letoaacanura. Saain Jesocurisito coreniha- canacaanu nejeraneein, Antioquihau, Siriau, Silisiau naonjoainun- Jorionelanaala- neniquichene raina, caa laenaain letoacaanu, ²⁴canacaanu letononelanaala, caa Jerosaleen caje cuhin, inara suujua roheca cuuruha, inara jabereco cari molohiche, aitoa Moisesane rijijieeine que aitiin, leinjiin chacoitucuhi rijijieein, inara tenaa jerecuruhane coitucuhacaanune jaunra. ²⁵Nii jaunna, satiin coacuhin, coroatajaain canacaanu caje nenacaauru- cachaauru letoacaanu, jataaen canaacha belaihuri- Jesocurisito coreniha- cana nejeraneein nenacaauru- Faboro, Berenabeen naonjoainunru aina, canacaanu aina nenacaauru coroatajai cachaauru letoacaanu, inara coaraa uuruhane coinara. ²⁶Nii Berenabeen aina Faboro ichaote, jataaen lunajeriin ne, Cana Curuaanaa Jesocurisito ere tonoraain, nere beebejeeuruhane corenihara. ²⁷Nitohaneaina, nii Jodasi, Silasi naonjoaain letoacaanu acaauru ainara. Acaaurute, inara rai ereein, jitariin inara rai nirriinanai biha cuurureein, nujuuaen cajera. ²⁸⁻²⁹Cana Coanera- Suujue- suujuateno-

joineeinte, canacaanu rai caohachae, inara rai ichaonaa caaintati tenaa nainenihacaanura. Raujiaainchane inara rai aitiin laenacaanu: ‘Jiaonriha, cacha ichanohineein nena- chosi rai niicha teeuri- lenone quiichenera. Jiaonriha, raro ruluhiin sonojoin lenone quiin naonjoaaichenera. Niheichu chaen, ichana nihanatiin, jiaonriha quiichenera. Jiaonriha, sinijieraaquichene nihanatiin, nejelau ene aina naosateechenera. Niheichu, sinijieraquelanaala neeichene nihanatiin, jiaonriha jelai teein- raelanaala ene aina ichaohichenera. Jiaonrihachu, enecuru nihanatiin, sinijieraocane nihanatiin, nejelau quicha aina ichaohanera. Niheichu, jiaonriha lanaquelanaala nihane nihanatiin, quicha raelanaala jelai teein aina ichaohanera,’ Nihei nenacaen nii baihata. Caa aitocoanune rijijieein, tonoraain ichaohichene, caohachaaain ichaonaa naineriquicheeincha. Raotojoeein neeuchera,”

naain jetaote, nii Antioquihau- acaauruhacha letoaaene- quiricha laenaure, letoaauruhane coina.

³⁰Nitohanein jetaote, inae nainaauruhane jaun jetao, ita rai necoein, Antioquihau cuure nii Faboro, Berenabeen, Jodasi, Silasi naonjoainuri. Nii Antioquihau turuhin jetaote, nii cuu nenacaauru- Jesocurisito ranojoinunru jitariin taojiaain jetao, nii acaauru rai-afosotooruhacha letoai- quiricha teure jetao, acaauru rai. ³¹Nii jaun jetaote, joracaain ereretaain coaraain jetao, coroaecure jetao, nii cana nejeraauru- Jesocurisito ranojoinunru, caohatiin acaauru suujuaateein, acaauru suujua lararajiaain, ichacuruhana jaun. ³²Nii Jodasi aina Silasi netonai jetaote, Cana

Coanera caje erenaa raauruhane, cacha rai beebejeraneein neeure. Nii jaun jetaote, niha acaauru rai rauhina jaun jetao, nii Jesocurisito ranojoinunru rai ereein jetao, acaauru suujua lararajiaain jetao, acaauru suujua nunaaure, acaauru rai ereein acaauru suujuateein. ³³Nitohaneein jetaote, cuu carajaa-joaain neeuruhane baiha jetao, inae acaauru rai necoeure nii Antioquihau nenacaauru- Jesocurisito ranojoinunru. “Raotojoein caunichuchera.” naain jetao, acaauru rai necoeure, ³⁴jelaiha Jerosaleeun cauhaacuuruha, nii letoana-jaaurera rene, Jodasi aina Silasichurune caina. ³⁵Nii jana, Berenabeen aina Faboro jetaote, cuu nii Antioquihau nedaaure. Nii cuu arajiin nenacaauru aina jiniinquin, cuu jetaote, choanoonetojoein Cana Curuaanaa ere beebejeein, cachaauru relaaure.

Misionero neein amuhane
coroata satiha Faborone

³⁶Nii baiha carajaa-joaain neein jetaote:

“Coanete, turunichaaca, satiin nii jauriaa Cana Curuaanaa beratenojoi beebejihacaluna jaunru- neseeuru sacutaaincha. Chatohaneeincha neeure, nii cuuru nenacaauru- cana nejeraauru- Jesocurisito ranojoihunruta,” naa Faboro, Berenabeen raina jaun jetaote niqui, ³⁷acaauru aina Joaan naain curuajai- Maroco amanaa jeriha aina- Berenabeenne jana jetaote, ³⁸rautaajoaenihana jaun, jerechojaene jetao Faboro, jauriaanejeein cuuru bana, Paanfiliau ratirinajaain, cauha cuhalune jaun jetao, acaauru jiniichaain- acaauru amihaneon ichajeein sacuenihalune jaun. ³⁹Nitohaneein jataaen amaane jerelanaala, jataaen coiintiha Faborona jaun jetaote, jelai tein jetao, nii Maroco cotijiae jetao Berenabeen,

corianeraaunu que. Nitohaneein cotijiaain jetaote, aina Chifereu cuure jetao, ucuae cunaa bote cuhane fauhin.

⁴⁰Nii jana, Faboro jetaote, jelai tein, corianeraaunu que Silasi cotijiae. Nii jana jetaote, acaauru coroatajaniha Cana Coanerane caina jetao, acaauru rai Cana Coanera bajaain letoana-jaaunre nii Antioquihau nenacaauru- Jesocurisito ranojoinunru. Nitohaneein jetaote, jelai caje nerocohin cuure jetao, ⁴¹Siriau, Silisiau naaonjoainunru. Cuuru turuuruna jaaun jetaote, nii cuuru nenacaauru- Cana Curuaanaa Jesocurisito ranojoinunru rai ereein jetao, acaauru suujuateeure, caohachaaain rauhijiriin, janelanaala Cana Coanera ere tonoraain, niicha jerenohicha ichacuruhane caina.

**Faboro aina Silasi corihaniha
cuha Timoteeone**

16 ¹Nitohaneein cuhin jetaote, Derebeeu, chaen Listrau, naaon-joaihun, turuha cue Faboro. Nii jana jetaote, cuu leeinjiin cacha- Jesocurisito esenetaera- Timoteeoneein curuajai- Jorio bene que nebaain- Curieco que inacanaa ruha cue Faboro. Nii neba jetaote, Jesocurisito esenetaera ne. ²Satiin- Listrau, Iconioo, naaonjoaihun nenacaauru- Jesocurisito coreniha cana nejeraauru jetaote, “Aca jete, jataain, caohacha cachaneein ne,” naaure jetao que, coitucuureraauru. ³Niritiin, rai beeuruhane jaun jetaote, acaauru corihaniha cuha Timoteeone jere Faboro. Nitohaneein acaauru corihaneraanu que amaauruhane caina jetaote, Timoteeo jabereco cari jihununurateein, saerate Faboro. Nabana rautaelanaala, que nererojoeaacuuruha cuu nenacaauru- Jorioocurune coataa jetaote, nitohaneein terate Faboro, inae, satiin cuu nenacaauru- Jorioocuru, Curieconein niha Timoteeo inacane coitucuuruhane

jaun. ⁴Nitohaneein, acaauru aina Timoteeo amaain cuhin jetaote, situuruna jaun nenacaauru neseuru naineein, Jorioniheichuru- Jesocurisito esenetaeraauru rai jetao, aitiin berateeuruha afosotooru aina- Jerosaleeun nenacaauru- Jesocurisito ranojoihunru- coaaraaurune rijitjoeein beebejeein jetao cujueeure. ⁵Nitohanihana jaun jetaote, jelai choae jauhecotojoeiin, esenetajeein cujueein nejeeonteejeein, sacuure Jesocurisito ranojoihunru.

Leeinjiin Masedonia cocoaicha que, Faboro notaaca Cana Coaunerane

⁶Asia batane que nenacaauru rene cuhin beebejeeruhane jereniha Cana Coaunera Suujuene jaun jetaote, rauhijiriin cuure, Forijia batane, Galasia batane, naaonjoaihunri jeloon situhin. ⁷Nitohaneein jetaote, rauhijiriin cuhin, Misia batane- nunuhe que turuha cuure. Jelai caje coauneein jetaote, Bitiniau bataneun que turuha cunaa coaacure niqui. Ne jetaote, cuuruhane caohate jetao, Jesoso Suujue. ⁸Nii jaun jetaote, nirijjeein, rauhijiriin Misiau turue lanaala, rauhijiriin situhin, Toroasi cofauhanaun, turuure. ⁹Ecu netiin jetaote, janotiin sinihu coetacai rijitjoeein leeinjiin cacha- Masedonia cocoaicha que notaaca Cana Coaunerane jaun jetao, nii Masedonia cocoaicha aina, itaque taca cue Faboro. Que tacaain jetaote, nacatiha nichaauraa: “Atiin, Masedoniau, turuha uute, cuu canacaanu relaaicha,” nae jetao, Faboro sinihu. ¹⁰Nitohaneein notaaca Cana Coaunerane biha Faborone jaunne, nii rijijjeein neruujueein, Masedoniau cuhacaanu. “Jerihane, cuu Jesocurisito que erejeein beebejena cointate, cuu cana cotiharate, Cana Coaunerara,” naaina, cuhacaanu.

Filipoo turuuruha Faboro aina Silasine

¹¹Nitohaneina, Toroasi cofauhanaun caje, nesaruna- leeinjiin bote cuhane

fauhin, cucuana cuhane cujueein, rauhijiriin Samotoroasi cobenaun, tacanacanejeein cuhacaanu. Nii cojoanoo cuhine, turuha cuhacaanu Neapolisihu. ¹²Jelai, cajena, atane choaen cuhin, Filipoo turuha cuhacaanu. Nii Filipo te, Masedonia batane que nena- nese tabaaineein- Romanocuru nejesina que cocoaichakuin nenaane. Cuuna inata janojoeiin, neorihacaanu. ¹³Nitohaneeinna, cuu, nebetacanaa janonaa bana, naain nese edaa cuhacaanu, nucuhe auhaniha cuhin. Cuu niha netaojiaain- Cana Coaunera bajaauruha- Jorioocuruna jaan coitucuhacaanuna jaun. Cuuna turuhin, nelauriaain, cuu netaojianacaauru- enecuru rai, Jesocurisito que ereerejeein beebejihacaanu. ¹⁴Nii cuu netaojianacaauru jana nena- leeinjiinene curuaate, Lidia ne. Acate Tiatira nese caje unaaneein, cajione caohachalanaajihoojaain que- necoretiha nena ne. Nii enete, aihuruha Jorioocurune rijijjeein, Cana Coaunera coroaera nihana jaun, coroatajane Cana Coaunera, rautaaain, Faborohacha beebejei aonaane coina. ¹⁵Nii jaunte, saain loreri asae nenacaauru naraaichuru aina jiniiquiin, baotisanoinjeein neeuruhane baiha:

“Esinaaen rauhijiiiriin Cana Curuaanaa esenetaeraneein nihanune esenetaaichene, caloheri asaae, siniha uuchera,” naain canacaanu chunaa Lidiana jaun, cuu nihacaanulu.

¹⁶Inae, ita taojiaain- Cana Coaunera bajaauruhane jaan cuhacaanune janate, leeinjiin ranuna- coseenraneein nena aina ita eruhacaanu. Nii ranunate, saruha Moconajaerane que, enaacha, chaaelai nihane, cojoeluhinae. Nitohaneein, enaacha chaaelai nihane, cojoeluhinaane jaunte, que nihane, chaaelai cojoeluhinaerateein, coreniha

arajii coriqui nihane, raerajeeure, ii sirichaauru. ¹⁷Nii ranunate Faboro aina, cuujihacaanune jana, canacaanu caaijie uhin, ehequiiin:

“Caa cachaaurute, acaihanejei Cana Coauneraneein nena- aitoonjoa beebejeeureranera. Acaaurute, raotojoeiin caseteco caje nichoteein jianacoo nena nainiha cachanejaan beureranera,” nae, ehequiiin- nii ranuna.

¹⁸Nii jaun jetaote, cojoanooneto- joeiin, niriti nejesina nihane jaun, inauhene aonajenajaocane baiha, inae tabiicha, coetae Faboro, arai janohin, niritonajaocane jaun, coetaain jetaote, nii chaelai cojoeluhinaa- enaacha- nii ranunane jaan rai:

“Cana Coaunera Calaohi- Jesocurisito coreniha, nii ranuna caje mituhin amuura,” naa Faborone rijijieein jetaote, caje mituhin amue, nii ranuna saruhera.

¹⁹Nii jaun jetaote, inae neniha saruhe- rane jaun, chaelai cojoeluhinasinihane coaracuruha nii ranuna sirichaaurune jaun inae coreniha coriqui erunaa nainecurenihane jaun jetaote, Faboro aina curuataain Silasi mucuure nii ranuna sirichaauru. Nitohaneein, mucunajaain jetaote, amanajaunre, cocoinanacaihuri acatiha, naain nese cataaun nena- ita colurujueeruhana jaun amanajaunre. ²⁰Nitohaneein, amanajaain turuhanajaain jetaote, joesiocuru rai, nechu jataain, acaauru cotaiha nohanein jetao:

“Caa Jorioocurute, satiiin canacaanu nese sacutaain, satiiin- cachaauru rohecaaurera. ²¹Chaentechu, cana Romanonihacachene ichao corenaa jereein, nejelau ichaonaa que ichaoha- cachene coina, que cana relaaurera. Aihana jaun nainihe, nii que ereein, que cacha relaauruhane jerichaache- nera. Nitohanei ichaonaa que ichaonaa

nainihacache, cana Romanonihacachene jaunta,” naure jetao.

²²Nii jaun jetaote, satiiin acaauru aina obajeein jetao, mucunajaauruhane jana, acaauru cajione rocoerateein jetao, enuha que bisichatenajaaure joesiocuru. ²³Nitohaneein, mainajeriin bisichatena- jaauruhane baiha jetaote, caresero cuhane enohanajaaure, caohatiin berainajaan caresero beraichane coina, aitiin. ²⁴Niritiin suujuateein letoaauruha joesiocuruna jaun jetaote, caresero fuuniha, tenajae, sefo que acaauru tijia mucuerateein, nii caresero beraicha.

²⁵Nii jana jetaote, cuu dede cataaun, Cana Coaunera bajaabajajeein, nenatecuruha- Faboro aina Silasine jana jetaote, cuu aonajeeunre, nii cuu nenacaauru leeochoauru- casetecocuru. ²⁶Nii jana jetaote, luhecotariin uhe cana lialiaera, mijieeinetiin. Nii jaun jetaote, mijieeinein nerurujaaa nii caresero cuhanaine jana jetao, nejracaacoaa caresero bacuujuaarune jana, satiiin- nii cuu nenacaauru- casetecocuru caje nerojoirojoiri nii acaauru biji ichoracuru- *cadenacuru*. ²⁷Nii jana jetaote, jitoroaa nii caresero beraicha notane jana, nii caresero coaraane jana, satiiin jetao, nejracaacoae nii caresero bacuujuaauru. Nii jaun jetaote, “Inae jecha sorooruha, nii casetecocuru,” naain jetao, rai esefara rocohite, raajenhane nesohin nijiaohanne coina. ²⁸Nii jana jetaote, rai ehequiiin:

“Coaa ichaajenhane, chatoaneein necunaitaara. Satiina cau nihacaanura,” nae jetao, rai Faboro.

²⁹Nii jaun jetaote, cono bajaain, soroneein cuhin, enohin jetao, Faboro aina- Silasi acatiha, rijijijianein coasina caaun jetao, acaauru acatiha neseonrae nii caresero beraicha. ³⁰Nii baiha jetaote, caresero caje mitanajaain jetao:

“Cachaauru, cha ichareeun, nitajilhanune coataa, nichotihanune coinata,” naain bajaane jana jetaote:

³¹“Cana Curuaanaa- Jesocurisito esenetaaute, nichoteei, ii sinijiera, ii calaoichuru, satiin ii loreri asaae nenacaauru, naaonjoaihunri ainara,” naain jetao, tonoraure, Faboro aina Silasi. ³²Niritiin tonoraain jetaote, rai Cana Curuaanaa Jesocurisito beratenojoi beebejeeure, satiin- nii loreri asae nenacaauru raine maajeein. ³³Nitohanein, dede catairijihu nihana- tiin jetaote, temuha acaauru que- acaauru bisihuruhane jaunne jaun jetao, acaauru rai culeje nii caresero beraicha. Nii baiha jetaote, inae rai sinijiera aina, saain rai loreri asaae nenacaauru aina jiniiquiin, baotisan- o-joinnein neeure. ³⁴Nitohanein jetaote, rai loreri asaae jetao, Faboro aina curuataain Silasi amaain jetao, coroa- a-tenajae nii caresero beraicha. Nitoanein jetaote, rai loreri asaae nenacaacuru aina jiniiquiin satiin- sinijiera aina jetao coroa- jeein, raotojoein neeure, inae Cana Coanera esenetaauruhane jaun.

³⁵Inae jano jana jetaote, folisihacuru letoaaure jetao, joesiocuru, Faboro aina Silasi joracaeratiha cuuruha, caresero beraicha quene caina. ³⁶Nii jaun jetao te:

“Caraita, nere letoaaure joesiocuru, inara joracaain, inara jianichaaune coinara. Aihana jaun, inae nainiquiche, raotojoein mituhin, amuhichenera,” naa nii caresero beraicha, Faboro raina jaun jetaote, ³⁷nii folisihacuru rai jetao:

“Canacaanu Romanonihacaanu natiinte, caohachaa- in rautaa- in, canacaanu rai bajaorihei amunein, satiin coarajiha cachane notaracae canacaanu bisiin, canacaanu enoaera- teeure caresero cuhanera. Nii natiinte, nechujataaen asino-joinnein, inae canacaanu mitaeratenaa jerecure- ra. Aihana jaun coatia miturihaacaanuhi,

raajenihane uhin, canacaanu mitaa uuruhinera,” nae jetao, Faboro, nii folisihacuru rai.

³⁸Nii jaun jetaote, turuhin beeuruha nii folisihacuru, joesiocuru raine jaun jetao, nesoonetoore jetao, Romano neeuruhane beeuruha acaauru raine beeuruha, nii acaauru letonocuru- folisihacuruna jaun. ³⁹Nii jaun jetaote, raaje cuhin jetao, turuhin, Faboro aina Silasi joracaeratein jetao:

“Atiin, inara rai, baasonein ichacaa- nuneque, canacaanu que inara suujua acatein, atiin, caelai caje amuuchera,” naaure jetao, nii joesiocuru, acaauru mitaain. ⁴⁰Nitohanein, caresero caje inae mitanajaauruhane jaun jetaote, mituhin jetao, Lidia rene, turuha cuure jetao, Faboro aina Silasi, cuu nenacaauru- Jesocurisito coreniha- cana nejeraauru coaraain, acaauru suujuatein, acaauru suujua lararajiaa- uruhane baiha jetaote, jelai caje amuure.

Tesalonecau turuuruha Faboro aina Silasine jana, acaauru que nererojoeaain, acaauru aina baacuruhane

17 ¹Tesalonecau turuuruhanecoina jetaote, Anfipolisi, chaen Apolonia, naaonjoaain neseeu- rochoae situhin, cuhin jetao, turuha cuure Tesalonecau Faboro aina Silasi. Cuu jetaote, ita taojiaauruhana jaan coloheri- sinacoca sirichure cuu nenacaauru Jorioocuru. ²Nii asaae jetaote, turuha cue Faboro, nitohaniha rai nichaona jaun. Nitohanein jetaote, nebetacanaa janonaa bana nainein jetao, nii sinacoca asaae cunajaque Faboro. Cuu jetaote, Jorioocuru aina nihane, ita cotaicha rijitonajaacure jetao, cuu acaauru rai, Cana Coanera Quiricha Inoasi ereretaain, nichata semanaai reeintiaain. ³Cuu nihane jetaote:

“Inae nitohanihane coina, letononeei nihana jaunte, ohin caje ichanaelu Mesihasi, Cana Coaunera Quiricha cuhane aitohane nainane coinara,” naain jetao, rauhijiriin beebeje Faboro. Niritiin been jetaote: “Caa inara raiquiiicha beebejeite, jeelai Jesusoneein, canaacha cohajei- Mesihazine,” naain jetao, beebeje Faboro.

⁴Nii jaun jetaote, tabaauru Jorioocuru, arajii Curiecocuru- Jorioocuru aina ita taojiaain- Cana Coaunera bajaaurera naonjoainuri jetaote, esenetaacoaure, arajii enecuru-caohachanejeein nenacaaurune maajein jetao, esenetaain jetao, Faboro, Silasi, naonjoainuri aina neeure. ⁵Nii jaun jetaote, acauru que necoelai caaun jetao, acauru aina obajein, chachaelanaala, nelanaae caaun bero cuhane amuhemuhena-caauru- neechu aansainein ichaonacauru ariin jetao taojiaaure, nii esenetaichuru Jorioocuru nii nese sacutaain acauru aina cachaauru rohecaain, cachaauru suujua auhacaeraanu que. Nitohaneein jetaote, arajiin cacha taojiaain jetao, Jason loreri asaae jetao, codoonetoha cuure jetao, Faboro, Silasi, naonjoaain ariha, runajaauruhane, acauru mucuhin, tararanajaain, cachaauru rai tenajaauruhane coina jetao, niqui. ⁶Ne jetaote, cuu Faboro aina Silasi ruurenihana jaun jetao, Jasoncha aina curuataain- cuu nenacaauru- Jesocurisito coreniha cana nejeraacuru- tabaauru amaare, tararanajaain, cocoainanacaihuru rene. Nitohaneein, amanajaain jetaote, cocoainanacaihuru acatiha turuanajaain jetao, ehehequiin:

“Satiin cana rai chauratane sacutaain, cachaauru rohecaain, cachaauru suujua auhacaaurerate, inae cau netonai turuurerera. ⁷Nii inatiinte, turuuruhanane

jana raotojoein ranajae, caa Jasonra. Acaaurute, Romanocuru curuaanaacuru curuaanaa eenferadoro- aitoonjoa ichoae iniin: ‘Nihaje leeocho curuaanaacuru- curuaanaa- Jesusoneein curuajaiha.’ naaure,” naain jetao, coulurujuenajaaure Jorioocuru letonocuru- nechu aansainein ichaonacauru.

⁸Nii jaun jetaote, niritocuruhane jaun jetao, aonacuruhane que nererojoe-caaure saain- nii cuu nenacaauru cachaauru, nii cocoainanacaihuru, naonjoaihurri. ⁹Nejetaote, nii cocoainanacaihuru rai coriqui tee jetao, Jason, nii aina nenacaauru aina, inae nii nese caje mituhin amuruuha Faboroone jana, acauru rai cainacuruhane coina. Nii aina jetaote, jianenacure.

Bereau turuuruha Faboro aina Silasine

¹⁰Inae nocohecane jana jetaote, luhecotariin, naain Berea nichae, Faboro aina Silasi letoaure jetao, Jesocurisito coreniha- cana nejeraauru, ucuaae cuuruha soronacanejeeine coina. Cuu turuhin jetaote, cuu nenasinacoca asaae turuha cue jetao, Faboro aina Silasi. ¹¹Nii cuu nenacaauru- Jorioocuru jetaote, naain Tesalonecau nenacaauru- Jorioocuru amuritoheriin jetao, caohachaaain suujua coaraain neeure. Nii jaun jetaote, nii Faborohacha beebejei- Jesocurisito beratenojoi aonajeeure, corojeein. Nii jaun jetaote, cojoanoonetojoein, Cana Coaunera Quiricha Inoasi ereretaaure jetao, jiniiquiin, esinaae rauhijiriin aitocuruha Faboro aina Silasine rijiichane coaracuruhane coina. ¹²Nii jaun jetaote, esenetaaure arajiin cachaauru- Jorioocuru, arajiin Curiecocuru aina acauru benecuru- caohachanejeein nenacaauru, naonjoainuri.

¹³Nejetaote, nitohaneein, Bereau neein, Cana Coanera aitoonjoa beebejiha Faborone coitucuuriin jetao cuuhin, cachaauru suujua rohecaea cuure jetao coaiteen, nii Tesalonecau nenacaauru-Jorioocuru, acaauru que nejerateeuruha nii Bereau nenacaaurune coina. ¹⁴Nii jaun jetaote, chajaain caeneenejela-naala, nii Bereau, Timoteo aina Silasi, naaonjoaain ratiriin, luhecotariin jelai caje mituhane coina jetao, Faboro letoaure jetao, cana temura nichae-cuu nenacaauru- Jesocurisito coreniha cana nejeraauru. ¹⁵Nii jaun jetaote, Faboro corianiha cuure jetao, nii aina amuhemuhenaacauru, Atena neseeu tiaain. Nii baiha jetaote, cuu Faboro ratriin cauha cuure, chajaojoaain coaraa cuuruha Silasi aina- Timoteeocurune coina aitiin, acaauru letoaa Faborona jaun.

Atenau niha Faborone

¹⁶Nii Atenau neseeu neein, Silasi, Timoteo, naaonjoaain cohaca nihana jaun jetaote, cuu itolere- araai laurii-cuu nenacaauru ichanohi- ecaanto coaraain jetao, jataain nererojoeae jetao, Faboro. ¹⁷Nii jana jetaote, sinacoca asaae, Jorioocuru aina ita cotaicha rijite jetao, leeochoauru- ita taojiaain- Cana Coanera coroaeraauru ainane maajeein. Nitohaneein jetaote, cojoanoonetojoeein jerichanetojoeein, jeelai que aitiin, ita cotaicha rijitona-jaque, nese cataaun netaojianacaauru aina. ¹⁸Chaen, cuu coroata lauriin nenacaauru- itolere coitucueracuru *filosofooru*, le laurii “epicoreeocuru,” le laurii “estooicocuru,” naaonjoaihunri aina jetaote, Faboro aina, ita cotaain jetao:

“Cha quena ereereje caa nereretanaa inatoroa,” naauruha tabaaurune jana jetao:

“Nejelau ataneu nenacaauru rai chosichuru- bera necaihara,” naaure jetao leeochoauru, raotojoein, oo caje ichanaa Jesusone beebejiha Faborona jaun. ¹⁹Nitohaneein jetaote, niha jataain chatohaneein, mijieineein rucuheneacaine, ita taojiaain rucuhecuruhana jaun jetao, ichatane ucuuno-ajerineeojoaain- Areopago neein, acaauruhacha curuaateihu jetao, Faboro cotijiaain amaaain, cuu turuaain jetao:

“Nii canaacaanu rai- iicha beebejei-ena ecoona- erenaa benaa naineeeina, canacaanu rai, ²⁰Jataain canacaa-nuhacha coitucuhi que ereeina jaunna, ‘Naaonjoaain quene aitoonra.’ naain, canacaanu rai beeine jerichaanu, jataain coitucunaa jerichaanune jaunra,” naaure jetao, ²¹satiin Atena cocoaichaneeuruhane, chaen nejelau atane caje uhin- cuu nenacaauru naaonjoaihunri, niha chatohanaine, aonaain, que ita rai ereereena rautatooruhana jaun.

²²Niritiin Faboro caje bajaauruha, nii niha chatohanaine rucuhecuruhane jaan- ichatane ucuuno- Areopago netiine jana jetaote, acaauru cataaun nichaauraaain jetao:

“Satiin inara Atena cocoaichaneeiche-nete, esinaae rauhijiriin, inara chosichuru corojeein ichaohin neeiche. ²³Nii jaunte, ita taojiaaichene jaancuru nainein, coaracaanne jana, cuuru ne-inara chosichuru rai lenone mocohichene jaancuru rorihuru. Nii rorihuru nainein coaracaanne janate, ‘Chabana coitucuerai Cana Chosi rai’ naain laenanohine- nii leeinjiin rori. Nii coitucuelanaala, inaraacha corojete, Acaihanejei Nena- Cana Coaneranane. Quena, caa inara rai ereere jeein beebejeun.

²⁴Acate, Cana Coaneraneein, itolere, cana rai chaauruatane Coaneraneein, itolere, que nenacaauru Curuaanaa-

neein, itolere, satiin cana janonaa sirichanein ne. Coatia, raajenihane-cacha ichanohineein nenea loreri-Teenforo asaaecha ichaohi. ²⁵Nieichu chaen, rai chaaelai icharaaunu latihei. Acate, itolere cana rai ichaonaa teein, neraain ichaonaana jaanu teein, itolere maajeein coaunaelu cana rai.

²⁶Chaen jetaotechu, jauriaanejeein leeinjiin cacha coaunaelu, caje arajiin nefoeratein, laurilauri catohaneein-cana rai chauratane sacutaain- neenenu que. Nitohanein, cacha coaunaain jetaote, nenajaauru nenajaauru neeuuha le laurichurune coina, acauru ichaona jaannu jelai been jetao, cuu ichaooruhane jinatelu Cana Coaunera. ²⁷Chaen, esenetaain coitucunaa nainihane, coitucuha cachane coinata, nitohanein ichaelu Cana Coaunera. Coatia niqui, cana caje corihae nihei Cana Coaunera. ²⁸Cana Coaunera corenihate, ichaohin, neruru-juuain, naaonjoaain ichaohacache. Inara araaichuru tabaauru- raotojoein erenaa que ereereena inaaureerauru jetaote: ‘Cana Coaunera cajete, nefoeratenanein nihacache,’ naain ererejeto-cure. ²⁹Nitohanein, Cana Coaunera caje, nefoeratenanein nihacachena jaun, nainihe nejelanein, cana suujua cuaain, ‘Aiha coata, ajeri, naaonjoaain caje- cacha ichanohineein nenaachosichuru- ecaantoorune tochanihi jecha, Cana Coaunera,’ naain cana suujua cuaain nihacachene. ³⁰Inoaelu jetaote laaen, coitucunehihaluna jaun, niicha rautaai ichaa cachane jana, inauheneeicha coarajerejetelu jetao, Cana Coaunera. Jana, enenete laaen, inae jinatihana jaan que tihana jaun, coitucuhin nere tonoraa, itolere sacutaain cachane coina berate. ³¹Nitohanein beratihana jaunte, inae Cojoanonaa- que banihatein- niicha

rucujuei que tihane bana, caa chaaurua-tane que, satiin- neinichaachene coareein Cana Coaunera, esinaae rauhijiriin rai cachanein neein-caohachaa in suujua coaraauru coitucuha- nii leeinjiin cacha janijiin niicha ranojoi aina cuaaine coina. Niite raotojoein coitucuhacache, aca rai, nii ichaeraanu que, oo caje ichatein nihalune jaun,” nae jetao Faboro.

³²Niritiin, oo caje ichanarichaa in cachane biha Faborone jaun jetaote, oo baiha ichanaain nenea nainiha cachane esenetaaurenihana jaun jetao, batocure tabaauru. Jana leeochoaauru jetaote:

“Leeocha banana, ii ere aoharihacaa-nuhincha,” naaure jetao Faboro rai.

³³Niritocuruha raine jaun jetaote, cuu ratirinajaain amuhe jetao, jelai caje Faboro. ³⁴Nii jana, tabaauru jetaote, esenetaauruhana jaun, caaijie cuure. Nii jana jetaote, cuu acauru aina cue leeinjiin cacha- Dionisio. Nii jetaote, nii ita taojiaauruna jaan- Areopago- netaojianacaauru bichauhenanein, niha chatohanaine rucuhanein nenaane. Chaen leeinjiin ene- Damari-sinein curuajai, chaen leeochoaauru naaonjoainuri jetao, Faboro caaijie cuure.

Coriintoo turuha Faborone

18 ¹Nii baiha jetaote, nii Atena caje amuhin, Coriintoo cue-Faboro. ²Cuu jetaote, Ponto batane caje uaa- leeinjiin Jorio- Aquila neein curuajai aina, ita ruure. Aca jetaote, rai comasai- Firisila aina, enanejeein Italia caje turuhin neeure Coriintoo. Nii bana, Romanocuru curuaanaacuru curuaanaa- eenferadoro neein nenea- Culaodio, nii Roma caje, satiin mituuruha Jorioocurune coina, mijieinetiin aitohane jaun jetao, jelai caje mituure. Nii jana jetaote, acauru rene turuha cue jetao,

Faboro. ³Jerichanejeein, acaauru rijijieein, jacari caje lohanarinu que, acaauru ichanaa que amihaniha acaentonaina jaun- coaranaaca cue Faboro, cuu acaauru aina neein, jiniiquiin acaauru aina amihanihane coina. ⁴Cuu jetaote, nebetacanaa cojoanonaa bana naineein, ita taojiaain- Cana Coaunera bajaauruha Jorioocuru- runa jaan loreri- sinacoca asae turuha cuhin nejesina ne Faboro. Cuu Jesocurisito beratenojoi beebjeein, Jorioocuru relaain, Jorioniheichurune maajeein relaane, esenetana nainecuruhane coina.

⁵Inae Masedonia batane caje, rene turuuruha Silasi aina Timoteeocurune jana jetaote, jacari caje lohanarinu namihaneeo jianeein, Cana Curuaanaacha beratenojoi benaacha que ne Faboro, rauhijiriin, aitoha Cana Coaunera Quiricha Inoasi cuhanene rijitojoeein: “Jesosote esinaae rauhijiriin canaacha cohajei Mesihasi ne,” naain coitucuruha Joriocurune coina. ⁶Ne jetaote, rautaaurenihana jaun, aina obajeein cotaain, Faboro necoeje chanuure Jorioocuru. Nii jaun jetaote, rautaaurenihana Jorioocuru jaun, jelai caje mituhane, cojounacanu que jetao, cuu cajione romaromaain jetao,

“Inaraacha jerei ineainte, caseteconeein nitajeriquicheeincha. Inae canu enene caje coauneein, cha ujuaihoneein nihaaunra. Inarate, nii ujuaihoneein neeiche. Inae aihane amuhanu. Ena caje coauneeine Jorioniheichuru rene aihane cureeunnicha,” nae jetao Faboro, Jorioocuru rai.

⁷Nitohaneein, nii ita taojiaauruhana jaan sinacoca caje mituhin jetaote, rohan nena- leeijiin cacha- Tisio Josto loreri asae turuha cue Faboro. Nii cacha jetao, Jorionihei. Ne jetaote, esiaaen rauhijiriin laaen Cana Coaunera ere

esenetaain corojeein, tonoraera ne. ⁸Nitohaneein jetaote, sinacoca curuaanaa- Curisifo, saain rai bereecuru, rai comasai, saain rai loreri asae nenacaauru aina jiniiquiin, Cana Curuaanaa ere esenetaaure. Nitohaneein jetaote, arajii- Coriinto cocoaichanecuruhane jetao, beebjeiha Faborone aonaain esenetaauruhana jaun, baotisa- nojioonein neeure.

⁹Le janotiin cuhane jetaote, coetacai rijitojoein jetao, Faboro siniha cue Cana Curuaanaa. Sinihu, rai ecocohin jetaote: “Coaa canu ere beebjeeine jianihara. Jiaohine casiin jianeeinera. ¹⁰Canuna, ii aina nereeunicha.

Nerihaaain, caohachanainejeein chatohaneein cheterata, cau, caa nese que neeuruha arajiin canu cachaaurune jaunne ichei aitoonra,” nae jetao, Cana Curuaanaa, Faboro sinihu. ¹¹Nii jaun jetaote, coroata jaanacai cataaun tiaain jetao, nii Coriintoo neein, jelai cocoaichacuru rai, Cana Coaunera ere beebje jetao Faboro.

¹²Ne jetaote, Acaiha batane coberenadoro neein niha Calioonne jana jetao, Faboro aina nejerateein jetao, ita taojiaaure Jorioocuru. Nitohaneein, ita taojiaain jetaote, Faboro mucuhin amaure, ita colurujueeuruhana jaan coloheri- *tribonal* asae. ¹³Nitohaneein, mucuhin amaain, coberenadoro acatiha turuaain jetaote:

“Caa cachate, cachaauru suujua tacaain, nejelaunee Cana Coaunera corojeein tonoraauruha cachaaurune jereein ne, cana rai cocoaeraa nitohanai ichaonaane saijiieein, rautanaa cojoaela- naalara,” naauruhane jana, ¹⁴cuu irihane coina, aonajiha Faborone jana jetaote, cuu Jorioocuru cotaicha rijitiin jetao:

“Jataain baaso ichaain, sonajaain jaohin, naaonjoaain que inara ere

nihane jana nihanena, nainereean canu roerohecaachene latelanaala, jeriquichene rijijieein, inara- Jorione-quichene aonacaaun tonajelanaalanera.

¹⁵Nena, inara aohana naineneean, joaereein, nitohaniha inara ichaona jaun aitiin, inara raajenihane inaraacha coacui que aitocohichene jaunra. Inara nii rucuhecuche. Coatia canu, nii que enonaa nainihaaun, nitohanai rucuhe-ranu que nenihanune jaun,” naain jetao, ¹⁶nii ita colurujueeuruhana jaan coloheri- *tribonal* caje, nii Jorioocuru sitae, coberenadoro Calioon.

¹⁷Nii jaun jetaote, sinacoca curuaanaa- Sosetenesi mucuhin jetao, faohacure, nii ita colurujueeuruhana jaan coloheri- *tribonal* acatiha teein. Ne jetaote: “Coaraain nainauruina,” naain jetao cuu coarajenajae coberenadoro- Calioon.

**Antioquihau cauhin, jelai caje
nacoauneein misioneroneein cuhane
nichata satiha Faborone**

¹⁸Araai janohin, Coriintoo nihane baiha jetaote, Jesocurisito coreniha-cana nejeraauru rai necoeure jetao, Aquila- chaen rai sinijiera Firisila, naaonjoaain aina jiniiquiin- Faboro, Siria bataneu cuuruhane coina. Nitohaneein cuhin jetaote, cucuana cuhane cuujueein, Sencurea turuhin jetao, caje amuhane coina bote cuhane fau rai, rai couturi loroaecaain joerate jetao Faboro, Cana Coaunera rai naitoon-joanlu nainane cojounacanein.

¹⁹Nitohaneein cuhin, inae Efesoo turuhin jetaote, cuu Aquila ratiri, rai sinijiera Firisila aina. Nitohaneein cuu ratiriinajaain jetaote, naain nenea sinacoca asae turuha cue jetao- Faboro. Cuu turuhin jetaote, enohin cuu nenacaauru- ita taojiaeraauru- Jorioocuru rai ereerejeein jetao,

relanajae Faboro. ²⁰Nii jaun jetaote, cuu carajaain acaauru aina nihane coina, Faboro chunaaure. Ne jetaote, ainaa jerelanaala, acaauru rai:

²¹“Jeriha, Cana Coaunera nena, caa baiha inara rene turuha ureeunicha,” naain jetao necoe acaauru rai Faboro.

Nitohaneein, necoeein jetaote, leinjiin bote cuhane fauhin, Efeso caje amuhe Faboro. ²²Nitohaneein amuhin jetaote, Sesareea turuhin, jelai caje coauneein, atane choae cuhin, Jerosaleeun turuha cue Faboro, cuu nenacaauru Jesocurisito ranojoinunru coaraane coina. Nii baiha jetaote, caje Antioquihau cue jetao- Faboro. ²³Nii baiha carajaaajoaain neein jetaote, coaiten amuhemuhena nunuhetein, itolere Galasia batane, Firijia batane, naaonjoainuri sacutaain amuhemujueein, Jesocurisito esenetaeraauru suujuatein, acaauru suujua lararajiae jetao Faboro.

**Efesoo Jesocurisito que
ereerejihia Aforone**

²⁴Nii jana jetaote, amuhemuheca Faborone naniha, Efesoo turuhe jetao, leinjiin cacha- Alejaandiria cocoaicha- Aforoneein curuajai. Nii jetaote, caohatiin Cana Coaunera Quiricha Inoaei coitucuhin, raotojoein ereerejeein, cacha relanaa coitucue jetao. ²⁵Aca jetaote, esinae rauhijiriin, Cana Curuaanaa aitoonjoa coitucuhin, esenetaain, tonoraain nenaane. Nii jaun jetaote, raotojoein ereerejeein coroaajeein, rauhi cuhane cuaain, Jesoso aitoonjoa beebejeein, que cacha relae. Ne jetaote, Jesocurisito esenetaeraauru rai, rai Suujue tiha Cana Coaunerane coitucuhelanaala, acaihanejeein Cana Coaunera ere tonoraera neein niha cachane coujounacanu que, cacha baotisaa Joaan neecha coitucuujiha natiin jetao, nitohaneein cacha relae jetao, Aforo.

²⁶Nitohaneein jetaote, chaque tonaje lanaala, ita taojiaauruha Jorioocuruna jaan loreri- sinacoca asae cacha relae, satiin aonajera urichoo. Nii jana cuu neein aonajiha Aquila, rai sinjiera Firisila ainane jaun jetao, cotijiaain bujuaihu amaain jetao, rauhijiriin jeriha Cana Coaunerane rijijieein jetao, beeure Aforo rai, jelai amuritoheriin coitucuhane coina. ²⁷Nii baiha jetaote, Acaiha batane cunaa jeriha-Aforone jaun jetao, quiricha laenaain, aina letoaare, nii Acaiha nenacaauru- Jesocurisito esenetaeraauru rai, caohachaain belaaain raauruhane coina. Inae Acaiha turuhin jetaote, Cana Coauneraacha belainojieein- Jesocurisito- esenetaeraauru coroatajane jetao, jataain Aforo. ²⁸Nitohaneein jetaote, rauhi coaraain, rauhi cuhane cuaain, Jorioocuru rai ere, satiin aonajera urichoo. Nitohaneein, acaauru rai ereerejeein jetaote, acaauru rai Cana Coaunera Quiricha Inoaesi ereretae jetao, Cana Coaunera jerenohineein, letononeein Mesihasi niha Jesoso ne que, aitoha Cana Coaunerane beein. Nii jaun jetaote, chunijiu cuaain tonaain Aforo batiin tonaain erenaa nainecurene jetao, Jorioocuru, acaauru que coarateein aithana jaun.

Efesoo turuha Faborone

19 ¹Coriintoo niha Aforone nainiha jetaote, Efesoo cue Faboro. Efesoo turuhane coina jetaote, ichtatane tabai ucuuno que iniin, ichtatane tabai choae situhin, turuha cue jetao, Efesoo Faboro. Cuu jetaote, le laurijieein Jesocurisito esentaeraauru aina ita eruure jetao. ²Nitohaneein, runajaain jetaote, acaauru rai:

“Tana, Jesocurisito esenetaichene nunuheteichene bana, inae Cana Coaunera Suujue raain neeicheluneta,” naain acaauru caje bajaa Faborone jana jetaote:

“Aihahacaanuta. Coatia chaabana niritiin, esenetaeraauru rai, rai Suujue tiha Cana Coaunerane coitucuhaacaanuta,” naain tonoraauruhane jaun jetaote:

³“Chatohanai quetejian, baotisanoojoneein neeicheta,” naain bajaa Faborone jana jetaote:

“Cacha baotisaain coujunacatihalu Joanne rijijieeinchate, canacaanu cojunacateein neeurelura,” naain tonoraauruhane jaun jetaote:

⁴“Aiha chuhisicha. Nii Joaante chuisci rauhijiriin Cana Coaunera esenetaeraauru cojunacateelu baotisaain. Chaentechu nii caajie turuhenein- Jesoso esenetaauruha saain cachaaurune coina beebejelu,” naain beebejiha acaauru rai Faborone jaun jetaote, ⁵Cana Curuaanaa Jesocurisito coreniha, inae baotisaain cojunacatenohineein neeure. ⁶Chaen, acaauru choae biji merecaain, Cana Coaunera bajaa Faborone jana jetaote, acaauru choae fauha uha Cana Coaunera Suujuena jaun, itolere nejelau ere que ereein, aitoroatiha Cana Coaunerane beebejeeure. Nitohaneein jetaote, rai nere cuhanene maajeein Cana Coaunera beratenojoi ita rai beebejeeure. ⁷Itolereenein jetaote, lechoonca coroatajaure, nii cachaauru- Cana Coaunera Suujue raeracuru.

⁸Nichata ateein, cuu neein jetaote, netaojiaauruha- Jorioocuruna jaan loreri- sinacoca asae cuhin, Cana Coaunera ere beebeje jetao, Faboro, chaque casilanaala. Cuu jetaote, “Naaajoarichaaain nii Cana Coaunera Cojoananaa- Ena Turunaa,” naain beebeje, esenetaauruha cachaaurune coina. ⁹Ne jetaote, tabaauru, nechu jataain, cotaiha esenetana jerecurenihana jaun, esenetana jerelanaala jetao, satiin aonajeurera urichoo

baasoneein, nii Ena Turunaa Ichaonaa que ereeuruhane jaun jetao, cuu ratirinajaain, cachaauru relaa- leeinjiin cacha- Tiranoneein curuajaine jaan- coloheri asaae, nii Jesocurisito esenetae- raauru- jitariin amaain jetao, nelonae Faboro. Cuu jetaote, cojoanoneto- joein, Cana Coaunera ere beebeje jetao, Faboro. ¹⁰Nitohaneein jetaote, cuu coroata jaanacaain, cacha relaane jaun jetao, Asia batane sacutaain nenacaauru, Jorioocuru, Jorioniheichu- rune majeeinchuru, Cana Curuaanaa aitoojoan beebejiha Faborona jaun, aonacure.

¹¹Nitohanihana jaun jetaote, Faboro aina cuaain jetao, itolere cojoaelanaaco- joai ichaain jetao, cachaauru notajae- Cana Coaunera. ¹²Nitohaneein coroata- janiha Cana Coaunerana jaun jetaote, Faboro que, cajione turuaain, amaain jetao, cunaitenacaauru dadaauruhane jetao, nerautaaure- itolere cunai caaun cunaitenacaauru, itolere coitucuchuhi- churu ichanaaneeinchuru- cunaitena- caauru caje jetaote, nii coitucuchuhi- churu sitae.

¹³Nii jana jetaote, neeurelu- benane- neein nenacaauru- Jorioocuru- amuhe- mujueein- moconajaera ichanaaneein cunaitenacaauru rautaeraniha nenacaauru. Niichuru jetaote, “Jesoso coreniha mituuche,” naain, nii suujua cuhane moconajaera letono sirichaauru caje sitaauruhane caina jetao, coacuhin, ichaa Faborone rijijieein jetao, nii moconajaera ichanohineein coitucu- chuhi que, cojoeonacaauru rai jetao: “Faborohacha beebejei- Jesoso coreniha, nii cacha caje mituhin amuura,” naaure jetao.

¹⁴Leeinjiin Jorio- Esesebaneein curuajai calaohichuru- caaunsineein nenacaauru jetaote, nitohanecure. Nii Esesebate, saseredotecuru curuaanaa-

neein ne. ¹⁵Ne jetaote, coitucuchuhi- churu sitanaa jerecuruha, que cojoeonaa cajene jana jetao:

“Canuna, Jesoso coitucuhin, Faborone maajeein coitucunra. Jana laaen, inara coitucuhaaun. Cha nequiche chaainti inarata,” ¹⁶naa nii cacha suujueniha netiin- nii coitucuchuhine rijieeoritiin jetaote, acaauru choae tacaatiin jetao, sonajae jetao, acaauru amuritiin nunujuetohana jaun jetao, banejela- naala jataain cunaitanajaain, jitariin acaauru cajionene majeein, caohacha- nainejeein, soaisoairiin sonajae jetao, nii coitucuchuhi que- cojoeona cacha. Nii jaun jetaote, machorojoa machoro- joaain jetao, nii neeurunajaa loreri caje jetao, soroore. ¹⁷Nii nitohanihana jaun jetaote, satiin- nii Efesoo nenacaauru Jorioocuru, Jorioniheichuru, naaonjoaihunri- satiin, nii coitucuhin casihure. Nii jaun jetaote, itolereenein, Cana Coaunera Calaoi niha Cana Curuaanaa- Jesocurisitone coitucure jetao, beebejeeuruhane jaun.

¹⁸Nitohaneein jetaote, arajiin cachaauru nii coaraain esenetaeraauru, satiin, aonajeeuruha cachaaurune jana jetao, jauriaa jaiti coitucuelanaala itolere baaso- acaauruhacha ichai beeure jetao, jitariin caohachanaine- jeein. ¹⁹Chaen, arajiin benanecuru jetaote, nii nerelaauruhana jaan- acaauru quiricha jitariin uhaain jetao, satiin coarajeeurera notaracae tein, jitariin mocoore. Nii acaauruhacha moco- acaauru quiricha core rocooruhane jana jetaote, saoquichoona oaraacani, acaauru coriquineein jataain coretineein jetao mitue rai core. ²⁰Nii jaun jetaote, itolere sacutaain, jelai amuritoheriin Cana Curuaanaa Jesocurisito esenetaain jetao neeure cachaauru. Nii jaun jetaote, esinaae rauhijiriin nelateein- itolere

ichaa- Cana Coaunerane coaracuu-
ruhane jaun jetao, leeochoaauru
cachaauru netonoai esenetaaure.

²¹Nii nitohanihane baiha jetaote,
coaiteen Masedonia, Acaiha,
naaonjoaihunri, cunaa jere jetao,
Faboro, nii caje cuaain, Jerosaleeun
cuhin, caje coaauneein Romau cunaa
jerihane jaun. ²²Nitohaneein coacuhin
jetaote, ichoaichania coroatajai-
coroatajaneraauru- Timoteeo, Erasto,
naaonjoaihunri letoae jetao, Masedo-
niau, Faboro, turuha curichaaine
beeuruha- ichoaichaniha, amaaine
coina. Nitohaneein, ichoaichania
letoanajaain jetaote, nii Asia batane que
nedae jetao, Faboro.

**Faboro aina, rai corihacuru que
nejerateein, ita rohecaauruha Efesoo
nenacaaurune**

²³Nii bana jetaote, satiin- nii Efesoo
nenacaauru jetao, ita que nejerateein,
ita rohecaure nejesinajein, nii Ena
Turunaa Ichaonaa que, acaauru
relaauruhane jana, esenetaauruhane
coreniha. ²⁴Leeinjiin cache- Demetirio-
neein curuajai- coata que amihanenaa
jetaote, nii leratera ne. Nii Demetirio
jetaote, itolere ecaantoneenanain ichae
jetao, coata caje, nii acaauru
chosineein- acaauruhacha tei- eneneein
nena- Aretemiasa rai Teenforo
cojounaca sirijicoaain. Nii que coretiin
que cachaauru rai necoreteein jetaote,
nii aina amihanenacaauru coretena-
jaque jetao, jataain coretiin. ²⁵Nii
Demetirio jetaote, jitariin coroatajane-
rauru cotijiae jetao, leeochoa
cachaauru- acaauru rijijieein- jelai-
ecaanto icharaneein- amihanenacaauru
cotijiaain jetao, acaauru rai jetao:

“Niha naaonjoaain- raotojoein
amihaneein- raotojoein ichaohacache-
najaan- cana amihaneeo core aasaerane

jaunna, inara cotijiaaun, nii que erenaa
coinara,” nae jetao, nii coata caje-
ecaanto ichaera- Demetirio. ²⁶Niritiin
jetaote: “Inara netonaite, raotojoein
coitucuhin, inara uricho que, nii
aonaain neeichera. Nii Faboro naain
acaauruhacha curuaatei cachate,
cajianeein amuhemujueein, cachaauru
rai: ‘Nelatihejie caa canaacha ichai-
cache ichanohineein nena- cana
chosicha.’ naain, arajii cachaauru rai
bihana jaun jetaote, inae esenetaaure
arajiiin cachaauru. Coatia leeinjiin cau
Efesohacha nitohanai ichaaita.
Itolereenein, Asia batane sacutaae
lalajeeinte, amuhemujueein, nii chosi
esetaauruhane jiaanecuruha cachaau-
rune coina relanajaane jaun, esenetaa-
coaaure. ²⁷Niite laaen, jataain cana rai
ulunaain nedaera. Nabana chunei, cana
amihaneeon coretena nainenihane, cana
amihaneeon niha natiinte, nitajenaa
naine. Chaentechu, Asia batane
sacutaain, satiin chauratane sacutaain
coroaenjoineein niha, jataain nelateein
nihane corenihane saijieein, caa cana
rai chosi- Aretemiasa que jaolecooru-
reein cachaaurura. Chaen inae turuuru-
rihaain rai Teenforo asaee, coroaeca,”
nae jetao Demetirio.

²⁸Nii jaun jetaote, nii aonaain
obajein nujuae soaisoaain jetao:

“Caohachaaain laraajiiin neeine- Efeso
cocoaichanichaachene- chosi- Aretemia-
sara,” naure jetao, nii coata que-
amihanenacaauru.

²⁹Nitohaneein jetaote, cajianeein, ita
cotaicha rijitiin jetao, nii coroatajai
cachaauru- Faboro corianiha cunacaauru-
Masedonia caje unacaauru- Caiho, chaen,
nii leeochoa- Arisitaroconein curuajai
naaonjoaihunri curuataain jetao, codoone-
tiin mucuunajaain jetao, acaauru tararaain,
ita taojiaain- chaelai coaracuruhana jaun-
teatro neein acaauruhacha curuaateihu

amanajaain jetao, ita taojiaeraauru acatiha jetao, tenajaa cuure. ³⁰Nii jaun jetaote, acaauru coreniha enohin, cachaauru rai, iriha cunaa jeriha Faborone jana jetao, caohateeure, ecu nenacauru- Jesocurisito-esenetaeraauru, nabana, chatohaneein teeuruhane coataa. ³¹Nii cuu- Asia batane nenacauru- cocoainanacaihuru tabaauru jetaote, Faboro belaichaauru nihana jaun jetaote, “Jiaonriha jera, nenoainera,” naerateeure jetao. ³²Nii nainiha jetaote, nii ita taojiaauruhana jaun jetao, ita rai cajianein nujuae sooaichure jetao, ita rohecaain. Jana, tabaauru jetaote, “Naaonjoaain coinata ne caa netaojia-naara,” naain jetao, coitucurene. ³³Nii jaun jetaote, acaauru tabaauru jetao, “Naaonjoaana jaunte, nii rucuhacuruhane coina, netaojiaaure,” naain jetao, leeinjiin cacha- Alejaandoro neein curuajai rai, beeure. Nitohaneein rai beratein jetaote, acaauru ajiniha tein jetao, Alejaandoro sarasaracaain amaare Jorioocuru, nii netaojianacauru acatiha, cuu nichaauraaain, nii ita rohecaeraauru rai, iriha Jorioonecuruhane corenihane coina. Nii jaun jetaote, turuhin, nii netaojianacauru rai jetao, biji sarasarari, curuatoroain aonajeeruhane, acaauru rai, satiin urichoo, Jorioocuru coreniha, irihane coina. ³⁴Nitohaneein, irihane jana jetaote, nere cajeecha nainacorichure, acaentonai, Jorionihane que. Nitohaneein, nainacoriin jetaote:

“Caohachaain, laraajiin neeine, Efeso cocoaichanihakachene- chosi- Aretemiasara,” naare jetao, ita rai nujuae soaajiin, carajaain, coroata oraain, acaauru chosi niha- Aretemiasa beuruhane jana, esenetaaurenihana Jorioocurune coitucuuruhane jaun.

³⁵Nii jana, nii neseu- acaauru raichaaelai que- ereeuruhane- laenaain rucuhera- “secretario” jetaote, inae aitoa acaauru raine jaun, sitonaaonjoauruhane jana jetao, acaauru rai:

“Aonacuche, Efeso nese cocoaichacuru. Satiin- itolere cachate, nii jataaincana rai nelateein nena- cana chosi loreri- Teenforo, chaen, nii dede cajejerinein Aretemiasa tocohaneein nalunaane maajeein beraihane coina nena- neein niha- caa nese cocoaichanihakachanene coitucuurera. ³⁶Nihei chunei, nii que, ‘Nohanenaa,’ naain iriha chuneine jaanu. Nii jaun, inae nii jiaanecuchera. Coa obaecache. Coa caohachaain inara suujua coarihei amunein, chatohaneein, baaso chana coaucachera. ³⁷Coatia, chatonaain cana chosi que ereein, niheichu Teenforo asaae asijiauhin naaonjoauruha caa inaraacha mucuhin inaraacha uhaauri- cachaaurune coaalanaalata. ³⁸Chatonaain, acaauru colurujueein niha, nii coata que amihanenaa- Demetirio, nii aina amihanenacauru ainane, taute neeure- nii rucuheraaunu que nenacauru- joesiocuru, chaen, acaauru curuaanaacuru, naaonjoaihunri. Niha chunicoha, acaauru coulurujueerane, taa, nii rucueraaunu que nenacauru rene amanajaauchete, neruujueeruhine, ecu le cachaauru jabereco coreniha irihane coinara. ³⁹Niha esinaae rauhijiriin chatohanaine, rucuhena jerequichene, satiin cocoainanacaihuru aina, ita taojiaain, nii rucujueein neeuchera. Nii banate, esinaae rauhijiriin, caohachaain ita taojiana esinenein rucuhericuicheeincha. ⁴⁰Jana, jerichanejeein, sacunaa coauquichenete, cana colurujuenaa nainecurureein, ‘Cana jecha cachaauru suujua rohecache,’ naain. Nii quete, jataain lunaain niyacachera. Charijieein nejeein, coitucuhin, cana caje, ‘Chatoaneein, leratein, ita rohecaureta,’ naain bajaauruha cocoainanacaihurune, tonaante berichaacheta,” naain jetao:

⁴¹“Chajaaíncha cauhachanichuchera,”
nae acaauru rai, nii chaelai que
ereeuruha nii neseeu nenacaaurune-
laenaain- rucuhera.

**Masedonia, Curesia, naonjoaihunri
turuha cuha Faborone**

20 ¹Inae nitohaneein, cajianeein,
ita rohecaauruhane jianecu-
ruhane baiha jetaote, jitariin, nii
Jesocurisito coitucuurera cotijiaan
jetao, suujuatenajae- Faboro. Nitoha-
neein, suujuatenajaane baiha jetaote,
acaauru rai necoeein, Masedonia batane
cue jetao. ²Cuu jetaote, neseeu
neseeu naineein, cuu nenacaauru-
Jesocurisito coreniha cana nejeraauru
rene bedaeneein, cuu acaauru
suujuatein, jelai amuritoheriin
Jesocurisito esenetaauruhane coina,
acaauru rai ereereje Faboro. Nitoha-
neein, acaauru rai ererejeein, acaauru
suujua lararajihane baiha jetaote,
Curesia batane cue jetao Faboro.
³Nitohaneein, Curesia batane turuhin
jetaote, cuu ne nichata ateein. Cuu
nichata ateein nihane baiha jetaote,
inae Siriau cuhane coina, bote cuhane
fau rai, nihane jana jetaote, que
necosuujuaauruha Jorioocurune
coitucuriin jetao, jelaiha atane ichoae
cauha cunaa jere jetao, nacoauneein
Masedonia choae situhin cuhin, Faboro.
⁴Nii janate, canacaanu corihaniha uure,
Berea cocoaicha- Firo calaohi Sofate,
chaen Tesaloneca cocoaichacuru-
Arisitaroco aina Secoondo, chaen
Derebe caje unaa Caiho, chaen
Timoteo, chaen Asia batane caje
unacaauru- Tiquico aina- Torofimo,
naonjoaihunri. ⁵Satiin niichurute,
ichoaichania amain, Toroasihu,
canacaanu cohaca cuure, Masedoniau
canacaanu ratiriin. ⁶Nii janana,
canacaanu, Filipino caje nesaruhacaanu,

leeinjiin bote cuhane, jorerera colane
ichanohi faan quihuruhana jaan
cojoanona- Fasocoa beseta bitoacaa-
nune baiha. Nitohaneein nesaruhin
cuhina, saoque janone cuhane, turuha
cuhacaanu Toroasihu. Cuuna canacaanu
cohacuruha, nii ichoachania
cunacaauru- Jesocurisito coreniha- cana
nejeraauruna jaun, cuu erunajacaanu.
Nii Toroasihuna, caaunsi janoneein
nihacaanu.

**Toroasihu nenacaauru
rene bedainiha Faborone**

⁷Cuuna, semana nunuhe cojoanona
bana ita taojiacaanu, cana coreniha
ohalune coaacuruha, satiin esenetaeraa-
rune coina, faan chaluhin quihalu-
Jesocurisitone rijijjeein, ita aina jimiiquii
faan chaluhin quihacaanune coina.
Nitohaneein netaojiaacaanune janate,
Jesocurisito coreniha cana nejeraauru rai,
carajaain itolere que, dede cataaun tiaain,
ereereje Faboro, nii cojoanoo, jelai caje
amuhane nihane jaun. ⁸Nitohaneina,
leeinjiin loreri ucuunetiin nena nichata
coarana saatono que, netaojiaacaanu.
Cuurute, nihacoae arajiin conooru,
moconojoineein. ⁹Nii janate, jelai caje
nemarote, leeinjiin enamanaa- Eoticoneein
curuajai. Acuujuua laajoiri bacuujuaniha
lauhequii, cuu carajaain ereereca
Faborone aonajihana jaunte, amuritooriha
sinirena jaun, nemarote, nii loreri
ucuunetiin nena nichata coarana caje. Nii
janate, soroneein fauhin, michuuruhane
jana, inae ohe nii enamanaa. ¹⁰Nii jaunte,
fauhin nii enamanaa que baluunetiin, cuu
nenacaauru cana nejeraauru rai:
“Coa nesoonetohachera. Esinaaete
niqui inae ohera. Nete, inae ichanaera,”
nae Faboro.

¹¹Nii baihate, jelaiha iniin, faan
beunebeeunein chaluhin quihane
baiha, coaiteen janohajeein ereerecane

baihate, inae jelai amue. ¹²Nitohaneein, nemaroteein oha nii enamanaane jana, oo caje ichatiha Faboro aina cuaain Cana Coaunerane jaunte, jataain que nellararajiaaure.

Toroasi cajene Miletoo cuhacaanu.

¹³Nii janana, ichoaichania bote cuhane cuhin, Asoo, Faboro cohaca cuhacaanu, aca nitohaneein jereein, atane ichoae cuhana jaun. ¹⁴Inae nii Asoo, ita ruhacaanune janate, canacaanu aina, bote cuhane faain cue Faboro, Mitileneu. ¹⁵Jelai caje nesaruhinna, cojoanoo Quihoo situha cuhacaanu. Nii cajena, le janohin turuha cuhacaanu, Saamo cofauhanau. Cajena cojoanoo cuhin, turuhacaanu Miletoo. ¹⁶Asiau jeloon cuhin, carajanaa jerenihana jaunte, Efesoo cunaa jerene Faboro, Jorioonecuruhane beseta-Feentecosetesi bana Jerosaleeun nenea jerihana jaun, chajaaajoaain Jerosaleeun turuhane coina.

Efesoo nenacaauru- Jesocurisito ranojoihunru- bichauhenaauru rai ereerejiha Faborone

¹⁷Inae Miletoo turuhinte, jelai caje coaaneein, Efesoo nenacaauru-Jesocurisito ranojoihunru bichauhenaauru cotiharate Faboro. ¹⁸Inae turuuruha nii niicha cotiharateeurine janate, acaauru rai:
 “Cau caa- Asia batane que turuhanune caje coaaneein, inara ainaacha ichaohanulune jaunte, inara raotojoeein canu ichao coitucuhichera. ¹⁹Itolere janonaa banana, joaereein cacha rijijieein inara aina amuhemujueein, Cana Curuaanaacha jerenohi ichajeein nerejetoonly, casuujua fononoichuru, itolere necairichanaa abaantain, canasinee rijitocuruha Jorioocurune abaantain. ²⁰Nena, atiin jianelanaala,

inara caohachanu que, tabaauru que inara loreri asae, tabaauru que nenaanaja cataaun, naaonjoaihun teinchuru, satii aonajeerera urichoo inara rai, Cana Coaunera ere beebejeein, inara relarejetoonly. ²¹Chaen nech, Jorioocuru rai, Joriooniheichuru, naaonjoaihunri raine maajeein: ‘Coaiteen enacoaunein Cana Coaunera ere tonoraain, rai Calaohi- Jesocurisito netonoai esenetaain tonoraauchera,’ narejetoonly. ²²Enana laen, inae Jerosaleeun cureeuni, ucuae caletoha Cana Coaunera Suujuene jaun. ‘Naaonjoarichaauni cuura,’ naain coitucuelanaalana, caa cureeunicha. ²³Leenjiin, neseuru naineein, cuhanunejaauru naineeinchurute, cuu turuhanune, caresero cuhane caenoaain, cacairichaaaurichaaaine benajaque canu rai, Cana Coaunera Suujue, acaihanejei niichane coitucuujuueun. ²⁴Nena, chaque tonajeneun. Coatia chaque nelatihei canu rai, canu ichao. Nenacae-najian, cacairichaaauruhane que nellararajiaain, rachoojoein caletooa Cana Coaunera Calaohi- Jesocurisitona jaan nainana jereun. Niicha berateierenaa caohati beebejeein, jataain cacha belaiha Cana Coaunerane maajeeinna beebejereunni.

²⁵Esinae rauhijiriine, satii, cau neniquichene raina, beeoricheeuni, Cana Coaunera Janonaa beebejihanune aonajera neeichene, coatia inae chunei enacoaunein cacohararihaain. ²⁶Nii jaunna, enene inara rai aitona jereun, rauhijiriin, nihei chunei coreniha, cha ujuaihoneein nenerihanuhine jaun, ²⁷nii chunei que suujuelanaala, satii cacha urichoo, Cana Coauneraacha jerei beebejihanune jaunna, cha ujuaihoneein nenereunni. ²⁸Aihana jaun, itolere que nainaaain, necohalajiin, caohachaaain necoeraain neein, Cana Coaunera rai ita

taojiaeraauru beraihuhe, acaauru coreniha, coroso que ohalu rai Calaohine jaun. Niicha ranojoihunru beraichanu quete, inara cotijiaain, nii beraichaanu que inara te Cana Coaunera Suujue. ²⁹Inae amuhanune baihate, turuha uurureein nechu aansai atabinaaeneein cache quicha rijijieein nenacaauru- cachaauru, nechu jataaen Jesocurisito ranojoihunru itajeene rijitiin. ³⁰Chaente, inara tabaauru nihanatiin, nechu jataaen joareein caje rocohin, relaa cuurureein, nii casaje esenetaain, acaauru aina cuuruha Jesocurisito ranojoihunrune coina. Nitohaneente, nechu jataaen casaje que, cache relaa cuurureein, suujua caje rocohin. ³¹Nii jaun, inara aina, nichata ajaanacaain nihanune bana, cojoanoo netojoeein, janotiin inetojoeinchuru, inara suujuaterejetocaaunlu, casuujua fononohine coacuhin, que nainaan fonohalajiin ichaoche.

³²Nii jaun, Jesocurisito coreniha-canejeraneein nenacaauru, caa inara rai- quicha beebejei- naitoonjoa nerete, inara coroatajanereein, jelai amuritohe-riin caohachaaen coitucuhin, esenetaichene coina. Cana Coaunerate naine satiin rai cachaneein neeninuru rai aitothane tocuhaneein, inara coroatajanihane, nitohaneein coitucuhin esenetaeraauru coroatajanihane coina aitohaluna jaun. ³³Coatia, canu caohachanu que, inara relareje-tohaaunlu, nirijieein core colane. Nieichu, chunei cache cajione bajareje-tohaaunlu. ³⁴Nii jaunte, inara raotojoeein, cacoi que amihaneein quicha latei raain, canu aina nenacaauru rai netonaine, acaauruhacha lateine majeein ranune coaraain coitucuhichelu. ³⁵Nitohaneein, inara netonai, itolere janonaa bana ichaohichene coinana, inara que

coarateein, inara rai aitoraetoonlu, chaelai que jataaen carichainejeein nenacaauru coroatajanequichene coina: 'Nenacatejjan, tihacane, raacane amuritoheriin raotojoeein nenea nainichaa, chaelai que, cairichainejeein nenea rai, cha teein coroatajanichane.' naain cana relaalulu Cana Coaunera Calaohi Jesosone coacuhin ichaquichene coina," naain jetao, acaauru suujuate Faboro.

³⁶Niritoha, acaauru raine baihate, neseonraain, acaauru aina jiniiquiin Cana Coaunera bajaee Faboro. ³⁷Nitohanihane janate, satiin Faboro que baalu baluuneeinchuru, loalocoaainchuru coisichure. ³⁸"Inae caachanijia cacoharariichenera," naain rauhijiriin biha Faborone jaunte, jataain coinaderaaure. Nii baihate, corianiha cuure, nii cunaa jerihana jaan- bote nenajaun tiaain.

Jerosaleeun cuha Faborone

21 ¹Nitohaneein, cuu Jesocurisito coreniha cana nejeraauru ratiriin, leinjiin bote cuhane fauhin, cucuana cuhane, rauhijiriin cuhinna, Cos cobenau turuha cuhacaanu. Nii cojoanoona, Rodasi cobenau turuhacaanu. Jelai caje coauneeina, turuha cuhacaanu, Patara neseu. ²Nii Patarauna, leecha bote Fenisiau cunaa eruhin, cuhane fauhin cuhacaanu. ³Nitohaneein cuhinna, Chifere cobena coarajejin situujihacaanu. Caje situhinna, cana ajaabiji nichajai que tacaain, nii Chifere ratiriin cuhacaanu, rauhijiriin Siria batane tiaain. Nii Siria auhaniha nenea Tiro cofauhanau, niicha amai rucuhele ratirihane niha nii botena jauna, cuu najauriha cuhacaanu. ⁴Cuuna, nii Tiro neseu, Jesocurisito esenetaeraauru eruhin, acaauru aina caaunsi janoneein nihacaanu. Nii janate, acaauru que coitucueratiha Cana

Coanera Suujuene jaun, coitucuhin, Jerosaleeun cuha Faborone caohateure. ⁵Nena, caaunsi janoneein, cuu, acaauru aina nihacaanune baiha, inae jelai caje amuhacaanu. Nii janate, satin, canacaanu corianiha uure, acaauru sinijierauru, acaauru bereecuru, naaonjoaihunri aina jiniiquiin, naain nii nese bujuau tiaain. Cuuna, carene ichoae, acaauru aina neseonraain, Cana Coanera bajaacaanu. ⁶Nii baihana, acaauru rai necoein, bote cuhane fauha cuhacaanu. Nii janate, inae acaauru netonai, nenajaun cauha cuure, canacaanu que janoriin.

⁷Tiro caje cuhinna, cucuana cuhaneeincha cuujueein Tolemaidau turuhacaanu. Nii Tolemadauna turuhin, cuu Jesocurisito coreniha- cana nejeraauru eruhin, acaauru neeuruhane coitucuhin, cuu acaauru aina nihacaanu, le janohin. ⁸Nii cojoanoonna, jelai caje nesaruhin cuhin, Sesareea turuha cuhacaanu. Cuu turuhinna, Ferifi rene turuha cuhacaanu. Acate, Jesocurisito coitucuuruha cachaurune caina amuhemujuueein- Jesocurisito bera- “evangelista” neein afosotooru coroata- janeraauru caaunsine ne. ⁹Nii Ferifite, jenaain cacunuque, ichauhenaniha- coaain lanaquelanaala. Nii Ferifi cacunucurute, Cana Coanera caje erena raain- cacha rai beeurera- *profetacuru* ne. ¹⁰Inae janojanoheriin, cuu nihacaanune janate, tajiha turuha uhe Jodea caje, Cana Coanera caje erena raain- cachaauru rai bera- *profeta* Acabo. ¹¹Acate, canacaanu rene turuhin, Faboro ichora raaoriin, canacaanu acatiha, raajenihane biji aina tija taotaain nichojoaainte:

“Cana Coanera Suujuete, carai be. Catohanein jetaote, Jerosaleeun, caa ichora erora teein, nejelau ataneu nenacaauru bijihu tiha cuurureein

Jorioocurura,” ¹²naain, bihana jaunna, Jerosaleeun cuha Faborone caohatiha- caanu, nii Sesareea nenacaauru aina, niqi. ¹³Nete:

“Chanuna chanaain, canu inaderaa- quiche. Canuna, itolere que jatoroaain neeun. Coatia, leinjiin canu ichojoaain, camaauruhaneiecha caina jatoroaain nihaaun. Canuna naineen, Cana Curuaanaa Jesoso coreniha ohanu Jerosaleeunne,” naainte, canacaanu tonorae Faboro. ¹⁴Nii jaunne, inae tonaain chunijihu cuaain caohatenaa nainenihacaanune jaun jihaneein:

“Coanete aihane, aina niicha jerei ichamiin- Cana Coaunerara,” naain jianichaanu. ¹⁵Nii baihana, inae nerujuueein Jerosaleeun cuhacaanu. ¹⁶Nii janate, canacaanu corianiha uure nii Sesareea nenacaauru- Jesocurisito esenetaeraauru tabaauru. Acaaurute, canacaanu amaure Chifere cocoaicha- Manasoon rene, cuu sinihacaanu ainane caina. Inae carajaa Jesocurisito esenetaera neein niha nii Manasoonne.

Saantiaao rene turuha cuha Faborone

¹⁷Inae Jerosaleeun turuhacaanune janate, canacaanu corojeein, canacaanu raure, cuu nenacaauru- Jesocurisito coreniha cana nejeraauru. ¹⁸Nii cojoanoote, canacaanu aina cuhin, Saantiaao rene turuha cuhe Faboro. Nii janate, cuu neeure satiin Jesocurisito esenetaeraauru coaranein nenacaauru- bichauhenaauru. ¹⁹Nitohaneinte, nii jitariin acaauru neeuruhane coitucuhane baiha, acaauru rai jitariin nunuhe caje coaunein, itolere que aina cuaain, Jorioniheichuru netonoai coroatajaniha Cana Coaunerane beebeje Faboro. ²⁰Nii jaunte: “Caohatoha Cana Coaunerara,” naain, Cana Coanera corojeein:

“Inae coaraai- ichaso. Arajii oharaan- canei cana araichuru Jorioocuru

netonoaite, esenetaaure. Satiin acaaurute, jataain cana rai nelatiha Moisesa aitoonjoane que aitiin tonoraa-cachene jerecure. ²¹Nete satiin, nejelau ataneu nenacaauru- Jorioocuru rai jete, Moisesa aitoonjoa tonoraauruhane caohateein, quichaneein nejanoha canaanaine, jabereco macohi cari saera teeuruhane caohateei, chaen cana ichaonijihanai que ichaooruhane jianein ichaooruhane coina jete aitoi, naain ii beeure. ²²Tonareei jana, canacaanu rai, nii queta. Cha icharichaacheta. Satiin cachate, cau turuhine coitucuha cureeincha. Nihei chunei coitucuelanaala nainejerinaainta. ²³Aihana jaun, cana Jorionichaachene ichao rijijieein, ichaohine coitucuuruhane coina, cau caa jenaain canacaanu aina nenacaauru- cana araichuru, Cana Coaunera rai naitoonjoa nainacuruhane coina-nenacaauru ²⁴amaau ii jiniichaaincha. Chaen iitonoai, Jorioniheichuru jana neein iicha ichai caje nuculucuhine coina, ii coturiji loroaecaain joerateein, nii ii aina unacaauruhacha teeninuuru-itolere coreteeute, rai coturiji loroaecaain joeratenaa nainecurumiincha. Nii banate: 'Acaeaentonaite, Moisesa aitoonjoa tonorae. Aihana jaun chujian nohanihate, joanreein nere rocohin coulurujueeure.' naaurureein-satiin cachaaurura. ²⁵Nena laen, Jorionihichuru netonai esenetaaurera rai, quiricha cuhane: 'Coa acauru chosineein acaauruhacha tei- ecaanto rai- inara araichuru tenojoi- lenone quihachera. Nijiaonrihachu, ichana jabereco quiichenera. Nijiaonrihachu chaen, raro ruluhin sonojoin lenone niha natiin quiichenera. Nijiaonrihachu, nejelau ene- inara sinijierane lanaala nena aina ichaohichera.' naain laenecaanulura," naaure nii Saantiaao

rene turuhin nenacaauru- Jesocurisito esenetaeraauru coaraauru Jorioocuru-bichauhenaauru, Faboro rai.

Ita taojiaauruna jaan loreri- Teenforo asae Faboro mucuuruhane

²⁶Nii jaunte, niritiin Faboro letoauruhana jaun, nii jenaain cuu nenacaauru- Jorioocuru amaain, nii cojoanoo Teenforo acatiha jetao, acaauru aina jiniiquiin neculucore. Nii baiha jetaote, Teenforo asae enohin jetao, "Naaonjoai banana, caa Cana Coaunera rai canacaanu aitoonjoa nainarichaanuhincha. Jana naaonjoaain banana, Cana Coaunera belaihacaanune jaan- itolere terichaanuhicha," naain jetao bee Faboro.

²⁷Inae caaunsi janone nainane lalajeeuruhane jana jetaote, Teenforo asae Faboro eruhin, cachaauru suujua rohecaare- Asia batane caje unacaauru- Jorioocuru. Nitohaneein Teenforo asae Faboro eruhin jetaote, ²⁸rene cuhin ruhanihajaaintiin leeochoaauru Isaraelitaneeuruhane cotijiaain, nujuae soaijiin:

"Canejeraauru, canacaanu coroataja-necuche. Caa cachate, itolere atane sacutaain, cacha relaa amuhemujera. Itolere Jorionichaache neecha rautai que, nechu jataaen cana cairichaa, itolere Moisesa aitoonjoan tonoraacachene caohateein, chaen, caa ita taojiaain- Cana Coaunera bajanaanaja-Teenforo quene maajeiin ereeinchurura. Chaentechu, nejelau cachaauru-Curiecocuru cau enohain, caa ita taojiananaja- Teenforo aansaerate, jataaen colalajinacai niha, Cana Coaunera loreri nihana jaun natiincha," naaure jetao.

²⁹Jauriaa Efeso caje unaa Torofimo aina, nii neseu coaracuruhane jaun jetaotera, "Teenforo asae jecha nii

Torofimo enoaelu Faboro,” naain aitocure.

³⁰Nii jaun jetaote, cajihaneein suujua cuaain, satiin obajeein, soroneein ruhaneure, satiin- nii neseu nenacaauru cachaauru, codoonetiin Faboro mucuuruhane coina. Nitohaneein inae mucuhin jetaote, tarataracaain mitaure, nii ita taojiaauruhane jaan Teenforo caje. Nitohaneein tarataracaain mitaain jetaote, enonajaja- acujua fuhitocure jetao, ³¹cuu atinanacanein Faboro sooruhane coina, niqui.

Nii jana jetaote, le lauriin Romano-curu soondaro curuaanaa- comandaanti rai beorihure:

“Leinjiin ainate, satiin nejerateeure Jerosaleeun nenacaaurura,” naain jetao beure. ³²Nii jaun jetaote, coitucuuriiin luhecotariin nii rijieeoriitiin, acaauru curuaanaacuru, acaauru rai soondarooru, naaonjoaain jitariin taojiaain jetao, soroneein cuhin, nii neuruha cachaaaurune jaun turuha cue comandaanti. Nii acaauru curuaanaacuru, acaauru soondarooru, naaonjoaain aina cuha nii acaauru comaandaantine coariin jetaote, Faboro faohacuruhane jianecure. ³³Nitohaneein cuhin jetaote, Faboro roha turuhin, Faboro mucuhin, coroatajai *cadena* que ichoharate. Nii baiha jetaote, acaauru caje bajae:

“Chatohanaina caa catcha. Chatohanaina ichae,” naain bajae.

³⁴Nii jana jetaote, cajihaneein joareein nujuaen soaichure. Nii jaun jetaote, cajihanein, ohaohacooruhana jaun, caohachaaain rautaaain aonaain, rucuhena nainene nii soondarooru curuaanaa- comandaanti. Nii jaun jetaote, soondarooru que amaerate, acaauru loreri asae Faboro amaauruhane coina, acaauru comandaanti. ³⁵Inae acaauru lorerihu turuaain

jetaote, inanaana jaaun turuaain jetao, baijiaain Faboro inaaure soondarooru, nabana chatohanein Faboro teeuruhane coataa, ³⁶satiin caijie cuhin nujuae soajjin:

“Coaraain atinaauchera,” naain nujuae soaichuruhana jaun.

Satiin catcha notaracae ereerejiha Faborone

³⁷Inae nii soondarooru loreri asae enoanaa jerecuruhane jana jetaote, enoauruhane ajiniha, nii le laurii soondaro curuaanaa- comadanti rai jetao:

“Erenaa nainichaunna, ii aina basiinjiin,” naain bajaa Faborone jana jetaote:

“Curieco ere inaanajian, ³⁸Taa ii, jauriaa Egipto cocoaichanein- catcha areroo jena oharaancai sonajaain jaaoreraauru aina cuhin Romanonichaanune aina nejeratenaa neeineta,” naain bajae. ³⁹Nii niritiin bajaane jana jetaote:

“Canuna Jorioonein, jataaen nelateein nena- Romano nese tabai-Silisia batane que nena- Taroso cocoaicha neein neeunra. Atiin jereeunna, catchaauru rai erete, aonacurumiincha,” naa Faborone jana, ⁴⁰jeriha nii comaandaantine jaun jetaote, nii ininaanajaun nichaauraaain, catchaauru rai biji sarasarari Faboro, inauhene curuatoroaaain, curuaequiiin aonajeeuruhane coina. Nii jaun cuu inauheeneicha, curuatoroaaain aonajeeuruhane jana jetaote, Ebereeo ere cuhane cuaain:

22 ¹“Canu ere aonacuche, canejeraauru, ichauhenaauru, naaonjoaihunrina, canu jabereco coreniha caa que ere inara raite, aonaquichera,” ²naain jetaote, acaauru ere- Ebereeo cuhane cuaain, acaauru rai aitohane aonaain jetao, curuatoroaaain,

inauhene curuaaequiu aonajeure. Nii jana jetaote, inauhene curuaaequiu, aonajeuruhane jana jetao:

³“Canuhetonoaina- Joriooneun. Silisia batane que nena Tarosone, nejanohanaaneein neeun. Nena laaen cau, Jerosaleeun fojianohineein nenaaneeun. Jataain itolere coitucuhin nena- Camalieli relanojoeineina, rauhijiriin cana inoaesihuru jerenohi rijijieein nerelaain neeunlu. Nii jaunna, itolere bana, cacoichana aina cutaain, Cana Coaunera jerenohin ichana jereeeun, nii ena netojoeein ichaquichene rijijieein. ⁴Canuhetonainachu, caa Ena Nena Ichaonaa Caohacha esenetaain tonoraain- sacuurera rohecaain, atinanacaneinchuru, tabaauru mucuhin caresero cuhaneeeuru, teratenajarejetoonu, satiiin quichaauru, enecuru, naaonjoaihunru aina curuaae-caain. ⁵Satiiin batirichuru curuaanaa, satiiin Jorionichaachene coaraneein nenacaauru ichauhenaauru, naaonjoaihunrite, rai nota que nii coaraneein neeure. Acaaurute, nii Damasoco nenacaauru cana araaichuru- Jorioocuru rai, quiricha letoaaure, jerecuruha acaauru netonoaine, Jesocurisito esenetaeraauru ariin mucunajaain, cau Jerosaleeun uhanajaanune, caseteco coaracuruhane coina,” naain jetaote:

**Jesocurisito coitucuhin, esenetaane
nunuhetihane beebejiha Faborone**
(Ich 9.1-19, 26.12-18)

⁶“Nete mucunajaanune coina, Jorionichaachene coaraneei nenacaauru ichauhenaauru caje erena rocohin, aina Damasoco cuhanune jana, enoto chujutaain turuhelalajein, bero cuhane cuujihanune jana, luhantiin, dede caje conotiin, luhecotariin canu que jilenete. ⁷Nii jaunne, coasiha nuluna caaun, nii

canu cunaja caje nalatoon atane ichoae. Nii janate, canu curuaa que, cacurujua-teein: ‘Saoro, Saoro, chanuna, jataain, caniha nejerateein cacairichaaeriin, carerojoecaaita.’ ⁸naain tonihana janane:

‘Chaneein inaate Curuaanaa.’ naain, bajaanune janate:

‘Canuna, nii iicha cairichaaerii Nasarete cocoaicha- Jesoso neeunra.’ naain catoonrae nii erena. ⁹Nii canu corihaniha cunacaauru netonoaite, nii cono coaraain, acaauru netonai nesoonetoore. Nete laaen, nii carai irihane aonacurene. ¹⁰Nii jaunna:

‘Chatohanaina ichareeunte, Curuaanaa,’ naain bajaanune janate:

‘Chajaain nimichuhin, nii cuujueeine jaau Damasoco neseu cunihute, cuu, ichei, iicha chanenenu beeuruhinera.’ naain, catoonrae Cana Curuaanaa.

¹¹Nii jana, maosanein caratirihana nii conone jaunte, canu biji que canu mucuhin, canu taraetaraecaain, camaaure nii canu corihaneraauru, Damasoco neseu tiaaincha.

¹²Nii janate, cuu nelu, leinjiin cacha-Ananihasineein curuajaain, nii Damasoco neseu. Nii jetaote, jeriha Cana Coaunerane rijijieein, rauhijiriin caohacha ichaain, Moisesaacha laenailu tonoraeraneein ne. ‘Acate, caohacha cachanein nera.’ naauruha que, satiiin Damasocoo nenacaauru- Jorioocuru.

¹³Nii Ananihasite, turuhin cacoharaain: ‘Ichaso Saoro, coaiteen, enacoaunein conohine inotara.’ naane rijieeoritiinte, inae enacoauneein conoha canotane jaun, nii Ananihasi coaraaun.

¹⁴Nii baihate, carai:

‘Cana inoaesihuru Coaunera- Cana Coauneraate, ii coaraain, ichotijiae, niicha jerenohi coitucuhin, esinae rauhijiriin caoacha nejesina icharaneein nena coitucuhin, chaen raaje nujuae

caje ichei irihane aonaaine coinara.
¹⁵Iite, ichaajenihane, nii iicha coarai coaraneein, aohanraneein, beebejiha curiquiin, itolereenein chauratane quenacaauru sacutaaincha. ¹⁶Chajaain, caeneeneje lanaala cuhin, Cana Curuaanaa Jesocurisito bajaain nebaoti-saerateeute, ii colucomiincha.' naain caletoea nii Ananihasicha," naain jetaote:

"Naaonjoaainte, Jorioonihichuru rene caletoea Cana Curuaanaara," naain beebejiha Fabrone

¹⁷"Inae Damasoco caje cauhin, Jerosaleeun turuhin, cuu nenea Teenforo asae enohin, Cana Coaunera bajaanune janate, carai ecocoe Cana Curuaanaara. ¹⁸Carai ecocohinte: 'Chajaain luhecotariin caa Jerosaleen caje amuura. Cauhachanein canu ere beebejeeine, coatia chesenetaaururihaainta.' naane janane:

¹⁹Canu Curuaanaa, acaaurute, raotojoein, satiin sinacocacuru nainein ii ere tonoraerauru mucuhinchuru raanu, caseteconeeuruhane coinane coitucuurera. Chaentechu, tabaauru faoharatihanune coitucuuere raotojoeincha. ²⁰Chaen, ii ere beebejera Eseteba sohin jaoruhane coina, mucuhin, ajeri que bodoosihuruhane janane, cuu neeunlu canuhetonoai, sohin jaoruhane coarajihanune coinara.

Chaennachu, canu, nii soeraauru cachaauru- cajione beraichaneein neeunlura.' naanune saijieente:
²¹'Chajaain cuhachanihura. Canune eletoahaun, coriajai ataneuru nenacaauru rai, canu ere beebejiha kuhine coinara.' naain caletoea, Cana Curuaanaara," naain jetaote, acaauru rai, beebeje Faboro.

Comaandaanti bijihu niha Fabrone

²²Nii jaun jetaote, inauhene aonajeonrihuruhane baiha jetao, nujuae soaijiin jetao:

"Ichaonaa nainiheine caa cachata. Letonoanein, caa cana rai chauratane caje betacaainera," naauruha ²³nujuae soaijiin, cajionene maajein romasiinchuru, cajihanein ucuun cuaainchuru, butuuneneenanain rijaainna jaun jetaote, ²⁴soondarooru loreri asae, Faboro joerateein jetao, bisichate niqui soondarooru curuaanaa- comaandaanti, "Naaonjoain ichacaunne corenihate, caniha obajeine caque nejerateeurera," naain biha Fabrone coina niqui.

²⁵Nejetaote, inae bisihuruhane coina, ichohacuruhane jana jetao:

"Roma rai sioraranooru nihanatiin, bisichene coina nootejian- cocoainano- joineein neecheta," naain bajaain jetaote: "Nii ichoae tacaain, niheichu, 'Naaonjoaain corenihate, ai caa cachara.' naain coitucueralanaala, Roma rai siorarano casetecana nainiheecheta," naa nii comaandaanti que jauriicafitaan rai Fabrone jaun jetaote, ²⁶nii comaandaanti coinetein jetao:

"Coaraain aihu, taa cacha ainara, Roma rai siorarano jetaora," naain jetao be nii cafitaan.

²⁷Nii jaun jetaote, Faboro rohan nichuuntaain jetao:

"Esinae chachu rauhijiriin, Roma rai siorarano neeinta," naain bajaa nii comaandaantine jana jetaote:

"Esinae rauhijiriine aca neeunra," naa Fabrone jaun jetaote:

²⁸"Caraita, banejelanaala core coriqui que, Roma rai siorarano nihanune coinara," naa nii comaandaantine jana jetaote:

"Canu nejanoha caje coauneeina aca neein neeunra," naain jetao, tonorae Faboro.

²⁹Niritoha Fabrone aonain jetaote, caje amuhacoaure nii bisinaa jereraauru. Nii comaandaanti netonoain jetaote, coasiha nesoonete, Roma rai

siorarano nihane saijieein, *cadena* que Faboro ichoaratihana jaun.

**Jorioocuru curuaanaacuru,
acatiha niha Faborone**

³⁰Nii cojoanoon jetaote, caohachaaain rauhijiriin, Faboro colurujueeruhane jaan leranu coitucuha rauhijiriine coina jetao, jauriaanejeein Faboro caje *cadena* batuhichateein, jitariin Jorioocuru curuaanaacuru, batirichuru curuaanaacuru, naaonjoaihunri taojiaerate comaandaanti. Nitohaneein, taojianaarateein jetaote, nii baiha Faboro raerateein, acaauru acatiha te jetao, cuu irihane aonajeeuruhane coina.

23 ¹Nii jaun jetaote, nii Jorioocuru curuaanaacuru netaojiaain nenacaauru coarajeein jetao:

“Chasocuru, enanetojoeine ichaajoeein raotojoein casuujua coaraain neenun, Cana Coaunera notaracaae,” nae jetao Faboro.

²Nii jaun jetaote, cuu niha batirichuru curuaanaacuru curuaanaa- Ananihasineein curuajaine jaun jetao, nii Faboro roha nenacaauru letoae jetao, nii Faboro ujuae faohitocuruhane coina.

³Nii jaun jetaote, nii batirichuru curuaanaacuru curuaanaa rai:

“Cana Coaunera netonaite, ishoerateerein, coitucuha nocoetohi inatiin, caohachaaain ishujua coariheei rijitohina jaunra. Esinae rauhijiriin baaso ichacaaune coaraaine, aitoha Cana Quiricha cuhanene tocohaneein ichaaine coinat, nii ii nelauriana jaun, nelauriaai. Coatia aitoha Cana Quiricha cuhanene roeroitiin, casoerateine coina niheita,” naain jetao tonorae Faboro.

⁴Nii jaun jetaote,

“Niritiina, Cana Coaunera rai batirichuru curuaanaacuru curuaanaa nocoeje chanureeite,” naaure jetao, nii cuu- nenacaauru.

⁵Nii jaun jetaote,

“Batirichuru curuaanaa nihane coitucuhaaunnaate, chasocuru,” naain tonoranajaain jetao, “Cana Coaunera Quiricha inoaei cuhane: ‘Coaa inara curuaanaa que, tonaain baasoneein iriachera.’ naa natiinna, coitucuenihanune jaun aitoonra,” nae jetao Faboro.

⁶Nii baiha jetaote, “Caa batirichuru curuaanaacuru tabaaurute, sadoseeone. Jana tabaaurute, fariseeocurune,” naain, nainaan coaranajaain jetaote:

“Chasocuru, canuhetonaina fariseeo neenun, fariseeo caje nefoeratenaaneein nena nichaaunna jaun. Canuhetonai, ichanana nainiha onacaaurune esenetaanune corenihate, cacoluruhe- cure,” nae jetao tonijiaain Faboro.

⁷Niritoha Faborona jaun jetaote, nejesinajeein, ita cotaicha rijitocure nii fariseeocuru aina sadoseeocuru. Niritiin jetaote, ita cotaicha rijitiin jetao, ita caje nelerucure, ⁸“Ohane baiha jera, caje ichanaai nihei cacha. Chaen jera nihei Cana Coaunera letono- anjeraauru. Chaen jera nihei cacha suujue, cacha corii,” naauruha sadoseeocurune jaun. Jana, fariseeocurute laaen, niha nitohanaine esenetaaure, itolereenein. ⁹Nitohaneein, cuu ita rai nujuae soaichuruha, satiin cuu nenacaauruna jaun jetaote, fariseeocuru laurineeruha nii cuu nenacaauru cacha relaaurerana jaun jetao, Faboro cocoeratihana nimichuhin jetao:

“Coatia chatohaneei baaso ichaain nihei caa cachata. Jerihanete, leeinjiin suujue, rai erecaihara. Ainihane, Cana Coaunera letono leeinjiin anjerate rai erecaihara,” naaure jetao, nii Cana Coaunera Quiricha Inoaei que cacha relaaurerana- fariseeocuru.

¹⁰Nii jaun jetaote, jelai choae jauheco- tojoeriin, nejesinajeein ita suujua rohecaain, ita que nejerateeuruhana

jaun jetao, nabana cunaitaain, Faboro teeuruhane coataa jetao nii coasiha rai soondarooru tabaauru cotijiaain jetao, nacoauneen jelaiha soondarooru loreri asaee jetao Faboro joerate, nii soondarooru curuaanaa- comaandaanti.

¹¹Nii cojoanotiin, Faboro rai ecocohin jetaote:

“Chaque casilanaala, laraajiin, chaque tonajelanaala, raotojoeen neura. Cau Jerosaleun, quere beebejeine rijitjoeen, jerichanetojoeen, Romau cuhin, Romau nenacaauru rai netonai, quere beebejeinete nera,” nae jetao Faboro rai, Cana Curuaanaa.

**Ita suujuau tacaain,
Faboro sohin jaonaa jerecuruhane**

¹²Nii cojoanoon jetaote, janone ita suujuau tacaare Jorioocuru tabaauru, Faboro sohin jaoruhane coina. Nitohaneen, ita suujuau tacaain jetaote:

“Faboro sohin jaonaareen tiaain, coatia lenoneen, acau coriahacacheen. Jana, nii saijieein, Faboro sohin joelanaala lenoneen, acau cohin, naaonjoaacachene, cana carichaaaine Cana Coaunerara,” naaure jetao,

¹³Jenachoonca amuritiin Jorioocuru, Faboro sohin jaoruhane coina, ita suujuau tacaain. ¹⁴Nitohaneen, coaacuruhana jaun jetaote, batirichuru curuaanaacuru, Jorioocuru coaraauru bichauhenaauru, naaonjoaihunri rene turuha cuure jetao. Turuhin jetaote:

“Faboro sohin jaohacaanune reen tiaain, coatia lenoneen, acau coriaacaanuhinta. Jana, nii saijieein, Faboro sohin joelanaala, lenoneen acau cohin, naaonjoaacaanune, canacaanu carichaaaine Cana Coaunerara,” naaure jetao, acaauru rai. ¹⁵Niritiin jetaote: “Aihana jaun, inara le lauriin neiniquichene, inara leeochoauru aina, nii coaraneen neiniquichene, esine

rijitjoeen eresi: ‘Caohachaaain rai rucuhenacai bajaacaanu cajene coina.’ naain esine rijitjoeen, comaandaanti caje bajaain, cotihacuchete, inara rene jaoha uuruhane jana cojoaain, turuasi-churuhane ajiniha, sohin jaohacaanura,” naaure jetao.

¹⁶Nii jana jetaote, beeorihuruhana jaun jetao, coitucuuriin, nii Faboro rai biha cue jetao, soondarooru loreri asae turuhin, rai calaohi riji- rai bai calaohi. ¹⁷Niritiin bihane jaun jetaote, leinjiin cafitaan cotijiaain jetao,

“Carai caa enamanaa amaaui comaandaanti renete, leinjiin erenaa beenera,” nae jetao Faboro.

¹⁸Nii jaun jetaote, nii enamanaa amaain jetao, comaandaanti acatiha turuhaain jetao,

“Nii caseteconeen nena Faborote, carai ereen caletoe, ii rene caa enamanaa turuanune, ichei leinjiin erenaa bihane coinara,” naain jetao, biha nii cafitaan, nii comaandaanti raine jana jetao, ¹⁹biji que, nii enamanaa mucuuriin taratarajiaain, jelai amaain jetao:

“Tonai erenaate carai benaa jereita,” naain bajaane jana jetaote:

²⁰“Jorioocurute, ita suujuau tacaare, ii caje bajaauruhas eresine, nii coaraneen nenacaauru rene Faboro letoaaine coina jetao. Esine rijitjoeen: ‘Caje rai rucuhenacai bajaacaanu raotojoeine coinara.’ naauruein jetao. ²¹Nijiaonriha, nii esenetaain neenera.

Jena choonca amuritiin acaauru cachaaurute, cohacure, bujuaihu netiin, letonoa jatoroaain, Faboro sohin jaoruhane coinara. ‘Faboro sohin jaonaa reen tiaain, coatia lenoneen, acau coriaacacheen. Jana, nii saijieein, Faboro sohin joelanaala, lenoneen acau cohin, naaonjoaacachene, cana carichaaaine Cana Coaunerara.’

naauruha jetao. Leinjiin, ii letoaineeicha jetaote, cohajeeure,” naain biha nii enamanaane jana jetaote:

²²“Nijiaonriha, caa carai beeine rijitiin, chunei cacha rai beenera,” naain jetao, nii enamanaa suujuateein letoae nii comaandaanti, cauha cuhane coina.

Coberenadoro Ferisi acatiha nerujue coina, Faboro letoaauruhane

²³Nii jaun jetaote, coroatajai rai cafitaan-curu cotijiaain, letoanajae jetao, coroata fashai soondarooru taojiaauruhane, tijiaacha que cuuruhane coina. Jana, caaunsi chooncanein cabario choae cuuhenuuru, naaonjoaain nerujueeuru coina. Jana coroata fashai rejoin aina cuhenuuru, naaonjoaain jetao nerujueeure, Sesareea cuuru coina.

Nitohanein jetaote, netoona rijihu amuritoheriin, Sesareea cuuruhane coina jetao, niritiin erenaa te nii comaandaanti.

²⁴Chaen jetaotechu, nicheae cuha Faborone coina, leeiijiin cabario teratein jetao: “Nijiaonriha chatoanein cunaitaauruhane nainatejeein amaaichenera.

Nirijieein raotojoein raurono turuanichuchera,” naain jetao, caohatiin beraichateein, Coberenadoro Ferisi rene, Faboro turuerate jetao nii comaandaanti.

²⁵Chaen jetaotechu, acaauru aina quiricha laenaain letoae, Coberenadoro rai, nii comaandaanti. Cuu jetaote, nii niicha letoai quiricha cuhane jetao:

²⁶“Jataaen caohati Coberenadoro Ferisi neeine raina, ii coacuhin caa laenaain, ichei letoaaun. Canuna Calaoudio Lisihasi neeun. ²⁷Jorioocurute, caa leinjiin cacha mucuhin, sohin jaonaa coaacure. Nena, Roma rai siorarano nihane coitucuuuriin, canu rai soondarooru taojiaain, acaauru aina cuhin ichoterateeun.

²⁸Nitohaneeinna, ‘Cha jaun cha. Cha corenihacha caa colurujueeureta.’ naain caraajenihane coitucuhanune coina, acaauru coaraauru bichauhe-naauru- rene amaaunlu.

²⁹Nitohanein, amaain bajaanune janate, acaauru quiricha cuhane aithane rijijieein que aitiin, joareein colurujueeure. Niha chatohanein, sohin jaoruhana jaan lera colane techu, sohin jaonaa jerecure niqui. Nieichu, nii caresero cuhane nihane jaanu lera nihanatiin, nete, nii choae tacaain, sohin jaonaa jerecure.

³⁰Nitohanein, sohin jaonaa coacuruha Jorioocurune coitucuurina, caa ii rene letohaun. Chaen-nachu, raotojoein, ii acatiha, caohachajein colurujueeruhana jaan lera beein, rucuhacuruha caa colurujueeurerane coina aitoonra,”

naain jetaote, quiricha laenaain letoae Coberenadoro Ferisi rai, nii comaandaanti.

³¹Nitohanein, erenaa teein letohanajaa comaandaantine jaun jetaote, Faboro amaaure jetao, janotiin nii soondarooru, Antipatriau tiaain, nii letoanajaane rijijieein.

³²Nii cojoano jetaote, jelaiha soondarooru loreri asae cauha cuure nii tijia que cunacaauru soondarooru. Jana cabario choae cunacaauru jetaote, Sesareea tiaain cuure jetao, Faboro jiniichaa. ³³Nitohanein, cuhin jetaote, Sesareea turuhin jetao, nii Coberenadoro rai, nii comaandaanti letono- quiricha teein jetao, Faboro netonai teure jetao. ³⁴Nii jaun jetaote, quiricha jasaracaain ereretaain coaraane baiha jetao: “Chaa cajete, unaa neeita,” naain Faboro caje bajaa nii coberenadorone jana jetaote:

“Silisia batane cajena unaa neeunra,” naain jetao rai be Faboro. Niritiin rai biha Faborona jaun jetaote:

³⁵“Inae tururuha nii icholurueraaunena, ii ere aohareeunicha,” nae jetao Faboro rai, nii coberenadoro.

Nii baiha jetaote, nii caohatiin ajeri caje- Erodesi charatenohin- loreri asae Faboro fuerate, caohatiin beraichateein.

Coberenadoro Ferisi acatiha ereejiha Faborone

24 ¹Saoqui janohi baiha neeoriiin jetaote, turuha uhe nii batirichuru curuaanaacuru curuaanaa-Ananihasi, acaauru bichauhenaauru tabaauru, ita coulurujueerera coroatajanera Teeorotorosi neei curuajai *abogado*, naaonjoainuri uhaain turuha uhe. Acaauru jetaote, nii coberenadoro acatiha nichaauraaure, Faboro coulurujueeruhane coina. ²Inae nitohaneein, Faboro mitaain, turuaauruhana jaun jetaote, nii coberenadoro rai ere jetao nii *abogado* Teeorotorosi:

“Jataaen narihara, curuaanaa Coberenadoro. Ii corenihate, raotojoeein nihacache. Narihara, itolere coitucuhin, caohachaaain cana atane rucuheca, nitohaneein ichaaaine coreniha. ³Itolere sacutaain, nitohaneein ichaaaine coitucuhacaanu, inetono janonaa bana. Jataaente, caohati coberenadoro neein neeicha, Ferisi. Jataaena, ii coroaajihacaanu banejelanaalara,” naain irihane baiha jetaote, inae Faboro coulurujuenaa nunuheteein jetao:

⁴“Nabana, ii rai caeneenejihacaanune coataa, atiin canacaanu aonaauna irihacaanu. ⁵Caa cachate, itolere baaso uhai nejesima ne. Acate itolere, cana rai chauratane sacutaain amuhemujueein, Jorioocuru lerurucoai nejesima ne. Acate le laurii cache- nasarenoneein curuajaihuri curuaanaa neein nenea nera. ⁶⁻⁷Chaentechu, rautaejihacaanune asajajeein, nejelau cacheauru enoae Jorionichaanune rai Teenforo asae. Nii

corenihana, mucuhacaanulu. ⁸Caje nachuinti bajaate, esinae rauhijiriin, itolere ichaane coreniha caa coulurujihacaaune coitucuhi,” naain jetao, nii Faboro coulurujuee nii ita coulurujueeruha joricocurune, acaauru coroatajanera- *abogado* Teeorotorosi, coberenadoro Ferisi rai.

⁹Nii jana jetaote, jerichanetojoeein cuaain coulurujueere nii cuu nenacaauru leeochoauru Jorioocuru netonai. ¹⁰Nii ainate, Faboro rai, bijilalari jetao nii coberenadoro, iriha Faborone coina. Nii jaun jetaote:

“Nihei chaque tonajelanaalana, ichei erereeni cajabereeo coreniha, ii cana atane rai- itolere rucuheraanu que nenaaneei, bajaanacaain, inoaelu caje coauneeine coitucuhanune jaunra.

¹¹Lechoonca coroata janoheca, Jerosaleeun turuhin, Cana Coaunera bajaebajaecaaunera. Ichaajenihanete bajanaa naineeicha. ¹²Coatia chunei cache aina, ita cotaihajihaanune jana caurucuruhi, chaaelai janonaa banata. Niheichu chaen, ita taojiananaja-Teenforo asae nihanatiin, chunei cachaauru rohechahaunta. Niheichu, ita taojiaauruhane jaancuru sinacocacuru asae nihanatiin. Niheichu, cuu netiin chunijiun cachaauru rohechahaun. ¹³Nii jaun, nihei, chunijiun cuain tonaain cacoluruecuruha caa cachaaurune jaanuta. ¹⁴Nena caraajenihane, canu ichao bereeunicha, rauhijiriin. Canuna cana inoaeshuru coauneraneein nenea Cana Coaunera rai niicha jerei icharaneein neeunra. Nii Ena Ecoona Ichaonaa Caohacha-Jesocurisito tenojoine, canu, esenetaain tonoraun, Cana Coaunera ere bera inoasiuruhacha laenanohineein nenea nihana jaun. Nete, nii canacaanuhacha esenetai que, ‘Caqueje nelatihei,’ naaure, caa canu coulurujueracuru.

¹⁵Aihuruhane rijijieina, canu netonai inae cuu tihane bana, satiin onacaauru ichaterichaaain Cana Coaunerana jaun, ichanacururichaaain nechu aansaineein onacaauru, caohacha cachaneein naaonjoainurine esenetaaun. ¹⁶Nii jaauna, caohachaaain rauhijiriin, jeriha Cana Coaunerane rijijieein, casuujua coaraain neeun, Cana Coaunera notaracae, satiin cachaauru notaracaene maajeein. ¹⁷Itolere sacutaain, cajihanein amuhemuhecaaan bajaana-caaine baihana, coriqui uhaain, jelaiha canu ataneu caaun, itolere que necairichajeein ichaonacaauru rai teein acaauru coroatajanichaaunne coina, chaen, Cana Coaunera bajanaanaja coloheri Teenforo asae, Cana Coaunera rai, itolere lenonecuru sohin tihanune coinara. ¹⁸⁻¹⁹Nii ina ichaaun, nuculo-cohin, canu couturi loroaloroariin joeratihanune baiha, aitoha cana Quiricha Inoaesi cuhanene rijijieein. Coatia arajii cache codoriaain, ichahaaunluta. Niheichu chunei cache rohecaenihanune janate, nii ita taojiananaja Teenforo asae canu coaracurelu- Asia batane caje unacaauru tabaauru Jorioocurura. Acaaurutejian uhin, cacoluruhecuruhane laaen caohachae, esinae rauhijiriin chatohanai baaso ichacaunne coaracuruhane. ²⁰Nete uurene. Caa cau turunacaauru Jerosaleen caje unacaaurute, Jorioocuru curuaanaacuru, batirichuru curuaanaacuru, naaonjoaain acatiha teein, acaauru rai, cacoluruhecuruhana jana, ecu neeurelura. Acaaurute aihane jaun naine, chatohanein baaso ichacaunne coitucuhin cacoluruhecuruhane caohachae, nete nainecurenera. ²¹Acaihanejei, nii cacoluruhecuruhane banaachana, satiin codoaquiin aonajeeruhane jana, tonijiaain: 'Ichanana nainiha onaane esenetaanune

corenihacha nachura, cacoulurujueein, canasina coaquichete.' naaunlura," naain jetao be Faboro.

²²Nii jaun jetaote, inae raotojoein, Nii Ena Ecoona Ichaonaa coitucuha, nii coberenadoro Ferisine jaun jetao, nirijieein nii ratiriin:

"Inae turuha comaandaanti Lisihazine banana, inara cotiaratereuni enacoauneein, nii neruujue coina," nae jetao, Ferisi.

²³Niritiin jetaote, nirijieein mucuhinein Faboro sirichuruhane coina, cafitaan rai aite Ferisi. Chaen raotojoein Faboro rene turuhin, rai niicha latei teein naaonjoaain, aina erena nainecuruha belaichaurune coina jetao aite. ²⁴Nii cojoanoo cojoanoo jetaote, nacoauneein turuha uhe Ferisi, rai comasai Dorosila aina. Nii comasai jetaote, Jorioocuru bene ne. Nitohanein turuhin Faboro cotiharitha Ferisine jaun jetaote, turuhin acaauru rai Jesocurisito esenetaain, tonoraane que, acaauru rai ereerejiha Faborona jaun jetao, cuu rautatiin aonajeeure, itolere que, acaauru rai ereerejihana jaun. ²⁵Ne jetaote, "Caohacha nejesina ichaechajeein ichaoinete caohachae. Jana baasohacha ichajeein ichaohine caoachai, inae cuu tihane bana, satiin colurujiha curichaaain Cana Coaunerana jaunra," naain rai biha Faborona jaun jetaote laen nesoonete, nii Ferisi. Nesoonetiin jetaote:

"Inae, chajaain caunihu. Inae nainichaaune banana, coaiten ii cotiharatereunicha," nae jetao, Faboro rai, Ferisi.

²⁶Niritiin jetaote, coriqui que, coretiha Faborone jeriha, jianihane coinana jaun jetao, araai saain nihane cotijiae, rai irihane coina Ferisi.

²⁷Nirijieein, coroata jaanacaain ichaane

baiha jetaote, coberenadoro nihane caje jetao mitue Ferisi. Inae mituha Ferisine jana jetaote, coreenraniha enoe- Forisio Fesetoneein curuajai. Ne jetaote, jerecuruha Jorioocurune rijijieein ichaane coina jetao, caseteconein Faboro ratiriin jetao, mitue Ferisi, nabana baasoneein cotaairiin coaracurua Jorioocurune coataa.

Feseto acatiha niha Faborone

25 ¹Inae coberenadoro nihane coina, Sesareea turuhin, coberenadoro neein enohane baiha jetaote, nichata janohane cuhane jetao, Sesareea caje, Jerosaleeun cue jetao Feseto. ²Nii jana jetaote, cuu rai Faboro couluru-jueure jetao, nii Jerosaleeun nenacaauru, batirichuru curuaanaacuru, Jorioocuru rai jataaen nelateein nenacaauru naaonjoainuri jetao, Faboro coulurujueure. ³Nitohanein, couluru-jueein jetaote:

“Atiin canacaanu rai, cau Jerosaleeun nii Faboro joerateeura,” naain bajaure jetao, bero cataaun coharateein, Faboro sohin joerateeuruhane coina coacuhin niqui. ⁴⁻⁵Ne jetaote:

“Cuute, Sesareea caseteconein nedaelura. Nena, ena chajaaajoaain jelaiha cureunnicha. Inae jelaiha cuhanune janate, nainecure cajiniichaain uhin, cuu teein, chaaelai que situha, nii cachane, coulurujuenaa nainecure inara rai jataain nelateinein nenacaauru- cocoainacaihurura,” naachae jetao, acaauru rai Feseto.

⁶Nii Jerosaleeun, fosa janone nihane, lechoonca janoneein nihane baiha jetaote, jelaiha Sesareea cauha cue jetao Feseto. Nii chojanoo jetaote, ita coulurujueureru rucuhacuruhana jaan coloheri- *tribonal* asae rori ichoae nelauriaain jetao, Faboro raerate. ⁷Inae Faboro turuaauruhane jana, enoha

Faborone jana jetaote, rohan nichuuntaacoaain jetao, coulurujueure Jerosaleen caje uhin turunacaauru- Jorioocuru. Itolere baaso cuhane cuaaichuru, joereein caje erenaa rocohichuru, coulurujueure jetao, baaso ichaenihane sainejeein. Nii jaun jetaote, esinae rauhijiriin erenaa nihane coitucuurene. ⁸Nii jaun jetaote, acaeaen-tonai, rai jabereco coreniha jetao:

“Coatia chatonai baaso que irihaun, Jorioocuru aitoonjoa, Jorioocuru ichao coacuhinta. Niheichu, ita taojiananaja Teenforo coacuhin irihaunta. Niheichu Romanocuru curuaanaa coacuhin irihaun baasoneinta,” naain jetao, ere Faboro.

⁹Nii jaun jetaote, caohachaain Jorioocuru aina nedanaa jerihane jaun jetao:

“Cureeina Jerosaleeun, cuu teein nii ichei rucuhencaci rucuhecaaanne coinaneta,” naain jetao, Faboro caje bajae Feseto.

¹⁰Nii jana jetaote:

“Nena jerichanejeein, Romanocuru curuaanaa- cana netonai curuaanaa- eenferadoro icharatenohi neruujuenaanaja coloherihu *tribonal* asae caa neeun, cau teein neruujuenaa nainichaaune coinara,” naain jetao, tonorae Faboro. Niritiin tonoraain jetao te: “Ti te, raotojoeein Jorioocuru rai baaso ichaenihanune coitucuhin neeicha.

¹¹Esinae rauhijiriin, jataain baaso ichaain, baaso que situhin nihanune coaraain, nii coreniha casohin cajaaonaa jerera nihane, coatia nii caohaterihaaun, coatia onaa coasihaaun. Jana, esinae rauhijiriin, erenaa nenihane, nihei chunei acaauru rai canu tenaa nainihe, casohin cajaooruhane coina. Nii jaunna, ii caje bajareeunni, raajenihane canu rai- rucuhencaci rucuheca Romanocuru curuaanaa- eenferadorone coinara,” nae jetao Faboro.

¹²Nii jaun jetaote, nii cuu nenacaauru rai coroatajaneraauru caohachaain

suujua rauhi coaraauru caje jetao bajae Feseto. Nitohaneein, bajaane baiha jetaote:

“Inae Romanocuru curuaanaa, ii rucuhecane coina bajaaina jaunte, Romanocuru curuaanaa rene curiquincha,” nae jetao Feseto, Faboro rai.

Curuaanaa Aquirifa acatiha niha Faborone

¹³Nii baiha neenejeein jetaote, namujera Berenisi aina jiniiquiiin cuhin, Sesareea turuha cue, curuaanaa *rey*-Aquirifa, Feseto coaraane coina. ¹⁴Cuu araai janohin aina niha- nii curuaanaa jaun jetaote:

“Cautene leinjiin cacha caseteconein Ferisiicha ratirilura,” naain jetao, bee Feseto. ¹⁵Niritiin beein jetaote: “Jerosaleeun turuhanune janate, carai couluru-jeeurelu batirichuru curuaanaacuru, saain Jorioocuru bichauhenaauru, naaonjoainuri, casetecaanune coinara. ¹⁶Nena, acaauru rai: ‘Coatiha nainihe aonaeniha cachane jana, nedaa couluru-jueein niha namute cachane, nii coulurujuenojoi cacha caseteacaain, chatoaneein teein, sohin joera jereein, naaonjoaain niha Romanocuru rai rauhineti. Niha ita coulurujueranete, ita acatiha netiin, nii colurujera aina iriha nii coulurujuenojoinete jere Romanocuru rai rauhicha.’ naaina acaauru rai beeeunra,” naain jetao beebeje Feseto. ¹⁷Niritiin beebejeein jetaote: “Nii jaunna, cau tururuha nii satiin coulurujuueurerane jana, nii cojoanoonecoriin, cacha rucuhacaunna jaan coloheri *tribonal* asae rori ichoae nelauriaain, nii cacha raerateeun, nii rucuhacaunne coina, ¹⁸inacojoein niqui, ‘Chatohanein jecha sosereein, chatohanein Romanocuru curuaanaa aitoonjoa tonoraa cachane caohatihane

coreniha jecha carene letoaaure.’ naain niqui. ¹⁹Nete, leinjiin acaihanejeein, nii acaauruhacha esenetai que aitiin, chaen nii onaalu Jesosoneein curujai queecha maroain coulurujuueure, ‘Enanetojoein jete, ichoae,’ naa que Faborona jaun. ²⁰Nii jaunna, nii aina, chaa coitucuenihanune jaun, Faboro rai: ‘Cureeina Jerosaleeun, cuu nii ichei rucuhencai rucuhequine coina’ naain bajaan. ²¹Nii janate, ‘Cana curuaanaa, Romanocuru curuaanaa eenferadoro jete, rucuhere raajenihane,’ naain bajae, cana curuaanaacha rucuhecane coina. Nii jaunna, rucuheca eenferadorone coina letoaanunereein tiaain, caseteconein nihane coina aitoon,” naane jana jetaote:

²²“Canuhetonaina, iriha nii cachane aohana jereeeunra,” nae jetao, curuaanaa *rey* Aquirifa, Feseto rai. Nii jaun jetaote:

“Eresite aohanriquiincha,” naain jetao tonorae Feseto.

²³Nitohaneein jetaote, nii cojoanoo, ita taojiaauruha cachaauruna jaan coloheri asae, netaojiaauruhane jana, enoha cuure jetao, jataain nelateineein neeuruhane coarateein Berenisi aina, *rey* Aquirifa, chaen soondarooru curuaanaacuru aina nii cuu nenacaauru nese cocoaichacuru, jataain nelateein nenacaauru naaonjoainuri aina jiniiquiiin. Nii jana jetaote, Faboro joracateerein jetao, raerate caresero caje, Feseto. ²⁴Nii jana jetaote, inae turuaauruhane jana:

“*Rey* Aquirifa, satiin cau canacaanu aina netaojiaain nenacaauru, nocoaca cacha coulurujuenojoin. Satiin Jorioocurute, carai coulurujuueure. Saain Jerosaleeun nenacaauru, cau Sesareea nenacaauru, naaonjoaihunrite nujuauen soaisoaihanaain, ‘Sohin joerateeura.’ naain jataain ohane jerecure. ²⁵Nete, chatoaneein baaso ichaene, caa cacha.

Nihein sohin jaoha- cachana jaan leranu carai. Nete raajenhane rucuheca- cana curuaanaa- Romanocuru curuaanaa- eenferadorone caina, bajaana jaun, inae nii jerichaauna jaun, ucuae letoareeunicha,” nae jetao Feseto. ²⁶Niritiin jetaote:

“Nete nene, ‘Naaonjoain que situhin, naaonjoain ichaana jaunte, caa cache coulurujueeurera.’ naain beein, laenaain, canu curuaanaa Romanocuru curuaanaa- eenferadoro rai, beein quiicha letoaaene. Nii jaunna, satiin cau neeichene jaun, caa raerateeun, caohachaaain, ii cau neeina jaunra curuaanaa Aquirifa. Inara acatiha teein, bajaanune, raotojoein tonaain ereeuruhane, laenaain letoanaa nainichaaun, cana curuaanaa eenferadoro raine coinara. ²⁷Jana, ‘Naaonjoain corenihana, caa ii rene, caa cache letoaaunra.’ naain chaelai que tonaain benihanunete, ‘Chanuna joaareein, caa cache letoae, lera colane.’ naain nii que, nererojocare cana curuaanaa- Romanocuru curuaanaara,” nae jetao Feseto.

Coulurujueeuruha Jorioocuru najaa lera biha curuaanaa Aquirifa rai Faborone

26 ¹Nii jaun jetaote, Faboro rai: “Inae laen nainein, ii jabereco coreniha ereeinera,” naa *rey* Aquirifane jaun jetaote, acaauru rai ucuun biji sijitaain jetao:

²“Jataaenna coroaeejeun, *rey* neeine acatiha, cau ererichaaunine jaunra, *rey* Aquirifa. Aihana jaun, atiin canu ere aonaaunna, itolere que cacoluruhecuruha Jorioocuru najaa que, erete aonaaun coitucuhicha. ³Iite laen, jitariin itolere Jorionichaanune ichao coitucuhin, ita rohecaain ita rai ereerecaanune jaanne maajejin coitucuhin neeicha- curaanaa. Nii

jaunna, atiin quere aonaaune jereeeunra- curuaanaa,” naain jetaote:

Jaiti Cana Coaunera coitucuhin, esenetaenihane bana, rai nichao biha Faborone

⁴“Satiin Jorioocurute, canu ichao coitucuuere, acaauru aina ichaorejeto- coaaunlu, canu ataneu, chaen Jerosaleeun, naaonjoaihun, canu enamanacane caje coauneena jaun.

⁵Chaen techu, raotojoein fariseeoneein nihanune coitucuhin, rauhijiriin benaa nainecure ii rai, jerecuruhane. Nii coitucuhichene rijijieina, leeochoaauru amuritoheriin jataain rauhijiriin, canaacha esenetai tonoraera neein nihacaanu. ⁶Cana inoensihuru rai Cana Coaunera aitoonjoa nii niicha letoanaa jerei canaacha cohajei esenetaain tonoraanune corenihate, caa cacouluru- jueein, caa chaatiha canu turuaeratee- rera. ⁷Canacaanu lechoonca coroata laurii Israeli cocoaichacuru- foeraten- o- joinein nihacaanunena, nii cana foerateeurera rai Cana Coaunera aitoonjoa cohajihacaanu enanetojoein. Nii jaunte, Cana Coaunera coroaeejin bajajein, naitoonjoan niicha jerenohin ichacaun, jiicho, janotiin, naaonjoaain- churu. Nii cana inoensihuru rai Cana Coaunera aitoonjoa- canaacha cohajei ere tonoraanune corenihate, caa cacoluruheecure Jorioocurura, *rey* Aquirifa. ⁸Chanuna onacaauru ichatiha Cana Coaunerane esenetaeneeiche inara.”

Jesocurisito ranojoihunra rohecaain cairichaerichaetohalune biha Faborone

⁹“Canuhetonainecheu, jauriaa, ‘Caohacha jecha ichaaun,’ naain, Nasarete cocoaicha Jesoso ere esenetaain tonoraeraauru rohecaain, acaauru cairichaaun, ¹⁰Jerosaleeun

batirichuru curuaanaa letononeein caresero cuhanena maajejin arajii Jesocurisito esenetaeraauru teraterejetoonu. Chaennachu, tabaauru sohin jaooruhane rautatiin coroaerejetoonu.¹¹ Inaaajoan saneein chaainti, acaauru casetecaraetoonlu, 'Inae jian laaen, tonorarihaacaanuhinta.' naain, nii acaauruhacha esenetai acaauruhacha ere tonorai- Jesoso ere tonoraauruhane jianecuruhane coina. Jataaenna, nechu ansainein mijiaaainein, acaauru rorohecaeraetoonlu, naain coriaae nejelau ataneu- nenacaauru neseeurune maajejin cuhinchurura.

Coaiteen, 'Naaonjoaaina, nunuheteein, Jesocurisito coitucuhin esenetaain tonorana nunuheteenlura.'
naain biha Faborone
(Ich 9.1-19, 22.6-16)

¹²Nitohanein, Damasoco neseeu nenacaauru mucuhin raanune coina coacuhin cuhanu, batirichuru curuaanaa letononeeine janate, ¹³bero cuhane cujihanu, turuelalajeine jana, enoto chujutaaain, luhecotariin, canu, nii canu aina unacaauru, naaonjoainihacaanune rohan enoto cono amurijiriin conotiin, luhantiin lanaanete dede cajera, *rey* Aquirifa. Nii jaunne, saain jiniiquin, ¹⁴atane ichoae nemarotihacaanune janate, carai Eberero ere cuhane cuaain: 'Saoro, Saoro, chanuna jataen caniha nejeratein carerojoecaai. Nechu jataaen ichaajenihanete, baaso ichaain, ijiabereone cairichaain, cunaitaa nii aaicha.' naain canu caje bajaane jana ne: ¹⁵'Chaneinaate curuaanaa.' naanune janate: 'Canuna-nii iichaa cairichaaerii- Jesoso neeunra.' naainte: ¹⁶'Chajaain nimichuuna, ichei erete aonaaicha. Cauna ecocoon, ichei irihanune, canu letononeein neeine coinara, chaen ena, caa iicha coarai

beein, ii que caa baiha- quiicha coaratenenine maajejin beein, canuneein nihanune coitucuerateeine coinara. ¹⁷Canuna, Jorioniheichuru, Jorioocuru, naaonjoaihunri caje, ii ichoteratiha cureeunicha. Acaauru renena caa ena elotoareeunnicha. ¹⁸Coanaanihute, acaauru nota jirichae-ranuque, acaauru rai canu ere beebjeeite, Acaauru Coanera nichaanune coitucuhin, quere tonoraain, canune maajejin coitucuuruhine, nabana taeneein cuajejin, moconajaera ere tonoraain sacuelanaala, canu, nosa caje cacha mitaeranichaaunne coitucuuruhane, nosa coreniha caseteconein neeuruhane rai- neeuru caje nichoteein, Acaauru Coanera nichaanune rene tacanaa nainecuruhane coina, leeocharu Jesocurisito ranojoihunru aina jiniiquin neeuruhane coinara.' naainte caletoea Cana Coanera Calaoihi Jesosora," naain jetao:

Rai ereein letoaa Jesocurisitone tonoraa Faborone

¹⁹"Nii jaunna, dede caje ecocohin-caletoaera lacoelanaala, ²⁰jauriaanejejin Damasoco neseeu nenacaauru rene turuhin, acaauru rai Jesocurisito ere beebjeeunra, *Rey* Aquirifa. Nii caje cuaaina, Jerosaleeun nenacaauru rai beebjeiha cuun, itolereenein Jodea batane sacutaain nenacaauru raine maajeinchuru, chaen Jorioniheichuru raine maajeina beebjeeunra, baaso ichajejin, neosatihajein ichaoruhane jianein, Cana Coanera esenetaain, niicha jerenohi rijijiein ichaohin, inae esinae rauhijiriin Cana Coanera esenetaeranein ichaoruhane coarateeuruhane coinara. ²¹Nii corenihate, ita taojiananaja Teenforo asaae canu eruuruhane jaun, canu mucuhin, casohin, cajaanaa jerecure

Jorioocurura. ²²Nete atiin, cacorataa-niha Cana Coaunerane jaun, enaneto-joeein jaiti ichaojoein, Cana Coaunera ere beebejeein sacuurra, satiin-cairicheihuru rai, saain cocoainana-caihuru raine maajeeincha. Coatia chaaelai janonaa bana, Cana Coaunera ere bera inoaensihuru- Moisesa, naaonjoaihunri aitoonjoa jochin, rohin irihaaunti. Jerichanetojoeina, rauhijiriin, ‘Naaonjoarichaain jetao,’ narejetocuruhalune rijitoejein: ²³Ohanete ne nii Cana Coaunera letononeein unaa- Mesihasischa. Nete, nitohaneein ohane baiha, aca niicha ranojoihunru ajiinchateraniha, oo caje ichanananeein niha cureeincha. Nii baihate, itolere sacutaain, beebejeno-joeein niha cureein, satiin cacha nota jirichaeraaunu quera, nii aina, Cana Coaunera coitucuruha, satiin cana araaichuru necoina, chaen nejelau atanue nenacaauru niha natiinine coinara.’ naain aitoroaetooruhalune rijitoejeina aitoonra,” naain Aquirifa rai beebeje Faboro.

Jesucurisito esenetaain, tonoraa curuaanaa Aquirifane jereein, rai ereerejiha Faborone

²⁴Niritiin, ereerejiha jabereco coreniha Faborone jana jetaote, rai nujuae soaisoain:

“Mainajiriin nerelaacha neeine jaunna, nesooneejoaain joaereein ereeite, Faboro,” naa rai Fesetone jana jetaote:

²⁵Coatiana nesooneejoaain joaereein irihaaunte, caohati coberenadoro Feseto. Caa aitocoanne jaante, esinae rauhijiriin erenaane. ²⁶Caute ne, caa curuaanaa *rey* Aquirifa- itolere niriinanai coitucuera. Nii jaunna, chaque tonajelanaala, nacatiha caa ereerejeun, acaentonai niriinanai

coitucuhin nihane jaun. Coatia chaaelai asinojoein nenea que caitono nihei. ²⁷Cana Coaunera ere beracuru-*profetacuru* inoaensihuru aitoonjoa esenetaaina, *Rey-* Aquirifa. Rauhijiriina, itonai esenetaaine coitucuurra,” naa Faborone jana jetaote:

²⁸“Basijiin lanajeje, caque jererateeine jaun, canuhetonai Jesucurisito rainein nihanunera,” naa curuaanaa *rey* Aquirifane jana jetaote:

²⁹“Coatia jerihane, iicha aiheeita, curuaanaa. Satiin cau neein aonajeeurera raina, Cana Coaunera bajaau, esenetana nainecuruhane, caa aihanune tocohanein *cadena* que cositeno-joein nelanaala esenetaauruhane coinara,” nae jetao Faboro.

³⁰Nii jaun jetaote, nimichuhin, naain jelai cuure coberenadoro aina curuaanaa *Rey* Aquirifa, chaen, Berenisi, chaen, nii leeochoauru cuu acaauru aina nelauriaain nenacaauru, naaonjoaihunri aina, cuu jelai teein, ³¹nii que ereeuruha nejesinajeein, ita raine caina. Cuu jetaote, ita rai nejesinajeein:

“Coatia chatoanei baaso ichaa caa cachata. Cha corenihate, sohin joerareta. Nainiheinchu, caresero cuhane nihanatiin caseteconein nihaneta,” naaure jetao ita rai nejesinajeein. ³²Niritiin, ita rai ereeuru baiha jetaote, Feseto rai:

“Raajenhane rucuheca satiin curuaanaanein nenea- eenferadorone caina, aitho caa cachane colanete, jianena naaineicha,” nae jetao *Rey* Aquirifa, coberenadoro- Feseto rai.

Romau, Faboro letoaauruhane

27 ¹Inae Italiau canacaanu letoanaa jerecuruhana jaunte, casetecocuru coaraain raeraanu que le laurii soondarooru- Eenferadoro

raineein- curuajaiuru rai cafitaan- Jorio neein curuajai rai, leeochoaauru caseteconein nenacaauru teeuruhane jiniichaain, rai Faboro netonai teeure. ²Nii jaunna, Andaramitio cofauhana caje cucuana cuhane cuhin coriae nenea- Asia batane que nenacaauru neseeuuru- cofauhanau tiaain cunaa bote cuhane fauhin, nesaru rai nihana jaun, cuhane fauhin cuhacaanu. Nii janate, ecu neein, canacaanu corihaniha uhe- Masedonia batane que nenea Tesaloneca cocoaicha Arisitaroco. ³Nii cojoanoo, Sidoon cofauhanau turuhin, cuu najaurihacaanune janate, jataain Faboro belai, nii soondarooru curuaanaa Jorio. Caseteconein cuha Faboro natiinte, bote caje iniin, belaichaauru rene bedaeiniha Fabrone coarajeein, cuu rai niicha latei teeuruhane coaraje, belaiha cafitaan Jorio. ⁴Nii Sidoon caje nesaruhina, canacaanu que tacaain uha cujuanane jaun, nii cujuana que acateraain, Chifere cobene jelson cuujihacaanu. ⁵Nitohaneein cuhina, cucuana jera jaoha cuhacaanu, Silisia batane auha jelson. Inae cucuana jera jaohina, Silisia, Paanfilia, naaonjoainuri batane auhaniha situhin cuhin, Lisia batane que nenea neseu- Mira turuhacaanu. ⁶Cuute, Alejaandiria caje unaa leinjiin bote Italiau cuujenaa rue, nii soondarooru curuaanaa- cafitaan. Nii cuhanete, canacaanu fauherate, cuhane cuhacaanune coina. ⁷Nitohaneeine, araai janohin, jataain jeraaen cuujihacaanu. Nii jaunna, necairichajeein turuhacaanu Nidoneein- niicha curuaateeuuri jeraniha. Nii jana, jaiti canacaanu que tacaain uha cujuanane jaunna, Cureta cobena nichaae nitinonohin, Salomoonnein acaauruhacha curuaatei cobene jeraniha situha cuhacaanu. ⁸Nitohaneaina, necairichajeein cuhin, Cureta

auhanihacha rauhijiriin cuujueein, Laseanein curuajai nese rohan nenea- Caohatiin Cofauhanainein curuajaihu turuhacaanu.

⁹Inae carajaa cuhacaanune jaunte, nii tonohana inae cujuana aina jelarona que turuhelalajihana jaun, luhante- cucuana cuhane amunaa, banejeniha cujuanane jaun. Nii jaunte, acaauru rai:

¹⁰“Aonacuchena caa que erete, aonaquiche. Jataaina banejelanaala, cana rai lunaa curichaain, caa amunaane coitucuun. Baana cauhacha nelanaalate, aihacachera. Saainte, nii iicha amai rucuhele aina jiniquii nitajiha cureein, caa botera. Cana niha natiinte, onaa nainichaachera,” naain niqui suujuatenajae Faboro.

¹¹Nete, nii bote erora, nii bote curuaanaa cafitaan, naaonjoainunru, ereecha tonorae, nii soondarooru curuaanaa- cafitaan, Faboro ere tonoraelanaala. ¹²Nii jaunte, caohachao- joaeniha sanein, nii neeuruhane jaan cofauhanane jaun, cuu neein cujuana aina jelarona bitoanaa jerecurene. Nii jaunte, satiin lalajeein, leeochoa fauhana- nii jeelai Cureta cobena que nenea- Fenisiau cunaa jerecure, cuu cujuana aina jelarona bitoauruhane coina. Jelaite, enoto soo jelson neein, cana raoto nichajai que, cana ajaabiji nichajai que naaonjoaain inanacae.

Cucuana cuhane niha cujuana tabaine

¹³Nitohaneainte, “Tonaje lanaala jecha cujuerichaanuhin,” naain nesaruhin cuhacaanu, enoto soo jelson neein ajaabiji nichajai caje uha raujiaain aasaaeriin jouhaquiin- cujuanane jaun. Nitohanein cuhina, Cureta auhaniha cuujihacaanu niqui.

¹⁴Nete, nii baiha neeoriin, enoto soo nichaae cuujueein cana raotono nichajai que, enoto mitu dararo caje uhe jataain

mijeeinetiin cujuana. Niite, bote que tacaain, richorocoae. ¹⁵Nitohaneeinte, richorocoain, cuanaa jerichaanune jaan edacai que, bote cuae nii cujuana, que tacaain macohi auriteein, acatena nainenihacaanune jaun. Nii jaunna, cuu canacaanu amanaa jerihane jaan jeloan, canacaanu amaane coarajihacaanu. ¹⁶Nitohaneein cuhina, leinjiin obena laaojoiiri Caaodaneein curuajai rohan situha cuhacaanu. Ucuajai que saneein mijeeinetiin tacaeniha cujuanane jaunna, jataain necairichaaoriin, tijichaaain canacaanuhacha amai- naluha botene nichoteeuruhana jaan- bote laaojoiiri inacaanu. ¹⁷Nitohaneein mucuhin tararaain inaacaanune baihate, cuu, inori que, nii cuhacaanune jaan bote ichohacure, nunaane coina. Nitohaneeinte, carene araraca-Siretenein curuajai que tacanaa coasichuruhane jaun, cujuana aina amuuruhane jaan bela serichure, ocoai nichaae cuuain, cujuana ainaacha cuujueeuruhane coina. ¹⁸Nii cojoanoo, jaiti mijeeinetiin uha cujuanane jaunte, cucuana cuhane, nii bote coneracuru jaonaa nunuheteure. ¹⁹Nitohaneeinte, nesarucuaanune nichata jano cuhane, bela nujuaauru tabaauru, chaen itolere nii nichotihacaanune que nelatelanaala nenacaaurune majeein jaore. ²⁰Nitohaneeine, araai janohin enoto coarilanaala, nii arasijie nihanatiin coarinihacaanu. Nechu jataain nirijieein nesurocorihei rijijieein, bote nalaaene amuneein sacuha fichafichanaane jaunne, "Inae jecha ecu ohacaanune nitajerichaanuhin," naacaanu niqui.

²¹Nitohaneein, araai janohin lenonelanaala nihacaanune jaunte, satiin canacaanu cataaun nichaauraaain:

"Coaracuche cachaurute, quere tonoraelanaala, cuhacha nena richae, Cureta caje cana uhaichelu. Colane

chachu, cuu raotojoein nihacache. Colane, catohanai baaso que siturihaacache. Nii colane, chaaelai que siturihaacache. ²²Nijiaonriha joaereein, inara suujua cuaaichene. Coatia leinjiinejeein orihaaain chunei cacha. Caa botete laaen, nitajiha cureein. ²³Enene cojoanotiinte, canu rene, rai cacha neein- letononeein nihanune rai, letono anjera letoae- Cana Coaunera. ²⁴Canu acatiha ecocohinte: 'Coaa casihara, Faboro. Atiinte, Romanocuru curuaanaa- eenferadoro acatiha tururiquiinch. Ii corenihate, atiin onaa caje nichotiha cuurureein saain nii ii aina bote cuhane nenacaaurura.' nae carai Cana Coaunera letono- anjera. ²⁵Aihane jaun, cha que tonajelanaala, joaenreein inara suujua cuaelanaala, caa caitoonjoan esenetaachacuche. Nii aitoha Cana Coaunera letono anjerane tocohanihate cureein. Esinaete rauhijiriin aite. Canuna, esinae rauhijirin aitohane coitucuhin esenetaun. ²⁶Nete laen, leinjiin obena que tacaain baulenetoha caa botene jana, cuu nerarichaacheeincha," naain bee Faboro.

²⁷Inae coroata semanaa nesarucuaanunena janate, Ariaticoneein curuajai cucuana cuhane cuujihacaanu, janotiin. Nii janate, dede catai rijiu, cuu cajianein bote amaa cujuanane jana, inae cucuana auhaniha nichuuntaacaanune que nainacure bote beraihurera-marineroroo. ²⁸Nitohaneeinte, inae coitucuuruhane jaun, nucuhaano cojounacatein coaracuruhane jana, nichatachoonca saota metorone rai nucuaano. Nii caje cuujueein, coaiteen nucuaano cojounacatein coaracuruhane janate, coroatachoonca caaunsi metorone rai nucuaano. ²⁹Nii jaunte, ajeri que tacanaa coasia, bote roeniha jenaain anajiin nena coata- aancla

nalaaure, cuu bote acateein, cuu mucuhane coina. Nii nalaecuruhane nainihate, Cana Coanera bajaebajaaecure, chajaain janohane coina. ³⁰Nii janate, bote macohiniha anajiin nena coata- aanclaauru nalaera rijijieein, nii-naluha botene nichoteeuruhana jaan-bote laaojoi faunaa nunuheteure nii bote beraihurera- marinerooru, nii bote caje sorooruhane coina. ³¹Nii janate, coaranajaain, nii soondarooru curuaanaa cafitaanun rai beein, nii soondarooru raine maajeein beein:

“Berainajaeneeichenete, caa bote ratiriin sorooruhana acaauruhachane, nenereein nichoteeichene jaanura,” nae Faboro.

³²Nii jaunte, acaauruhacha amaemajei bote laaojoi ichora saaujihure, nii soondarooru, acauhanau naluhane coina.

³³Inae janonaa raite, satiin acaauru rai, lenonecuruhane coina:

“Inae coroata semanaa, nirijieein caohachaaain lenonelanaala neein, situha cujuana aina fichafichanaane cohaquichenera. ³⁴Aihana jaun, chajaain chaaelainiji que lenonecuchete, nii aina abaantaain nichotenaa nainequichene, nichoteeiche. Coatia nitajerihaaain leinjiinejeein nihanatiin chunei couturiujicha,” nae Faboro.

³⁵Niritohane baihate, satiin acatiha teein, faan teberiaain, nichoae Cana Coanera bajaane baiha, nii faan tatuhin, beeunebeeunein que lenone Faboro. ³⁶Nii jaunte, lenonena coaujueurenihane baiha, inae satiin lenonecure. ³⁷Itolereneeina, coroata fasha caaunsi choonca saotanein, nii bote cuhane nihacaanu. ³⁸Nitohaneeine jerenihacaanune jaun tiaaajoaain, nainaaain lenonichaanune baiha, nii canacaanun lenone tirico caute jaohacaanun cucuana cuhane, nesaracaa nii botene coina.

Cucuana cuhane naluha botene

³⁹Nii janate, inae janoe. Nete, “Caelai caara,” naain, nii atane coitucuurene nii bote beraihurera marinerooru. Nete atiin, cuu -cucuana auha leororo- carene siricha coaraain, cuu nii bote jauriaanaa coacure niqui. ⁴⁰Nitohaneein, cuu jauriaanaa coacuhinte, nii bote laracaauruha acuu cataaunna jaan anajiin nena coata- aanclaauru ichora saujiin ratirihure. Nitohaneein teinte, bote cocoihacuru, roeneraaunun que nelateein nena cosileoaracaaure. Nii baihate, bote macohiniha nena bela tocoore. Nii jaunte, nii aina inae erojoein cucuana auhania nichuuntae nii bote. ⁴¹Nitohaneein cuhinte, nichuuntaain carene araraca raroaqui choae, baulenetoha cue nii bote. Nii jaunte, caohatiin baulenetoha nii bote macohi nichajaine jaun, carene raroaqui choae liquinetiin, rurujuana-caje lanaala nedae nii bote macohi. Nii jaunte, jataaen mijieinein tacaafichafichanaana jaun, fichafichanaa caaun, nefejeein, nichalunihaje bote roe nichajai. ⁴²Nii jaunte, nii caseteconeein cunacaauru sohajein jaonaa jerecure nii casetecocuru beraihureraauru soondarooru, nabana joichohin sorooruhane coataa. ⁴³Nete, caohate nii soondarooru curaanaa cafitaan, Faboro coreniha, nabana Faboro netonai sohin jaoruhane coataa. Nitohaneein caohateinte, joichona inaurera letoae ichoaichania, acauhana naluhin cuhin, atane que cohanaacuruhane coina. ⁴⁴Jana, leeochoaauru, acaauru caajie cuuruha tabara choaene jana, tabaauru leeochoaauru netonoai cuuruha nii- bote nichalunena jerooru choaene coina, letoanajae- nii cafitaan. Nitohaneeine, satiin, leinjiin obene que neraain, onaa caje nichotihacaanu.

Malata cobena neraa Faborone

28 ¹Satiin, obene que neraaina, Malataneein curuaaca nii obenene coitucuhacaanu. ²Jelai cocoaichacuru cachaurute, jataain caohacha nejeeuruhana jaun, saain canacaanu belaihure. Nii janate, uheuheca elone jaun, jelarotohane jaun, enuha codoriaain mocohin, iihane jana, canacaanu cotihacure, nichaatihacaanune coina. ³Nii janate, enuha cohi taojiaain raane jaun, usi jana tihajiha Faborone jana, iihaniha usine jaun, ajaano caaun sorohalaain, Faboro biji que tijileneein calae acano. ⁴Nii Faboro biji que tijileneein calaa acanone coaraainte: “Jerihanete, soserena necaiha caa cachara. Cucuana cuhane naluhin, onaa caje nichotihane jaunte, ichaohane jerene, dedeeu nena- nii rucuhhera,” naaure Faboro coarajeein, nii cuu nenacaauru cachacuru.

⁵Nii janate, nii usi iihanei cataaun, nii acano chatachataain siheitiin, cuu tonajelanaala nee Faboro. ⁶Nii jaunte, satiin, “Laraarichaaain jecha,” naain cuu, laraacane coarajeeure. Nii janate, laracaene. “Luhecotariin jecha cora aonaain, tocojoaain tacaain oreein,” naainte niqui, cuu, carajaain coarajeeuruhane jana, tonajeerinihane jaun, suujua elonaain:

“Leeinjiin chosi necaihara,” naaure Faboro que.

⁷Nii nihacaanune jaan rohante ne nii obene que nenacaauru coara Fobirio neein curuajai cacha rai atane. Nii Fobirio, canacaanu belaaain, canacaanu rae, rai loreri asaae. Nii jaunne, cuu aina nihacaanu nichata janohin. ⁸Nii janate, ajaa que jeraain ujuee caaun cunaiteein ecu niha nii Fobirio inacana jaun, rene turuha cue Faboro. Rene turuhinte, coaraain

nichoae Cana Coaunera bajaane baiha, nichoae biji merecaain, dadaain aonaane rijieeoritiin inae nerautae. ⁹Nii coitucuhinte, satiin uure nii obene que nenacaauru leeochoauru cunaitenacaauru. Nii jaunte, rautanaaca Faborone jaun, nerautaacoaain caaure. ¹⁰Nii jaunte, satiin canacaanu belaihurhane jaun, jelai caje amuhacaanune coina, bote cuhane fauhacaanune rai, cuujueein canacaanuhacha quinienu que- canacaanu achanojoaure, itolere amunaa rai nelatecuri teein.

Romau turuha Faborone

¹¹Nitohaneein, cuu nichata ateein nii obeneu nihacaanune baihana, leinjiin bote- Alejaandria caje unaa- cuu cujuana aina jelarona bitoha nena bote cuhane fauhin, cuhacaanu. Nii botete, coujunacanu que nihane coina, fafione neein, acaauru chosichurune que Curiecocuruhacha tei- Castaro, Polosi, naain curuajaihuru ecaantooru- coujunaca amaerane, bote macohiniha teein. ¹²Nitohaneein cuhina, turuha cuhacaanu, Siracosa cofauhanau. Cuuna nihacaanu nichata janohin. ¹³Nii cajena, nesaruhin cuujihacaanu, cucuana auhaniha, rauhijiriin Rejioo turuhacaanune coina. Nii cojoanoonte, cuujiha- caanune jana, canacaanu cunaja bote roe caje uhe, raujiaan jouhaquii cujuana. Nii cojoanoon cojoanoonna, turuhacaanu Poteoolihu. ¹⁴Cuuna, Jesocurisito coreniha cana nejeraauru tabaauru ruhacuhacaanu. Acaaurute, canacaanu cotijiaain, cuu canacaanu chunaaure, le semanaain acaauru aina nihacaanune coina. Nirijieein inacuhe inacujueein cuujueeina, tabiicha turuujihacaanu Romau. ¹⁵Nitohaneein cuhin, atane ichoae inacuhe inacujueein cuujihacaanune coitucuruha nii Romau nenacaauru Jesocurisito

coreniha cana nejeraaurune jaunte, canacaanu que taca uure, Apio rai Foro neseu tiaain. Nii jana, leeochoaurute, Nichatajai Taberenaneein-acaauruhacha curuuatei neseu canacaanu cohacure. Nii cuu neeuruhane coaraainte, corojeein, Cana Coanera baja Faboro. Nii ainate, raotojoein suujua aonae Faboro. ¹⁶Nii jana, Romau turuhacaanune janate, jelai loreri asae teein, nirijeein caseteconein, jianacoo teein, leinjiin soondaro que beraichain, Faboro sirichuruhane coina jerecure.

Romau niha Faborone

¹⁷Nitohanein, nichata janojoein turu baiha neeriinte, nii Romau nenacaauru- naraichuru Jorioocuru rai nelatein nenacaauru- jitariin cotiharate Faboro, acauru rai irihane coina. Inae satiin turuhacoain, netaojiaauruhane janate, acauru rai:

“Carachuru, chaelai janonaa bana cana Jorionichaachene que baasoneein irihaaunta. Niheichu, chaelai janonaa bana, cana inoasihuru ichao coacuhin baaso neein irihaaunta. Nii atiinte, Jerosaleeun cacoulurujeein, baaso ichara nihane rucuheraaunu que Romanocuruhacha cocoainohi rai canu teeure Jorioocurura. ¹⁸Nii janate, jitariin caohachanainejeein, cacaje bajaauruhane baiha, caihanenaa jerecure, neniha casohin cajooruhane jaan- leranune jaun niquicha. ¹⁹Nena, onaa caje nichotihanune jerecureniha nii cacouluruherauru Jorioocurune jaun, canu rucuhaca satiin- curuaanaa neein nena eenferadorone coina bajaau, nii neniha caraichuru coulurujihanune jaan lerane saijieincha. ²⁰Nitohanihana jaunna, inara jitariin cotiharateen, inara coaraain, inara rai irihanune coitucuhi-

chene coinara. Cana Isaraelita nichaachene, canaacha cohajei esenetaanune corenihane, cau caa *cadena* que cositenojoneein neeunra,” naa acauru rai Faborone janate:

²¹“Coatiha chaelai quirichanejeein letoaauruhi Jodea caje canacaanu rai, ii que, ‘Acate, naonjoain que situhin nera.’ Nii jaunna, ii berenaa coitucuhene-nihacaanura. Niheichu, ucujaji caje turunacaauru- cana araichuru- Jorioocuru nihanatiin, ‘Acate, baaso ichaechajeein ne jetaora.’ naain, ii que ereeuruhita. ²²Nena laen, nii le laurijeein- enanenaa Jorioocuru ichao beeine jerichaanura. Tonaai ii, nii queta. Itolere sacutaain, baasoneein nii que ereeuruhane coitucuhacaanune jaunna, ii, coitucuhina jaun, nii beeine aohana jerichaacaanura,” naaure Romau nenacaauru Jorioocuru, Faboro rai.

²³Niritiinte, “Naaonjoain cojoanonaa banana, turuha urichaanuhin, nii que ereei canacaanu raine, coitucuhacaanune coinara,” naaure. Nii jaunte, nii aitocuruhane cojoanonaa bana, netaojiaaure arajii cachaauru, nii niha Faborone jaan loreri asae. Nii jaunte, janone caje coauneein, acauru rai ereereje Faboro, Cana Coanera Cojoanonaa que, sonafaajeein. Nitohaneinte, Moisesa aitoonjoa quene maajeein, chaen Cana Coanera ere bera inoasihuru *profetacuruhacha* laenai, naajoainunru aina cuaain, acaauruhacha cohajei Mesihaseenine niha Jesusone esenetaauruhane coina, acauru que jererateein, acauru rai beebeje. ²⁴Nii ainate, tabaauru, nii aitoa Faborone esenetaain tonoraare. Jana, leeochoaurute, esenetana jerecurene. ²⁵Nitohaneinte, ita suujua rijitojoenaa jerelanaala, mituhajeein caunaa nunuheteeuruhane jaunte, acauru rai:

“Esinaete, rauhijiriin nitohaneeeichene coitucuhin, inara foerateeurera rai biha nere bera inoasesi Isaihasine coina, berateein:

²⁶ ‘Caritiin benihi,
taa cachaauru rai:
Aonaquichene nihanatiin,
caohachaain aonaain,
coitucunaa naineriheeicheeinta.

²⁷ Chaen,
nii coaraqichene nihanatiin,
coaranaa jeriheeicheeinta.’
naain berateein:
‘Banejelanaala nauhacaa
acaauru suujuane jaunte,
raajenhane aonana jerecurene,
acaauru rai beraane nihanatiincha.
Niheichu,
acaauru notaracaae nihanatiin,
coana jerecuruhita.
Nii jaunte,
coitucunaa nainecurenera,
nabana nesoone caaun,
canu rene necohaleeuruhane,

acaauru rautaaain nihanune
coataara.’

naain rai nere bera inoasesi- Isaihasi que beratelu jetao, Cana Coaunera Suujuera.

²⁸ Aonacuche. Caa acaihanejeein Cana Coaunera tenojoin jianacoon cana mitaeranu esenetana jerelanaala, aohana jereneeeichene jaun, ena caje coauneein, Jorioniheichuru rai beebejiha cureeunicha. Acaaurute laen, aonaain esenetaain, tonoraa cuurureeincha,” naa Faborone jaunte,
²⁹ nejesinajeein, mainajeein ita cotaain cauha cuure Jorioocuru.

³⁰ Nitohaneeeinte, cuu itolereneein, coroata ajaanacaain neelu Faboro, nasae nihane coreniha coretejeein, niicha sirii loreri asae. Nii jaunte, rene turuha cunacaaurunihane, cuu ranajaque.

³¹ Nitohaneeeinte, cuu tonajelanaala, Cana Coaunera Cojoanona beebejeein, Cana Curuaanaa Jesocurisito quene maajeein ereerejenajaque, nii chunei rorohecaera colane.